

Wosheetswots Fino Kindo

Wosh nana'úwots fino Luk'as doo shishiy-atse tuuka, Mas'aafan b́ kiistsiru keewo Iyesus shuutso shoydek't sha'efwots S'ayin shayiron jisheyat b́ jangosh keewiru dooshishi keewo «Iyerusalemn, Yhud datson, Semariy datson, datsi daarats» (1, 8) doo shishiwo awuk'on bobetsituwok'o keewone, Mas'aafan krstiyani wotar amano ayhudiwotsitse de'e tuur dats jamatsi ash jami imnetiyo b́ wotefetsosh awuk'on b́ gawuntsok'owo keewiruwu taariki mas'aafoniye. Han guut'tso, krstiyaniwots Roomtso naashi naashonton wed'ewosh gitsotse k'od'o finerawu ashuwotsi bowoterwok'oonat krstiyani imnetiyo ayhudiwots imnetiyo iki s'ayin woshituwo b́wottsok'owo kitsosh ayi nokoreree.

Woshetswots fino, Iyesus Krstos jango keewiruwu doo shishiwosh keewets keewo b́ bodts beyokoke úniaawo gawunfere b́'amfook'onat Ik'i moo ned'iyetsok'o golit keez een een kayuwotsi matso falfe.

1. Krstiyani imnetiyo Iyesus daromaand k'az b́ tuwiyakon Iyerusalemitse dek'tuwetsok'o.

2. Israe'el dats jamats b́ bodtsok'o.

3 Roomno dabdek't Meditraniyi aatsi k'ari gúúratse fa'a datsuwotsatse b́ gawuntsok'o.

Wosh nana'úwots finotse p'ap'urat be'eyiruwu S'ayin shayiri fintso wotatni P'ent'ek'ost'eyi aawots Iyerusalemitse fa'a amantsuwotsats angnon

ǃ oot'tsok'o, mank'owere mas'afmanitse ik ikon k'aleets jamwotsitse ǃbe'etsok'oon S'ayin shayiro krstiyaniwotsnton et boon jishiruwotsi ǃ jishiruwok'onat boon ǃ kup'irwok'o ǃits dab bodek'kiye. Yoots dúr t'iinf teshts krstani wosho k'osh k'osh nabuwotsitse tep'ook'wo araatniye t'inree, woshetswots finotse k'aleets finuwotswere woshman amantsuwots beyonat krstiyaniwots ik wotosh ǃ detsts kup'o awuk'o een ǃwottok'oniye bokitsiri.

Jamon mas'aafan ǃdetstso

Gawu wotosh k'ani dek'i jango 1:1-26

A. Iyesus s'uwatse ǃ imts tzaziyonat ǃ jangits keewon 1:1-14

B. Yhud beyok ǃshegro bezetso 1:15-26

Iyerusalemitse gawets gawo 2:1—8:3

Yhudnat Semaariytse gawets gawo 8:4—12:25

P'awlos wosheyat ǃfiints fino 13:1—28:31

A. Wosheyar sha'a shintso 13:1—14:28

B. Iyerusalemitse kakuweetso 15:1-35

C. Wosheyar sha'a gitltso 15:36—18:22

D. Wosheyar sha'a keezltso 18:23—21:16

E. P'awlos Iyerusalemitse, K'isariyitsnat Romitse ǃ tipetsok'o 21:17—28:31

¹ Shiimetso Tewofloso!

T mas'aaf shintsoitse Iyesus ǃ fintsonat ǃdanits jamo guut're. T guut'uwe Iyesus ǃ fino dek'ǃtuwortsoon tuut ² Daro maantsan ǃ tuuts aawo ǃ borfetso ǃ fintsoniyee, daro maantsan ǃ tuwwere gal ǃ dek'ts woshetswotssh ǃ tzaziyo shayiri S'ayini weeron ǃ imihakoniye, ³ Ay gond

bek'o dek't bí etiyak beyar beetk b wottsok'o kitsit weeron ayoto boosh b be'eyi, hab aawosh boats be'eyat Ik'i mengst jango boosh b daniyi. ⁴ Bonton beyat b m'óor hank'o ett boon b azazi, «Taa itsh t keewtsok'o nihokere itsh imosh jangiyetso korde'ere bako Iyerusalemitse keshk'ayere, ⁵ Yohanis aatsone b gupi, itmo muk' aawoniye okoon shayiri S'ayinon gupetute.»

Iyesus daro maantsan btuwok'o
(*Mar. 16:19-20; Luk'. 24:50-53*)

⁶ Bowere ikoke ko'edek't bo befere, «Doonzono! n mengsto Isra'elsh aani n imet aawo andeya?» ett boati.

⁷ Iyesusu hank'o ett boosh bí aaniyi, «Niho b took alon bí etts aawonat dúron it danosh falatste. ⁸ Ernmó shayiri S'ayino itats b oot'or ango daatsitute, manoor Iyerusalemn, Yhud dats jamatse, Semariyon, dats daar jamats b borfetso taash gawo wotitute.» ⁹ Hank'owere bí etiyakon bo bek'fere daro maantsan k'az b tuwi, dawunonuwere bín dek't bo awatsere ááts b k'ri.

¹⁰ Bíwere daro maantsan b tuufere, boowere t'iwints dek't daromandan bo s'iilfere nas' taho tah dek'ts git ashuwots bo ganokere need' dek't, ¹¹ «It Galil ashuwotso, eegishe need'dek'at daromatsan it s'iliri? Daro maantsan b dek'efere it bek'ts Iyesus haniye, daro maantsan b tuufere it bek'tsank'on aanar weetuwe» bo eti. ¹² Maniyere hakon Debreyeit gurats Iyerusalem maants k'azboani, Debreyeit

1:4 1:4 Luk'. 24:29 **1:5** 1:5 Mat. 3:11; Mar. 1:8; Luk'. 3:16; Yoh. 1:33 **1:8** 1:8 Mat. 28:19; Mar. 16:15; Luk'. 24:47-48 **1:9** 1:9 Mar. 16:19; Luk'. 24:50-51

guro Iyerusalematse sanbati aaw sha'ok'oyiye (ik kilometrok'oyiye). ¹³ Iyerusalemits waat bobeef mootse dambani k'aat'ots k'az bokeshi, boowere P'et'rosi, Yohansi, Yak'obi, Indriyasi, Filip'osi, Tomasi, Bert'elemiyosi, Matiwosi, Ilfyos naay Yak'obi, okooretso Simoonnat Yak'ob naay Yhudne. ¹⁴ Jametsanots úniaawo Ik' k'onosh ik nibona bokakuweefo, bontonuwere mááts ik ikuwotsnat Iyesus ind Mariyamn, mank'owere Iyesus eshuwots fa'ano botesh.

¹⁵ Manoor P'et'ros bale hiyo wotitu amants ashuwots taalotse need'dek't hank'o bíeti, ¹⁶ «Ti eshuwotso, Iyesusi detsts ashuwotsi jishtso Yhud jangosh, shin shin shayiri S'ayino Dawit noonon b́ keewtso S'ayin mas'aafi aap' s'eeno geyituwe. ¹⁷ Yhud noyitsi iko wotat finan noonton finosh taaweytniye b́teshi. ¹⁸ Ernmó ashaan b́ gond finon b́ daatsts gizmann datso keew b́dek'i, b́ baron diht gúp'unat b́ taalon kap'eyat bí anzro k'az b́keshi. ¹⁹ Keewanuwere Iyerusalemitse fa'a jamwotssh b́ daneyi, mansh datsmanúwere bo nooni keewon <Akeldama> et s'egeyi, b́ bitsonuwere <S'ats datsa> etee.

²⁰ «Man b́ wottsonuwere dub mas'aafotse,
 <Bbeyoko dats baash wotowe,
 Konuwor bíyats beek'aye,
 Aaninuwere b́ naashts naasho k'osh asho bíyatse
 de'ewutsowe>
 Ett guut't teshetsotsnee.

21 «Eshe Doonzo Iyesus nodagotse bí ananori noonton towat teshtswotsitse, 22 Mank'o Yohans guproon tuut doonzo Iyesus daromaants b́ tuufetsi aawosh noonton teshtswotsitse ash iko noonton k'irotsé tuwi jango gawo b́ woto geyituwe.»

23 Maniyere hakon git ashuwotsi bo t'intsi, boowere Bersabasi wee Iyost'osi eteefo Yosefnat Matiyasna botesh.

24 Hank'o ettnuwere Ik'o bok'oni, «Ash jami nibo dants doonzono! Gitetsanotsitse nmarat'tso aawi b́ woto noosh kitsuwe, 25 Nok'onirwonwere Yhud b́ tookon k'az bíamori k'azb́k'rts wosheet-sots finan de'er b́ shaato shegrshosh wotituwo noosh nkiitsishee.» 26 It'onowere bo shap'i Matiyassh b́ keshi, Mansh bí tatse ik woshetswot-nton b́ taaweyi.

2

Iyesus b́danifuwotsats S'ayin shayiro b́ oorsht-sok'o

1 P'ent'e k'ost'eyi baaliyi aawa eteetso b́ bodtsok'on bo jametsuwots ik wotdek't ikoke kakuwedek'tni botesh, 2 Gawerawo eegurahi kup'ok'o arts k'aaro darotse b́weyi, bítse bo beyiru moonowere s'een b́wutsi. 3 Taaw laluw artso boats bobé'eyi, kaye kayeyatnúwere bo ik ikotsats k'ot'bodek'i. 4 Jamwotswere shayiri S'ayinon bo s'eeni, Shayiri S'ayinon bo keewituwok'o boosh b́ imtsok'on k'osh k'osh noonon keewo dek't botuwi.

5 Dats jamatse beyir datsatse waatsuwots, Ik' k'onon kup'iru ayhudiwots Iyerusalemitsa bobeefo. 6 K'áarmano bo shishtok'on ayi ashuwots bo ko'eyi, bo took took nononowere bokewufere bo shishtotse bo'adi. 7 Tek'at adtnuwere hank'o bo eti, «Hank'o keewiru jamanots Gelil dats ash nosha? 8 Eshe no nó took noonon keewo bokeewefere noshishir aawuk'oneya? 9 No P'arteen, Miedn, Elamn, Mesp'et'omin, Yhdon, K'op'dok'n, P'ant'osn, Isiyon, 10 Frgiyoon, P'nfliyon, Gbs'n, K'eren ganoke fa'úwots Libiyi awurajuwotsitse beyiruwotsiye, Romitse waats ayhudiwotsnat ayhudiwots jiro maantso kindtsowots daatseyiruwone, 11 Mank'owere K'ert'esitsnat Araawi dats ashuwots daatsetune, Hamb jamanots Ik'o een fino nononon bo keewufere shishiruwonee!» 12 Mann jametswots adt bo keewituwo t'ut't iko ikosh «Keewan eebiye k'úna b'wotiti!» bo et.

13 K'oshuwotsmó «Weyiniyon dutsets biri handro úsht mashwutsernee!» eton boon boatsni.

P'et'ros keewts keewo

14 Manoor P'et'ros tatse ikuwotsnton need'dek't b' k'aaro eenshdek't ash ashosh hank'o ett b' keewi, «It Yhud dats ashuwotsnat Iyerusalemn beyiru jametsuwotso, wotts keewan danosh tkeewo k'ewere, 15 Guuron keez sa'ato b'wottotse it it aasabtsok'o ashaanots masheratsnee. 16 Ernmó han b'wotiye Nebiyiyo Iyu'el hank'o et b' keewuts keewo b' s'eenishe, 17 <Ik'oniye dúri s'uwí aawots hank'o wotituwe etre,

T Shayiro ash jamats kut'ituwe,
Bo nungushnana'onat mááts nana'uwotsn bek'on
keewitunee.

Bo jawetswotswere bek'o bek'etune.

Bo eenashuwotswere gúmo gumetunee.

¹⁸ Mank'o, manoori aawumanotsitse

T guuts nungushuwotsnat máátsuwots at-
sats

T shayiro kut'ituwe,

Bowere bek'on keewitunee.

¹⁹ Danbe darotse adits keewwotsi,

Dashe datsatse adits milkituwotsi kitsituwe,

S'atso, taawo, s'uwi s'aawiyonuwere
be'etuwe.

²⁰ Eenonat aditso

Doonzo aawo b́waafetsere shino,

Aawo t'aluwituwee,

Aashitsunuwere s'atso arituwane.

²¹ Doonzo shútso s'eegetu jamo kashituwe.>

²² «Israe'el ashuwotso! aap'an k'ewude'ere,
It it tookon it dantsok'on Nazretso Iyesus koni
b́wottsok'o Ik'o it dagotse b́weeron b́ k'alts
een een finwotsi, aditsuwotsnat milikituwots
arikon daneewtsernee. ²³ B́wor b́ tookon Ik'o
shin shino b́ k'anitsok'onat b́dants finok'on itsh
besheyat b́ imeyi. It were morrgonduwots
kishon jiteyar b́k'irituwok'o it woshi. ²⁴ Ik'onmó
k'iri angotse farit k'irotse b́n b́ tuuzi mansh k'iro
b́n deshde oriyo falrtsatse. ²⁵ Dawit b́ jangosh
hank'o etfe,

Doonzo úni aawo tshinatse bek'iruwe,

T shek'erawok'owere b́ t k'ani aaratse

²⁶ Manshe tniibo geneeúwre,

T nononwere geneeúwone s'eene,
Mank'owere tmeetsonú kótón jangáár bee-
tuwe.

²⁷ T kashunowere Si'olitse k'ayk'reratsnee,
N S'ayinonowere dowootse o'or b̄ ooritu-
wok'o woshratsnee.

²⁸ Kashi weeronowere taash danirne.
Taanton nwottsonowere t geneúwo s'een
wotituwe.»

²⁹ «Eshuwotso! yoots nihiwotsitsi iko Dawit
b̄ k'irtsok'onat b̄ duketsok'on, b̄ downuwere
andish b̄ borfetso noganok b̄ fa'ok'owo kishde
itsh keewuna. ³⁰ Ernmó Dawit han b̄ keewiye
Nebiyo b̄ teshtsotsnat Ik'o nnaarotse iko n naashi
jorats beezituwe ett taaron jangit b̄imts keewo b̄
dantsotsne. ³¹ Manatse tuutson Mesiyo Siolitse
b̄ oorerawok'onat b̄ meetsonuwere o'or b̄ oor-
erawok'o shin shino k'ivotse b̄tuwi jango b̄keewi.
³² Iyesusi Ik'o k'ivotse tuuzre, no nounetswor
keewansh gaw noone. ³³ Ik'o k'ani aaromants
beyosh danbaan b̄tuwooronat jangiyets S'ayin
shayiro Nihoke b̄ dek'tsok'on it bek'iruhannat it
shishiruwann kuut'b̄k'ri. ³⁴⁻³⁵ Eshe dambaan
daromantsan keshtso Dawiti b̄ woterawotse
Dawiti b̄tookon hank'o ett keewre,

⟨Doonzo t doonzsh

N balangarwotsi ntufishirots tgerfetsosh

T k'ani aaromants beewe⟩ » etre.

³⁶ «Eshe it itjittso Iyesusi Ik'o Doozonat Mesiyo
b̄ woshtsok'owo Israe'el ash jamo arikon dan
de'e!⟩

³⁷ Ashuwotswere man bo shishitsok'oon bonibotse ayidek' shiyanat P'et'rosnat k'osh woshetswotssh, «No eshuwotso! eshe and eege nok'aliti?» boeti.

³⁸ P'et'rosuwere hank'o boosh bíeti, «Naandrone erere, it morro itsh orowa eteyish it ik ikets Iyesus Krstos shútson gupewere, Ik'i imtso Shayiri S'ayinono dek'etute ³⁹ B jangiyets aap'onwere itnat it nanaúwotssh, no Doonz Izar Izewer b maantsan b s'eegetu wokoon beyiru jamwotsshe.»

⁴⁰ K'osh k'osh ay keew keewon gawefetst «K'uur s'oot'anats weet fayotse it tooko kashiwere!» ett boon b izi. ⁴¹ Boyitse ayuwots b aap'tso dek't bogupeyi, manots aawot-sowere keez kumok'o wotitwots amantsuwotsats dabebowutsi. ⁴² Bowero wosheetsots daniyo k'ebon, ikwotde beyonowere, Mishi maratse towaat moonat Ik'o k'ononowere bokup'efooni.

Ik' Amantsuwots Eshu Wotonat Ik Wotde'er Beyi jango.

⁴³ Manoor wosheetsots kishon ayo adits keewonat milikitwots bo fineyiruwatse tuutson jametsatse shato oot' bwutsi. ⁴⁴ Amants jamwots ikwotde'erni bobee fon boteshi, Bo detsts keewu jamononwere shira bteshi. ⁴⁵ Bo taaronat bo dettso kemdek't b gizo jametsosh bgeytsok'on bokayifooni. ⁴⁶ Aawu aawon Ik'i mootsnowere ik nibona bokakuweefo, bomaa mootsnowere misho tishfetsr geneeúwonat nib sheengona bomaafoni botesh. ⁴⁷ Doonzonowere bo udefoni, ash jamonuwere boon mangiya b mangifo,

Ik'onuwere kashiru ashuwotsi aaw aawon boyits
daba b́dabfo.

3

Ash duro b́kashtsok'o

¹ Ik aawu P'et'rosnat Yohansn Ik' k'oneef sa'aton aawitsi jed'i sa'aton Ik'moots boami,
² Manoknowere «Sheenga» err s'eegef fengesh iko fa'e b́tsh, b́shuwertson tuut dúr wottso ash iko ashaashwots aawu aawon de'ewaar manok ger bok'rofo, b́i manoke bede'er Ik' moots kindiru ash ashaatse gizo b́ k'onfoni. ³ Ash han P'et'rosnat Yohansn Ik'i moots bokindfere bek't ms'uwatiyo booke b́k'oni. ⁴ Bowere ashman t'iwintsdek't s'iilt boere P'et'ros «Nomaants s'iile!» b́i eti. ⁵ B́iwere booke ik jago b́ daatsituwok'o b́i arere boon t'iwintsdek't b́ s'iili. ⁶ P'et'rosmó «Ambaaronat awntson deshapse, t detstsonmó neesh imetuwe, Nazrettso Iyesus Krstos shúútson tuur sha'owe!» b́i et. ⁷ B k'ani kishonowere detsdek't tuuz b́k'ri, Manoor b́ tufonat b́ mak'tsi gimbon kup'bwutsi. ⁸ Jobk' etnuwere need'b́dek'i, Sha'eferowere bonton Ik'i moots b́ kindi, shaawefetst t'oolefetstnuwere Ik'o udi. ⁹ Ash jamonuwere sha'efetst Ik'onowere b́ udefere bobek'i. ¹⁰ «Sheeng fengesha» ett s'eegef Ik'i maa fengeshi ganoke bedek't giz k'onfo b́i b́ wottsok'o danbok'ri, B́iyatsno wotts keewatse tuutson ayidek't adt dok etbowtsi.

P'et'ros Ik'i mootse b́keew keewo

¹¹ Kashts ashman P'et'rosnat Yohansn atse k'aleratse ett detsdek't b́befere ash asho adt «Solomon ananefoka» eteef beyokoke bo maants wos'fere boami. ¹² P'et'rosuwere ashuwotsi b́

bek'tsok'on boosh hank'owa bíet, Israe'el ashuwotso! Keewanatse tuutson eegoshe it adiri? Noon eegoshe t'iwints dek'at its'iliri? Noo no took kup'on wee noo sheeng fino nofiintsatse tuutson ashaan b́ sha'ituwok'o no k'altsok'o arefa itsha? ¹³ No nihotsko, Abrahamko, Yisahak'ko, Ya'ak'obko Izar Izewer b́ naayi Iyesusi mangire, ernmó it b́n P'ilat'os shinatse beshidek'at it imi, P'ilat'osuwere dab b́n fakshk'ro b́ geere geeratsone it eti. ¹⁴ It S'ayinonát kááwu finetso geeratsone etaat kash údts iko itsh b́bitsetuwok'o it k'oni. ¹⁵ Kash imts wottsonowere it úd'i, Ik'onmó k'irotsé b́n b́ tuuzi, keewansh noo gawu noone. ¹⁶ It bek'iruwonat it dants ashaan kashat b́ kup'íye Iyesus shúútson daatsets imnetiyone, Iyesus shútson b́ amantsatse tuutsonowere it únets shinatse s'een wotts jeeno daatsre.

¹⁷ «Andoor ti eshuwotso! it woor iti jishiruwotskok'o daron it k'altsok'o danfee ¹⁸ Ik'onmó shinshin b́ nebiyi jametswots noonon <Krstos gond bek'o daatso b́n geyife> ett b́aap'ts aap'o hank'on b́s'eentsi. ¹⁹ Eshe it morro itatse b́ t'afitwok'o naandrone err Doonzo maantsan aanooere. ²⁰ Ik'oke it handrit dúro itsh wetuwee, Ik'o shin itsh b́ marat'tso Krstos Iyesusi itsh woshituwe. ²¹ B́ darotse b́ teshet Ik'o shin b́k S'ayin nebiyiwots noonon b́ keewtsok'on dats jamo b́ handrefetsoshee. ²² Musewere hank'o etre, <Doonzo Izar Izewer taan b́ tuuztsok'on mank'o it eshuwotsitse Nebiyiyo itsh tuuzituwe, b́ itsh b́ keewitu jamo k'ewere, ²³ Nebiyi-

3:13 3:13 Kesh. 3:15 **3:14** 3:14 Mat. 27:15-23; Mar. 15:6-14; Luk'. 23:13-23; Yoh. 19:12-15 **3:22** 3:22 Iwi. 18:15; 18 **3:23** 3:23 Iwi. 18:19

man k'ewawu jamo ashotse k'aleyar b́ jamon t'afituwe.» ²⁴ Manats dabt Samu'el dúrtson teshts nebiyi jamwots, dúran jango mank'o keewurne. ²⁵ It nebiyiwotsi naatetuwoots itne, mank'o Ik'o Abrahamsh <ash jamwots nnaaron deretúne> ett nonihotsnton b́ kindts taaro naatetuwoots itne. ²⁶ Mansh Ik'o b́guutso b́ wosh shin shino itshee b́ teshi, man b́ k'aluwere it ik ikon it took gond weeratse aanar it eree iti b́deerishe.»

4

P'et'rosnat Yohansn ayhudiwots moosh mooshif jebats bot'intsook'o

¹ P'et'rosnat Yohansn ash ashosh keewoke bobefere kahniwotsnat Ik'i maa kotfuwotsatsi naashosh aaninuwere Seduk'awiwots bomaants waat ² Wosheets gitetsúwots Iyesus k'irots b́ tuwo ash ashosh bodanitsinat k'irtsuwots k'irots botwitwok'owo kish bokeewutsotse bofayi. ³ Mansh boon dets bodek'iyakon datso ilat b́teshtotse yaatsish b́ borfetsosh tipimoots boteshetuwk'o bok'ali. ⁴ Ernmó bokeewuts keewo k'ebts ashuwotsitse ayuwots amanerno, amants ashuwots taawonwere úts kumo maants dambaan b́ t'iini.

⁵ Yaats guurok'on Ayhudi naashuwotsnat eenashuwotsn, Muse nemo danifwotswere Iyerusalemits kakuwe bowutsi. ⁶ Kahniwots naasho Hananat K'eyafn, Yohansnat Indriyasn, Kahni maa naashwotsatsi k'aabo jag jamwots fa'ano, ⁷ Boweré wosheets gitetsuwotsi botaalotse need'idek't, «Han it k'al eegi angoneyamó kon shútsoneya?» ett boon boaati.

⁸ Manoor P'et'ros S'ayin shayiron s'eent hank'o ett boosh bíaaniy, «It ash ashaatse naashtswotsonat eenashwotso! ⁹ Noo hambets no aateyirwo ash dúr ikosh k'aleets sheeng keewonat awuk'on b́ kashtsok'oniye. ¹⁰ Ashaan kashat it shinatse b́ need'ir, it it jiire Ik'onmó k'írotse b́ tuutzso Nazrettso Iyesus Krstos shútson b́ wottsok'o it únetsnat Israe'el ash jamo dane. ¹¹ It gimbi agfwots gac'at it juuts shútso bí nee, ernmó bí gimbiman tungúshatse shútswotsi kaatsde detset shúts eeno wotere. ¹² Mansha kasho bína bako k'oshon konnor aaliye, noo bín nokashish geyitso Ik'o ashuwotssh b́ imts shútso bíyere okoon dats jamatse konwor aaliye.»

¹³ P'et'rosnat Yohansn aawshuk'on bokeewtsok'o moosh mooshiyruwots bos'íltok'on danaawonat daneraw ash bowoto bo dantsotse bo'adi, Iyesusntonwere bo teshtsok'o danbodek'i.

¹⁴ Kashts ashonwere bonton b́ned'efere bo bek'tsosh boatsats bokeewituwo bot'ut'i.

¹⁵ Mansha moosh mooshifwotsoke úromaants bokeshetwok'o azazat muk'i boteshiyakon hank'o ett boshiyeyi. ¹⁶ «Eshe ashaanotsatse eeg k'aluwono? Adits keewi enan bo kishon b́ fiinetsetse Iyerusalemitse beyiru jamwotsoke danere, mansh keewan haalo falatsonee.

¹⁷ Ernmó ash jamoke ayefere bíamawok'o hanyahak Iyesus shúútso s'eer konshor bo keewurawok'o <it atso korde'ere> erone.»

¹⁸ Manihak s'eegdek't Iyesus shúútso s'eer b́ jamon bodanirawok' kup'idek't boon boazazi.

¹⁹ P'et'rosnat Yohansnmó hank'o et boosh boaniyi, «Ik'osh aleyoniyere itsh aleyo Ik'i

shinatse wotituwaa? Aab it it tookonor angshwere. ²⁰ Nooyere nobek'tsonat noshishtson keewo fal k'ayatsone.» ²¹ Ash ashuwotsatsi naashwotsnat moosh mooshifwots P'et'rosnat Yohansn awuk'on bo fayitwok'o weero t'ut't, ashuwots boshattsotse aaniy sheefat faksh bok'ri, man bok'aluwere ashuwots wotts keewumantse tuitso Ik'o bo udtsosha b'tesh. ²² Adits keewann kashts ashman bí idmeyo hab natoniyere bogka b' tesh.

Woshetswotsnat amantsuwotsn gishewor Ik' bok'ontsook'o

²³ P'et'rosnat Yohansn faksh k'rere bo tohuwotsok boaantsok'on kahniwotsatse naashuwotsnat eenashuwotsn boosh boetts jamo bokeewi.

²⁴ Bowre man boshishtsok'on, ik wotdek't bok'aaro eenshdek't Ik'o maants hank'o ett bokuhi, «Daro, datso, aatsk'aro, boyitse fa'a jamo aztso Doonz eenono! ²⁵ S'ayin shayiron n guutso no nihi Dawit noonon hank'o etaat keewtso neene,

⟨Ik' ash woterawwots eegishe bo shashiri?

Ashuwots eegishe gond finosh datsmec'ron bo k'úmiri?

²⁶ Datsatsi naashwots matseedekt,

Dats k'ezirwots ik wotdek't ko'edek't,

Doonzonat b' Mesihyo ats bo tuwi.⟩

²⁷ «Aron Hirodisnat P'ent'os datsatsi asho P'ilat'os Ik' ash woterawwotsnat Israe'el ashuwotsn kitots ko'edek't nfuuttso S'ayin guutso Iyesus ats botuwi, ²⁸ Hank'o b' wotiye nee shino niangonat ntook shunon n beezts fino s'eetsoshe,

4:24 4:24 Kesh. 20:11; Neh. 9:6; Dub. 146:6 **4:26** 4:25-26
Dub. 2:1-2 **4:27** 4:27 Mat. 27:1-2; Mar. 15:1; Luk'. 23:1; 7:11;
Yoh. 18:28-29

²⁹ Doonzono!, andoor bo sheefirwan s'iile, n guutsuwots bosharaniye aawo shu'ude n aap'o bokewituwok'o woshuwe, ³⁰ N guuts S'ayino Iyesus shútson shodtswots bo kashitwok'onat adits, een een keewwots bo wotitwok'o n kisho jargwe.»

³¹ Ik' k'ono bo ishiyakon ko'edek't bo beyiruwok man shek'e b'wutsi, jamwotswere shayiri S'ayinon s'een bowutsi, Ik'i aap'onwre ááwu shuk'on keewo dek't botuwi.

Shin shni amantsuwots dettso shir bteshtsok'o

³² Amants jamwots ik nibonat ik maac'on detsfno bo tesh, konuworu ash iko, «Haniye tikee» bí eteet keewo deshatsé b' tesh, bo dagotsere jam keewo bo jamets shira b' teshi, ³³ Woshetswotswere Doonzo Iyesus k'irotsé tuwi jango angi eenona bogawefo, jametswotsatsno Ik' s'aati eeno fa'e b'tesh. ³⁴ Datso wee moowo detsts jamwotswere kem dek't b' gizman dek't boweyiruwotse boyitse konworu t'ut'tso aali b' tesh. ³⁵ Gizmano dek'wat woshetswotssh im bok'refoni. Bo ik iketssh boosh b' geyitsok'owa kay bodek'foni.

³⁶ K'op'rsn shuwetso, Yosefi eteetso Lewawi iko fa'e b' teshi, wosheetswotsu «Barnabasi» ett bo s'eegfoni, b' bitsonuwere «Kup'shit na'a» etee. ³⁷ Bíwere b' datso kent b' gizo dek'wat woshetswotssh b' imi.

5

Hananinat Sep'irna

¹ Hnaniyi eteef asho b máátsu Sep'iri eteetsun-ton datso bokemi, ² B máátsunu b danfere dats kemeets gizotse k'atso oorik'rat k'atsonmó dek' waat woshetswotssh imb'k'ri, ³ P'et'rosmó bish hank'owa bí'et, «Hee Ananaiyo! S'ayin shayirats korr datso kemeets gizotse nooridek'etwok'o n nibots Shed'ano eegishe b kindi? ⁴ N kemftserere shino datsman nikoshna b teshi? N kemiyakonor gizo nikoshna b teshi? Eshe, keewan eegoshe n nibots n gawi? N kootiye Ik'atsa bako ashaat-saliyee.» ⁵ Hananiyi b keewts keewuman b shishtok'on diht b k'iri, keewuman shisht ash jamo ayidek't shatbowtsi. ⁶ Jawetswotsu b duuno k'oddek't dek'amt duukbok'ri.

⁷ Keez sa'atonire okoon Hananiyi máátsu b kenihiats bodts keewo b danawo waa bkeshi. ⁸ P'et'rosuwere «Aab taash keewwe it datso it keemts k'awuntso hank'one?» bish bíet. Biwere «Ee! Mank'o gizoshe?» bí'et.

⁹ Manoor P'et'ros, «Ik'i Shayiri S'ayino fadosh aawuk'oneya ik it woti? Hamb! nkenihi duukt aaniru ashuwots fengeshatsnee, Nenowere de'amr duuketunee» bí et. ¹⁰ Biwere manoor b tufishroots dihat k'irbwutsi, Jawetswotswere bokindtsok'on k'irgutsat b befere daatst dek'amt b kenihi ganok duukbok'ri. ¹¹ Ik' mootsi ash ash jamona et keewan shishtuwots ayidek shato wotb'wtsi.

Wosheetwots kishatse wotts milikituwotsnat adits keewwotsn

¹² Adits keewu ayuwotsnat milikituwotsn wosh etsúwots kishona bofinefo b'tesh, jametsuwotswere ik nibon wotde'er Selemón

dada etefokna bokakuwefoni. ¹³ Bonton woterawo ikonuwor dab bonton wotosh ááwu shuuk'fo aali b́ tesh, b́ woteferor ash jamo boon mangya bo mangifoni. ¹⁴ Doonzono! amaniru máátsonat nungushwots botaawo ayidek't ayefera bíamfoni. ¹⁵ Ash ashuwots shodets ayuwotsi weromantsana kishde'er es'onat she'ats bok'eezfoni, mank'o bok'alirwere P'et'ros man weeron bbeshoor b́ s'ilalo dab ik iketsuwotsats bbodishee. ¹⁶ Ash asho Iyerusalem guúratse fa'a kitwotsitse shoodetsonat kim shayiron gondo bek'irwotsi de'erni bowaafó, jametswotswere kasha bokashefo.

Wosheetswots gishewo

¹⁷ Kahni naashwotsatsi k'aabonat bínton teshts Seduk'awino eteefuwots jirwots bojamets okooron s'eent boatsats botuwi, ¹⁸ Woshetswotsi detsdek't tipimoots kindsh bok'ri. ¹⁹ Melakiwotsmó t'ú tipi maa fengesho k'eshdek't boon kishbok'ri, ²⁰ «Ameree! Ik'i mootse need'de'er kashi keewo detsts keewan ash jamosh keewwere!» boosh bíeti, ²¹ Woshetswotswere b́ tzaziyo dek't guuron Ik'i moowots kindek't daniyo dek't botuwi. Manoor Kahani naashwotsatsi k'aabonat bínton beyirwots wáát mooshiru jirwotsnat Ayhudi eenashts jamwots ikok ko'ebowutsi, ashuwots woshetsauwotsi de'er bowetuwok'o tipi moowo maantsan bowoshi. ²² Woshetswotswere tipi moo maantsan wáát woshtsuwotsi bitse daatsratsno, aanat waatnuwere, ²³ «Tipi maa fengesho kup'shdek't is'etsok'on, kotiruwotswere b́ fengshatse need'dek't bokotfere nodaatsi,

tipi maa is'o nok'sheoromó eegoru bítse datsatsone» ett bokeewi. ²⁴ Ik'i moo kotirwotsi jishruwonat Kahanati naashuwots n han boshishor «Eebi keewan naaroni?» ett daand bowutsi. ²⁵ Manoor ash iko wáát «Tipi moots it gedts ashuwots hamb, Ik'i mootse need'dek'tniye ashuwotsi bodaniri» ett boosh b́ keewi. ²⁶ Manoor Ik'i maa kotiruwotsi jishiruwonat b́nton beyiru ashuwotsnton amt boon dek't boweyi, bodoowuwere angnon b́woteraniye dashdek'tniye, han bok'aliye ashuwots boon shútson bojod'awok'o shatniye.

²⁷ Woshetswotsno dek'wat mooshiyruwots shinat bot'intsi, kahani naashonuwere hank'o ett boon bí aati, ²⁸ «Iyesus shútso s'eer it danirawok'o itn kup'shdek'at azazerone b́tेशi, ernmó hamb, Iyerusalemi it daniruwon s'entsk'rerte, itmo ash man k'írotse no aatetuwok'o woshoshe itgeyri.»

²⁹ P'et'rosnat woheets k'oshuwotsn hank'o et boaniyi, «Ashosh aleyoniyere Ik'osh aleyo noosh geyife, ³⁰ No nihotsko Izar Izewer it mitats jittdek'at it úd'tso Iyesusi k'írotse tuuz b́k'ri, ³¹ Ik'o Israe'el ash ashosh naandre etonat bomorrosh oorowe eto b́ imetuwok'o Iyesusi jishiruwonat woritson woshdek't b́ k'ani aaromants mangon b́ beetuewk'o woshre, ³² Keewu man jangosh noo gawunone, Ik'o b́ish aleets jamwotssh b́ imts S'ayin shayiro gawe.»

³³ Moosh mooshiyruwots man bo shisht-sok'on ayidek't fayat woshetswotsi úd'o bogeyi. ³⁴ Ernmó ash ashoke mangiyetsonat Muse

nemo danik wottso Gemaliyali eteets ferisawi wotat moosh mooshif iko tuut woshetswotsi múk' gizewosh úromaantsan bo kishituwok'o boon bíazazi. ³⁵ Manoor mooshiru jirwotssh hank'owa bíet, «Israe'el ashuwotso! Ashaan-otsats it k'aliru keewosh it atso korde'ere. ³⁶ Haniye shin Tewodasi eteets ashó <Taahe ash een taane> ett tuure b́ teshi, awd balok'o ashonwere b́nton ik woterne bo teshi, ernmó b́n úd'niyek'reyi, b́ shuutso shairwotsuwere bad' bowutsi, bí'ettsonuwere shiro boraniyere b́ oori. ³⁷ Maniyere hakon ash ashuwotsi taawets dúron Geliltso Yhud tuwut ay ashuwots b́shuutso bosha'itwok'o b́ woshi, b́nowere úd'eyi, b́ shuuts sha'irwotswere bad'e bobad'i ³⁸ Mansh and taa itsh tietirwo it ashaanotsoke wokar boon k'ay it k'rituwok'owe, asaabiyán wee finan ashoke waaka wotiyal t'afitkee. ³⁹ Ik'oke waaka wotiyalmó boon t'afiyosh falratste, Ikinuwor Ik'onton fayeye itsh wotitwe.» Bowere Gemalyal iztso bodek'i.

⁴⁰ Maniyak woshetswotsi bo maants s'eegdek't bojot'iyi, Iyesus shútsonowere s'eer bokeewrawok'o azazat faksh bok'ri. ⁴¹ Woshetswotsmó Iyesus shútsi jangosh keteyo boosh b́geyitwok'o bodantsotse gene'úwefetst mooshi jeboke kesht boami, ⁴² Aawu aawon Ik'i moonat maa mootsnowere Mesihyo Iyesus jango daniyonat doo shishi keewo ned'iratsno boteshi.

6

Shawat dak'oniwotsi galdek'etsok'o

1 Múk'i boteshtsok'on, amantsuwots taawo ayefere bí amee Grik dats noon keewo keewiru ayhudiwots Yhud datsatse shuwets ayhudiwotsats mumundo dek't botuwi, bomumundiruwere aaw aawon bokenih k'irts maatsuwotssh kayiyeyiruwo batk'o bobatefoshá b tesh. 2 Mansh tatse git wosheetsots amants jametsuwotsi kakuk'raat boosh hank'o boet, «Mish kayiyosha err Ik'o aap' daniyifino k'azo noosh geyiratse. 3 Eshe eshuwotso! bosheeng doyon udetswotsi, S'ayin shayironat danon s'eents shawat ashuwotsi ititse geyore, bonowere finanats naashiwonee. 4 Noomó Ik'o k'ononat Ik'o aap'o daniwosh kup'ituwonee.»

5 Bo ettsan jamwotsi b geneúshi, ashaanot-snowere galbodek'i, boowere imnetiyonat S'ayin shayiron s'eentso Ist'ifanosi, Filip'osi, P'rokorosi, Nik'arona, Timona, P'ermena Ayhudi imnetiyo dek't teshtso Ans'okiya datsatstso Nik'olawosiye. 6 Hanotsi wosheetsots shinats need'i bok'ri, woshetswotsuere Ik'o bok'oniyakon bo kishon-owere boats bogedi.

7 Hank'on Ik' aap'o gawunfere bíamtsotse, Iyerusalemitsi amantsuwots taawo ayidek't ayefere bíamtsotse Kahanatiwotsitsnowere ay wottswots bo amani.

Diyak'oniyo Ist'ifanosi bdetseetsok'o

8 Ist'ifanos Ik' s'aatonat angon s'eent adits keewuwotsnat een een milikituwotsi ash ashuwots dagotse b k'aliri b teshi, 9 Manoor, «Nas' kishitu ayhudiwots Ik' k'oni maa» eteets ayhudiwots Ik' k'oni moowotse ashuwots K'erennat

Iskndriyas ashuwots, Kilk'iyanat Isiyi datsatse ik ik ashuwots tuut Ist'ifanosí k'efoon bo mooshfere boteshi. ¹⁰ Ernmó Ist'ifanos bín b keewiru dani telefo S'ayin shayiro bish b imk bwotsotse bish aaniyo falratsno botesh. ¹¹ Manoor ashaan, «Muse nat Ik'ats c'ashi aap'o b keewfere shishrone» eteet ashuwotsi degon bí ats tuuz bok'ri. ¹² Mank'oon ash ashonat eenashuwotsn Muse nemo danifuwot-snowere biyatsats tuuz bok'ri, Ist'ifanosokowere amt detsdek't moosh mooshiyiruwots shinats bín t'intsbok'ri. ¹³ Biyats kooton gaawit ash ik ikuwotsnowere dek'tboweyi, kooton gawitu-wotswere hank'o boeti, «Ashaan Ik'i mannat Muse nemo jamawa b c'ashfo. ¹⁴ Aaninuwere <Nazrettso Iyesus Ik'i man gaketuwe, Muse noosh b beshits teronowere woniyituwe> ett b keewufere shishrone.» ¹⁵ Manoor mooshi jebatse fa'a jamwots Ist'ifanosí t'iwintsdek't bos'ile b shiitso melaki shitsok'o araat boosh b be'eyi.

7

Ist'ifanos keewuts keewo

¹ Kahniwotsatsi naasho Ist'fanossh, «Eteets keewan arikeya?» eton biaati.

² Ist'fanosuwere hank'o ett bish bianiyi, «Ti eeshuwotsnat tnihotso! aab taan k'ewere! Nonih Abraham Karan datsatse beyosh biamfetsre shino shin Mesp'et'omiya eteets datsatse b befere Mangts Ik'o bish be'eyat ³ <N datsatse

keer, n jagatse k'alyarr, taa neesh t kitsit datsats amee» bí eti. ⁴ Manoor Keledawiyots datsatse kesht Karani eteets datsats be bwtisi, b́ nih b́k'irihakonowere Ik'o Karanitse kisht hambets it beyiru datsanats b́n dek'et b́weyi. ⁵ Wotowabako dab tufi need'okok'o bodts rstiyo b́sh imatse, b́wotefere datsani b́nat b́yere il b́ naarosh rstiyo woshde'er b́metuwok'o taarre b́teshi, b́sh b́taaruwere Abraham na'o b́ detsfetsere shine. ⁶ B́ naaronuwere ash datsatse gooshtsi wotar b́beetuwok'o datsmanat snowere awd bal natosh guuts woshde'er was'o kayde'er boon bokewituwok'o b́sh keewure b́ teshi. ⁷ Manats dabtnwere, «Guuts woshde'er b́ keewit ashuwotsats angshitwe, datsmanatse keer hanoke taan ik'itúne» ett Ik'o keewre. ⁸ Gof ami taaronowere b́sh b́imi, mansha Abraham Yishak'i b́shuwor shimtl aawots gofo b́daamiyi, Mank'o b́ naayi Yisak'i gofo b́daamiyi. Yak'obuwere b́ jir tatse gitetsuwotsi gofo b́damiyi.

⁹ «Yak'ob nanaúwots bo eshuwi Yosefi okoort Gbs' datsatsere gutso b́ wotituwok'o bokemi, Ik'onmó b́ntoniye b́ teshi, ¹⁰ Gond bek' jamotse b́n b́ kishi, Gbs' naasho Fer'on shinatsere baatsonat danitelefo b́sh bi'imi. Naashonuwere Gbs'nat b́ maa jamatse alituwo b́n b́woshi. ¹¹ Manór Gbs'nat Kene'an dats jamatse ayidek't ash kic'its k'ak'i eeno b́ woti, no nihuwotsuwere misho daatsosh falatsne. ¹² Ya'ak'obwere Gbs'itse mááyo b́ beyok'owo b́ shishtok'on tuwreerosh

7:4 7:4 Aze. 11:31; 12:4 **7:6** 7:6-7 Aze. 15:13-14 **7:7** 7:7 Kesh. 3:12 **7:8** 7:8 Aze. 17:10-14; 21:2-4; 25:26; 29:31-35; 18
7:10 7:9 Aze. 37:11, 28; 39:2, 21 **7:11** 7:11 Aze. 42:1-2

nonihotsi manok b woshi. ¹³ Aani gitlo aanat Gbs'i bo amor Yosef b eshuotsesh b tooko b daneyi, jag bowotonúwere Fere'onokere b daneyi. ¹⁴ Maniye hakon Yosef b nihi, Yak'obnat b jag jamo bmandan dek't bweyi, bo bojamet-suwre shabe úts ashno. ¹⁵ Mansh Yak'ob Gbs' maantsan bí ami, bínat no nihwotsn manoke bok'iri. ¹⁶ Bomak'tsonowere Sekem maantsan dek'amt Abraham Sekemn Emor nan'úwotsoke b gizon bkeewts doowots dukeyi. ¹⁷ Ik'o Abrahamsh taart b jangitso wotit aawo b t'inor Gbs'n beyiru ashuwots taawo ayefere bí ami. ¹⁸ Man b wotwere Yosefi danawo k'osh Nugúso Gbs'n b naashefetsoniye. ¹⁹ Handr naash manuwere no ashuwotsats gondo k'úmt no nihwotsats kic'iyó dek't bo tuwi, bo nana'i mar-mat'uwotsno bok'irituwok'o úratse kishde'er bo juwituwok'o, no nihuwotsi bokic'iyi. ²⁰ Manór Muse b shuweyi, bíwere Ik'i shinatse na'i az sheenge bteshi, keez shashonowre bnihi mey-itse b eeni, ²¹ Uratso juu k'irewor Fereon mááts naú k'audekat b naayik'o woshdek'at b ditsi. ²² Musewwere Gbs' datsi dani teleef jamo danbdek'i, b keewiru keewonat b finonowere kup' wotbwtsi.

²³ «Muse hab nato b s'eentsok'on bí eshuwotsi Israe'el nana'úwotsi s'iilo b tuwi. ²⁴ Bí eshuwotsitse ikonuwere Gbs' dats ash ikon t'uk'eyat was'o bkashefere bek't bish b

7:13 7:13 Aze. 45:1; 16 **7:14** 7:14 Aze. 45:9-10, 17-18; 46:27

7:16 7:16 Aze. 23:3-16; 33:19; 50:7-13; 24:32 **7:18** 7:17-18

Kesh. 1:7-8 **7:19** 7:19 Kesh. 1:10-11; 22 **7:20** 7:20 Kesh. 2:2

7:21 7:21 Kesh. 2:3-10 **7:23** 7:23 Kesh. 2:11-15

gatsi, t'uk'eetsmanshowere weero weersht Gbs' dats asho togdek't búd'i. ²⁵ Ik'o b weeron boon b fakshiyituwok'o b jaguwots t'iwints bodek'etuwok'owa bish araatni b tesh, bomó t'iwintsratsno. ²⁶ Yaats guurok'onowere Israe'el ash gitetsuwots bo atsatseyo bo fayefere daatsdek't bonbaziyo geeyat <It ashuwtsó! itwo eshu itnere, eegishe itfayeyiri?> biét. ²⁷ B tooho togiru ashman Museyi okaan gifnit <Neenmó noon alituwonat noatse angshituwo kone nee wosh? ²⁸ Oots Gbs' dats asho núd'tsok'o taanowere úd'osh geefiya?> biét. ²⁹ Muse man bshishtok'on Gbs'itse kesht Midiyam dat-somants amt gooshtsi wotat bbeeyi, Manoke nungush nana'a gituwotsi bshuwi.

³⁰ «Muse datsmanatse hab nato bbeshiyakon Debre Sin woruwotse aat'iru t'ugi atatsi tawi laluwotse melaki iko bbe'eyi. ³¹ Muse man bbek'tsok'on bíadi, karndek't bs'iilorowere hank'o etiru Doonzo k'aro bshishi, ³² <Taahe nnihotsko Izar Izewer taane, Abarhamko Izar Izewer, Yisahak'ko Izar Izewer, Yak'obko Izar Izewer taane,> Muse were shatoon k'ewubwutsi, s'iloshowere aawo shu'atse. ³³ Doonzonuwere hank'o b eti, <N ned'iruwok man S'ayin datso b wottotse n tufitsi c'aamo kishuwe, ³⁴ Gbs'itse fa'a ti ashuwots weralo gond bo bek'iruwok'o bek're, kic'at bo kuhirwono shishre, mansh boon kashiyosh oot're, andoor wowe! taa neen Gbs'its woshona.>

³⁵ «Israe'el ashuwotsu Musesh <Neen noats altsonat angshituwon woshitso kone?> Eton bin

k'efatni botesh, wotowa boko t'ugi atatse b́ish be'ets melakiyo jangon alituwonat nas' kishituwon woshdek't bomandan b́in b́ woshi. ³⁶ Gbs'nat Aats k'ar birokere aditsonat milikito finat b́i ashuwotsi kish dek't hab natosh dats woruwotse jishtso Museyiye b́ teshi. ³⁷ <Doonzo Izar Izewer taan b́ tiztsok'o mank'o it eshuwotitse nebiyiyo itsh tuuzitwe> ett Isra'el ashuwots keewutso Museyiye b́teshi. ³⁸ Woruwotse kakuwedek't teshts ashuwotsntonat Sin guri abaatse keewuts Ik'i melakiyonton animank'o no nihotsnton teshtso b́ine. Ik'o keewuts kash imetu aap'o noosh beshitsonuwere un b́ine Museyiye.

³⁹ «No nihots b́ina bok'efibako b́ish alerat-snee, Bonibotsnowere Gbs' maants aano bo gawi.

⁴⁰ Aronshowere <Noon Gbs'itse kishts Muse han eeg b́iyats bodtsok'o no danawotse noshin shinatse sha'arr noon jishituwo Izar izewerotsi noosh doozwe> bo eti. ⁴¹ Manór manz aron dozets Ik'o doozdek't b́ish woshó bo t'intsi, bokishi finonowere bogenee'úwi. ⁴² Ik'onmó boatse k'aleniye b́wutsi. Daritsi k'eenwotssh bo ik'ituwok'o boon beshidek't b́imi. Manwere Nebiywotsn hank'o ett guut'etsok'one,

<It Isra'el ashuwotso!

Shúkeets gizonat woshon

Hab nati s'eenosh woruwotse it t'intstasheya?

⁴³ Dek'at it amtso Molok gofonat

Refani eteef k'enon it arits it ik'oniye b́ teshi,

Bowere it kishon findek'at,

7:36 7:36 Kesh. 7:5; 14:21; Taaw. 14:33 **7:38** 7:38 Kesh. 19:1—20:17; Iwi. 5:1-33 **7:40** 7:40 Kesh. 32:1 **7:41** 7:41 Kesh. 32:2-6 **7:43** 7:42-43 Amo. 5:25-27

It boosh it boosh sagadat it teshts
ik'irwotsiye,
Taawere Babloniye ok it gishetuwok'o woshi-
tuwe.»

⁴⁴ «No nihots woruwotse gawi gofu detsfne
b teshi, gofmanuwere Ik'o b keewutsok'onat b
kitstsok'o bin fintso Museyiye b teshi. ⁴⁵ Ik'o
boshinatse b gishts Ik' ash Woteraw ashuwots
datso bo nator no nihots bodek'ts gofani Iyasun-
ton manok bo kindshi, Dawit dúro b borfetsosh
manoke b beyi. ⁴⁶ Dawituwere Ik' shinatse
baatso daatst Yak'ob Ik'o Izar Izewersh k'ewok
wotit moo agosh Ik'o b k'oni. ⁴⁷ Ernmó Ik'í maa
agtso Solomoniye.

⁴⁸ «Bwoteferor jam falts Ik'onmó ash kishon
ageets moots beerake, manwere Nebiyon hank'o
ett guut'etsoniye,

⁴⁹ <Daro t be jooroniye,

Datsonuwere t tufi ned'oke,
Eshe ááwu naari mee taash it agetuwoni?»

<Bíyok t kashituwokonu awuk'one?» Etfé
Doonzoni.

⁵⁰ <Jaman taa t kishon t finkoshna?» Bíeti Ik'oni.

⁵¹ «It wed'etswotso it nibo is'etswotso! it k'el
kúp'uwotso! it niuwotskok'o jam aawo S'ayin
shayiro it k'efiri. ⁵² Nebíyiwotsitse it nihots bo
gisherawo kone fa'oni? boowere kááw finetsman
b weetuwok'o shin keewutswotsi bou'd'i, It were
and kááwu finetsan beshidek' imaat it úd'i. ⁵³ It
Ik'i melakiwots weeron Muse nemo dek'at it
teshi, ernmó kotde'atste.»

7:44 7:44 Kesh. 25:9; 40 **7:46** 7:46 2 Sam. 7:1-16; 1 Zen.
17:1-14 **7:47** 7:47 1 Naash. 6:1-38; 2 Zen. 3:1-17 **7:49**
7:49-50 Isa. 66:1-2

Ist'ifanos shútson jot'eyat bk'irtsok'o

⁵⁴ Mooshiru jirwots han boshishtsok'on nibo k'únbowutsi, Ist'ifanosi fayat bí'ats gasho bo shas'i. ⁵⁵ Ist'ifanosmó S'ayin shayiron s'eent daro maantsan kawudek't s'iilt, Ik'i mango darotse bbek'i, Iyesus noowere Ik' k'ani aaromadan b need'efere b bek'i, ⁵⁶ Eshe «Hambe, daro k'eshe b gwutsere ash na'o Ik'i k'ani aaro maantsan b need'efere t bek'iri» bí eti. ⁵⁷ Manoor bo k'aari eenon bo kuhi, bo waazono is'dekt ik wotdek't b maantsan bowos'i. ⁵⁸ Kitotsno kishdek't shútson bo jot'i, gawuwotsuwre bo shemo dek'amt Sa'oli eteets jawets iko b kotetwok'o b tufi shirots ged bok'ri. ⁵⁹ Shútson bín bo jot'fere, Ist'ifanos, «Doonzo Iyesuso! t kashu k'aaú de'e!» ett b k'oni. ⁶⁰ Tuk'umaldek't, «Doonzono! bo morran boats taawk'aye!» ett k'aari eenon kuhat man etnuwere k'ir bwutsi.

8

Sawol kirstiyanuwotsi bgishtsok'o

¹ Sawoluwe Ist'ifanosi úd'ewor bontoen ik wotatni b teshi, Ist'ifanos b k'irts aawots Iyerusalemn fa'a Ik' k'oni moowu ats gisheyewo tuu bwutsi, woshetswotsiyere okoon amants jamwots Yhudnat Semariy awurajo maantsan bad' bowutsi. ² Ik ik shayirets ashuwots Ist'ifanosi boduki, káári eenono kuhat bish bo eepi.

³ Sawolmó Ik'i moo t'afiyosh kaarefetstni bteshi, mootsere moots kindt nungushuwotsnat máats amantsuwotsn geetsdek' waat tipi moots b kindishiri.

Doo shishiyo semariyitse nabetsok'o

⁴ Bad'wutsts amantsuwotsuwere bo amts jamoke Ik'i aap'o bodanifo. ⁵ Filp'osuwere Semariy kito maantsan amt ashuwotssh Mesihiyο jango b̄ dani. ⁶ Ashuwotswere Filip'os keewuts keewo bo shishor b̄ finiru adits keewuwotsi bo bek'tsok'on ik nibon t'iwintsdek'tni bo k'ebiri. ⁷ Kim Shayirotsuwere k'áári eenon kuhat ay ashuwotsitse bo keshfo, durwotsnat shoklirwotsn kasha bo kashefo. ⁸ Mansh kit manitse een gene'o b̄ woti.

⁹ Kit manitse Sm'oni eteets ash iko fa'e b̄ teshi, ashman kitotse b̄ danon finat Semari ashuwotsi aditniye b̄ teshi, «Taa een ash taane!» ettni b̄ keewfo. ¹⁰ Ash jamo múk'onu eenonu «Ashaan ashi eene ett b̄ s'egeyir Ik'i angone!» ett t'iwintsdk't bo k'ebfoni. ¹¹ T'iwintsdek't bo k'ebiruwere ay aawosh danon ashuwotsi adit b̄ teshtsotsne. ¹² Ernmó Flip'os Ik'i mengisti jagonat Iyesus Krstos shútson b̄ keewuts doo shishi keewo bo shishor nungushwotswere máatsuwotsuwere amanat bo gupeyi. ¹³ Smonuworu b̄ oreraniyere amanat b̄ gupere Filp'osntonu ik wotbwtsi, b̄ finiru adits keewwot-snat milikituwotsn bek't b̄iádfera b̄ teshi.

¹⁴ Iyerusalemitse fa'a wosheetsots Semari ashuwots Ik'i aap'o bodek'tsok'o boshishtsok'on P'et'rosnat Yohanisn Semari datso maantsan bo woshi. ¹⁵ Semari ashuwots S'ayin shayiro bo daatsituwok'o P'et'rosnat Yohanisn amt boosh Ik'o bok'oni. ¹⁶ Semari ashuwots Doonzo Iyesus shútson bo gupeyi bako S'ayin shayiro konatsoru od'atse b̄ teshi. ¹⁷ Mansh P'et'rosnat Yohansn bo

kisho boats bo gedor ashuwots S'ayin shayiro bo dek'i.

¹⁸ Wosheetswotsu boats kisho bogedor S'ayin shayiro ashuwotssh b imestsok'o Simon b bek'tsok'on gizo dek'wat, ¹⁹ «Taa t kisho boats tgere ashuwots S'ayin shayiro bodek'etuwok'o alan taash imere» bí eti.

²⁰ P'et'rosmó hank'o bíeti, «Ik'i imo gizon daat-sosh n gawutsotse n gizo neenton t'afuwe! ²¹ N nibo Ik'i shinatse kááwu woto b k'aztsotse nee keewanitse kayo wee bano deshatsne. ²² Eshe n gond finansh shiyandar naandre eree, daneraka n nibitsi gond finan orowa eteetwe wotiyal aab Ik'o k'onuwe. ²³ Neehe s'aam okooron ns'eentsok'onat morron tipek n wotok'o taa bek'iruwe.»

²⁴ Sm'onuwere «It keewutsanitsere ik jago ti ats b borawok'o it it tookon taash Ik'o k'onuwere» bí eti.

²⁵ P'et'rosnat Yohanisn bo gawiyakonats Doonzo aap'onwore bo keewiyakon Semari gal aywot-sitse doo shishiyo nabfere Iyerusalem maantsan bo'ani.

Flip'osnat Itiyopiya ash ikon

²⁶ Doonzo melakiyo Filip'ossh, «Tuur Iyerusalemiyere Gááz maants damiru weeron Muur maantsan amee» bí eti, weer manuwere woruwi weere b teshi. ²⁷ Bíwere tuut bíami, manno, Itiyop'iyi dats naash iko Ik'o k'onosh Iyerusalem maants amt b tesh, ashaan Hndeki eteets Itiyop'iyi Nugúsúsh b dets jamatse bish fintsonat b gizatse altsoniye bteshi, ²⁸ Bí b

datsomants bíaanefere seregelats* bedek't nebiyiyo Isayas mas'afoni b nababefe btesh.
 29 Manóóri sa'aton S'ayin shayiro Filip'osi «Seregel manok t'iinr binton gonkeewe» bíet.
 30 Mansh Filip'os bíyok wos'fere amt Itop'iyi dats ashman nebiyiyo Isayas mas'fo b nababefere shisht «N nababiruwo b biitso neesh galiruwa?» bí et.
 31 Itiyop'iyi dats ashonwere «Taash biishde'er keewituwo aalo taash aawuk'oneya gaalo b faliti?» bíet.
 32 Bí b nababiru mas'aafi beyokonuwere hani b tesh,

«Bí shukosh jokeyiru mererok'oyiye b teshi,
 Mererna'o bs'iro k'ut'ewor s'ik bí etfok'o,
 Bíwere keewosh bnono aawu'atse.

33 Bíhe keteree, kááwu angshonowere bish imeratse,
 B kashu datsatse k'aaúbazetsotse
 B s'ooti jango kone fal keewiti?»

34 Naashmanuwere Filip'ossh, «Nebiyiyo han bkeewu kon jangoshe? B took jangoshemo wee k'oshi jange? Oona neesha aab taash keewe» bí eti.
 35 Filip'oswere S'ayin mas'afanatse tuut Iyesus jangosh dooshishiyo b nabi.
 36 Boamferowere aats beyok bobodi, naashmanuwere «Hamb, hanoke aatso fa'ee, tguferawok'o taan bazitu keewo eebi?» bí eti.

37 Filip'oswere «N nibi s'eenon ni'amaniyal gupewo falfne» bí eti. Naashmanwere «Iyesus Krstos Ik'o naayi b wottsok'o amaniruwe» b eti.

* **8:28** 8:28 Seregela: Eto gáári arts farshon geetsf kes'oor bí ats kede ameefoni. **8:33** 8:23-33 Isa. 53:7-8

³⁸ Naashmanuwere seregelo b́ ned'iyetuwok'o bíazazi, Bogitetswere aatso maantsan oot't amt bo eree Filip'os Naasho b́ gupi. ³⁹ Aatsotse bokeshiyakon Doonzoko S'ayin shayiro Filip'osi k'aaúbdek'i, janderbonuwere aani gitlo be'atse, b́woteferor geneúwefets b́weero sha'o dek't b́tuwi. ⁴⁰ Filip'osmó Azat'ositsne b́ daatseyi, K'isariyi maantsowere b́ wafetsosh kit kitotse sha'at dooshishiyo b́ nabfoni b́teshi.

9

Sa'ol Krstosi bí amantsok'o (Wosh. 22:6-16; 26:12-18)

¹ Manoor Sawuol doonzo danifuwotsi úd'osh naakefere kahaniyots naashok bíami. ² Doonzo weerindion shairu ashuwotsi nungushwotsno máátswotsno b́ daatsor tifde Iyerusalem maants de'er woo b́n faliyit debdabeyo guud'de Demask'oyitsi ayhudiwots Ik' k'oni moowwots sh b́sh imetwok'o kahini naash naasho bí aati.

³ Amfetst Demask'o maants b́ t'intso'k'on b́ gúúratse gawerawon darotse shááno gol b́wutsi.

⁴ Manoor datsats dih́wutsi, «Sa'olo! Sa'olo! eegishe taan ngishiri?» etiru k'aaro b́shishi.

⁵ Sa'oluwere «Doonzono! kone nee?» bí eti, bíwere «Taahe nee ngishiruwo Iyesus taane, b́n kosheef birro n k'efiyale neeshe iki b́gonditi,*

⁶ Eshe, and tuur kitots kiduwee, bíyoke k'alo neesh geyituwonowere manoke neesh keewetuwe» bí eti.

* **9:5** 9:5 Ik ik Latini bitsetswots shiki shashats nned'iyal neesh b́gonditi etfne.

⁷ Sa'olnton amfetst teshts ashuwots k'aaro shishfetst konnor bobbe'awotse bo keewituwo t'ut't s'ik ett need'bowutsi. ⁸ Sa'oluwere b́ dihtsoke b́ tuwi, bí aawwotsi b́ k'eshormó bek'o falratse, mansh ashaashwots b́ kisho dets dek't jishfere Demask'o maants dek't boam. ⁹ Keez aawu s'eenosh eegor bek'o b́ falrawo, b́ marawo, b́ úyawo b́tesh.

¹⁰ Manoor Demask'on Hananiyi eteefo Iyesus danif iko fa'e b́tesh, doonzo bek'on «Hananiyo!» ett bs'eegi bíwere «Hamb taane, doonzono!» bí et.

¹¹ Doonzonu hank'o bíeti, «Tuur kááwi eteyiru werindu maants amee, manokno Yhud mootse Sa'oli eteetso T'erses asho gewowe, bíwere and Ik' k'onoke b́ fa'oni.» ¹² Sa'oluwere bí ááuwuwots aani bek'o hofalituwok'o Hanani eteets asho bíyok kindt b́ kisho bíyats b́ gedfere bek'on b́ bek'i.

¹³ Hananiyuwere hank'o ett bíaani, «Doonzono! ashaan Iyerusalemitse beyiru amantsuwotsats ay gond keewo b́fintsok'o ayuwotsoke shishre. ¹⁴ Manoknowere n shúts s'eegiru jamwotsi tiposh kahni naashuwotsoke alo dek're.»

¹⁵ Doonzonuwere Hananiysh hank'owa bíet, «Bí t shútso Ik' danawu ashuwots shinatse, naashuwots shinatsnat Isra'el ashuwotssh danituwoniye, bí t k'ac'i sheengo b́ wottstotse bíyok amee, ¹⁶ T jangosh awuk'o gondbek'o b́dek'etuwok'owo kitsituwe bísha.»

¹⁷ Mann Ananiyi maa man maants amt b́ beyiru mootsowere b́ kindi, b́ kishonowere Sa'olaats geddek't, «Ti eshu Sa'olo! hanmand

n wafere weratse ni ats be'etso Doonzo Iyesus aani bek'o n falituwok'onat S'ayin shayiron n s'enetuwok'o niyok taan woshere» bí eti.
¹⁸ Manorowere k'ok'r arts keewo bí ááwatse fed'at bí eree bek'o bfali, tuutnwere bgupeyi.
¹⁹ Meetwo b meeyihakon kup'bwutsi, Demask'on teshts Iyesus danifuwotsnton muk' aawwotssh manoke b teshi.

Sa'ol Demask'on b'danitsok'o

²⁰ Manorowere Sa'ol Demask'on «Iyesus Ik'o naayiye» efere ayhudiwots Ik' k'oni mootse daniyo b tuwi.

²¹ Shishts jamwotswere, «Ashaan Iyerusalemitse shútsan s'eegiru jamwotsi t'affoniyosha? Hanok bwowuwere boon tifde'er kahni naashuwotsok de'er amooshosha?» ett bo'adi.

²² Sa'olmó iki kup'efere bí ami, Iyesus mesihiyo bwottsok'o keewut Demask'oyitse beyat teshts Ayhudiwots noono bo keewituwo kt'ut'ifoni b tesh.

²³ Ay aawoniyere il ayhudiwots Sa'oli úd'osh boshiyeyi, ²⁴ Bímó gondon bíats bo shiyetsman daník'iri, boowere bín úd'osh t'uwe aawo b keshf fengshuwotsi bo kotfoni. ²⁵ Ernmó t'úwon b danifuwots Sa'oli oshots geddek't gimbiyi múlotse maskotiyon oorsh bo k'ri.

Sa'ol Iyerusalemn

²⁶ Sa'ol Iyerusalem maants bíamor manoke fa'a Iyesus danifuwotsnton eeho bgeyi, bomó bí Krstosi bí amantsok'o arik boosh arewo b

k'aztsotse bojamets bín boshati. ²⁷ Bernabasmó Sa'oli woshetswotsok b́ t'intstre weeratse bbefere doonzo bísh b́ be'etsok'onat bín noono b́ keewitsok'o, Iyesus Shútsonowere Demask'on ááwu shuuk'on b́ danitsok'o boosh b́ keewi. ²⁸ Mansh Sa'ol bonton wotdek't Iyerusalemitse bíananefo. Doonzo shútsonowere ááwu shuk'on b́ dani-foni. ²⁹ Grik dats ash noonon keewuf ayhudi-wotsnton keewefetstni b́ mooshfo, bomó bín úd'osh k'anwutskno botes. ³⁰ Eshuwots man dan bok'rtsok'on K'isariy maants k'az dek'boami, manoknowere Terses maants k'aybíametuwok'o bowoshi.

³¹ Yhuditse, Gelilitsnat Semaritse fa'a jam Ik'i moowu jeeno datsrane, kúp'onowere kup'eraniye, Doonzono! mangiyifetsat S'ayin shayirawere kup'efetsat taawon eenrane.

P'et'ros Lidnat Iyop'en

³² P'et'ros dats datsatse gúúroke b́ befere Ldiyn beyiru amantsuwotsok bíami. ³³ Manoknowere shmt nati s'eenosh es'atse k'eets Eniyi eteef duro daats b́de'k'i. ³⁴ P'et'rosuwere «Eniyo! Iyesus Krstos neen kashituwe, tuur níees'o ec'ee!» bí eti. Bíwere manoor k'az btuwi. ³⁵ Ldaanat Saronon beyiru jametsuwots bín bek't doonzo maants k'az boaani.

³⁶ Iyop'e datsatse T'abiti eteefu amants iku fa'a b tesh, Griki noonon Doork'ayi eta, b́ biitsonwere t'it'a etee, biwere sheeng keewo k'alonat t'owwotssh úni aawu imf máátsi btesh, ³⁷ Manoor bi shodat b k'iri, mashdek'tnuwere dadiroitse danbani gaad'ots bin gedbok'ri. ³⁸ Ldi Iyop'esh karn bteshtsotse Iyop'eyitse fa'a Iyesus

danifwots P'et'ros Lditse b́ fa'ok'owo shisht «Oona muk'i nteyawo noosh kaari waa boree» et git ashuwotsi bíyok woshbok'ri. ³⁹ Mansh P'et'ros tuut wosheetsuwotsnton b́weyi, b́ bodtsook'onowere dambani maa gáádots dek't boami, bo kenih k'irts mááts jametso b́n guurdek' need' dek't eepfetst Doork' bonton kashon b beyor bwozits faaruwotsnat tah tahuwotsi b́sh bokitsiri botesh, ⁴⁰ P'et'ros jametsuwotsnor úratse kishk'raat tuk'maldek't Ik'o b́ k'oni, duuno maantsowere aandek't «T'abitee! tuwwe!» bíeti, biwere bi ááwwotsi wogdek'at P't'rosi b s'iili, tuuwatnu beebdek'i. ⁴¹ Bíwere b́ kisho jargt bin detsdek't b́ tuuzi, bo kenih k'irts máátsuwotsnat k'osh máántsuwotsi s'egdek't náú kashon bo shinats b́ t'intsi. ⁴² Keewanuwere Iyop'e dats jamatse b́ daneyi, ay ashuwotswere Doonzon boamani. ⁴³ P'et'ros Simo'oni eteets gook' shik'iru ikonton ay aawosh Iyop'en b́ beyi.

10

P'et'rosnat K'orneliyosn

¹ K'isari datsatse befo K'orneliyosi eteets ash iko fa'e b́ teshi, bíwere Rom datsatsi kes'fuwots shirotse «It'aliy brgediya» eteyiruwotse bali naasha b́ teshi. ² Bíwere b́ maa ash jamonton Ik'o shattsonat Ik'a b́ Ik'ifoni b́ teshi, ayhudyotsi tugretsuwotsno b́ tep'foni, Ik'o mantso jam aawosh b́ k'onfoni. ³ Ik aawu jed'i sa'atok'on melakiyo bíyok t'int «K'orneliyoso!» ett b́ s'egfere shants bek'on b́ bek'i.

⁴ T'iwints dek't Ik'i melakiyo maants s'iilt tek'on «Doozonon! eebi b naaroni?» bí eti.

Melakiyonu bish hank'o bí eti, «Ik' n k'ononat t'owwotsi n tep'iruwok'o bín neen gawetuwo Ik'i shinats t'inre, ⁵ Ando ashuwotsi Iyop'e maantsan woshar P'et'rosi eteyiruwo Smoni s'egiwe, ⁶ And bihe ats k'ari ganoke fa'a gook' shik'iruwu Smon meytse ib wotatniye b beyri.» ⁷ Han keewts melakiyo biatse k'aleyat biamtsok'oon K'ornoliyos b mootse fiinefneg gitetsuwotsnat biats t'intse wotaderwotsitse Ik' shatf iko s'eegdek't ⁸ Jam keewonowere boosh b keewiyakon Iyop'emaants boon bwoshi.

⁹ Yaats guurok'on bo amt kitok bot'iints shirt sa'atok'on P'et'ros b beef moo abaatse gaad'otse Ik'o b k'onfera bkeshi. ¹⁰ Manorowere P'et'ros k'ak'wutsat ik keewo moosh b geyi, aawu mishonu k'aniyeyirwok'o bek'on bí ats bbe'eyi. ¹¹ Bbek'ts bek'onuwere Daro k'eshebwutsere awd kaaton detsdek'ets eents taho arts keewo datsats b oot'fera. ¹² Man abatsnowere k'osh k'osh naari s'ootswots bogeroon geetseyiru azeetsuwotsnat darotse bidiru kafuwotsuwere tahmanitse fa'ano botes. ¹³ Manoor «P'et'rosoo! Tuur Shuh de'er moowe!» etiru k'aaro bshishi.

¹⁴ P'et'rosmó «Doozonon! woteratse! Taa s'ayin woterawo wee kim keewo maa danak-tane» bit.

¹⁵ Ando aaninuwere «Ik'o s'ayin bwoshtso, kima eto neesh geyiratse» Etiru k'aaro aaniyi bshishi. ¹⁶ Manuwere keezoto bwotiyako tah arts keewuman manoor Daromaants k'aaudek'eyi.

¹⁷ P'et'ros bek'an biitso «Eegek'una bwotiti?» Etfetst b nibots b kic'efere K'ornoliwos

woshts ashuwots aatt Sim'on moo daatsdek't
 bfengeshats boned'fere botesh, ¹⁸ S'eegtnurewe
 «P'et'rosi eteefo Sim'on ib wotat beyiruwo
 hanokneya bfa'oni» ett bo aati.

¹⁹ P'et'ros bek'i keewuman biitso gawoke
 bbefere S'ayin shayiro bish hank'o bieti, «Eshe
 keez ashuwots neen geefne, ²⁰ Tuur ood'e, boon
 woshtso taa twottsosh hake baka nieraawon
 bonton amee.» ²¹ P'et'ros were oot't ashuwot-
 sok amt, «Eshe, Itgeyiru asho taane, eegoshe
 itweyi?» bí eti. ²² Bowere «No noweyiye bali
 naasho K'ornelewosokne, bihe Ayhudi ash ash
 jamwots bo mangiyiru Ik'i ash dooniye, neen b
 moots s'eegiyir n etetuwo b k'ebetuwok'o S'ayin
 melakiyo bish kitst keewure» bo et. ²³ P't'rosu
 moots boon kindsht bí ibiyakon k'ondek'tnuwere
 b k'eezi.

Yaatsok'onowere tuut bonton bíami, Iyop'en
 fa'a eshuwotsitse ik ikuwots binton boami. ²⁴ Gitl
 aawotso K'isari bo bodi, K'orneliyosu b jaguwot-
 snat bíats t'int b tohuwotsi s'eegdek't P'et'rosi
 bkotiri. ²⁵ P'et'ros moots b kindor K'orneliyos
 býok t'int b tufi shirots dihit bin b k'oni.
²⁶ P'et'rosmó «Tuuwe! Taa neenk'o ash taane!»
 ett b tizi.

²⁷ Binton keewefetst gitso maants b kindor ay
 ashuwots ko'edek't bo befere b daatsi. ²⁸ Bosh
 hank'o b eti, «Ayhudi wotts ashosh k'osh ashon-
 ton ik wotonat bmoots kindo nemo b bazitsok'o
 itworu it tookon danfte, ernmó konuworu s'ayin
 woterawo wee kima ti erawok'o Ik'o taash kitsre.
²⁹ Mansh taash woshewor ik k'efalo tweyi, eshe
 eegosh taan it s'eegtsok'owo danosh geefe.»

³⁰ K'orneliyosu hank'o bíeti, «Awd aawoniye shin ewaar jed'i sa'aton t mootse Ik'o tk'onfera t teshi, eshe, tgawraniye ik asho goliru taho tahedek't t shinats b need'i, ³¹ Hank'owere taash bí eti, <K'orneliyoso! Ik'o n k'ono shishre, t'owwotsi ntep'irwo gawure, ³² Eshe Iyop'e maants ashuwotsi woshar P'et'rosi eteyiruwó Sim'oni s'egiwe, bíwere ats k'ari ganoke fa'a gook' shiik'fo Simon mootse ibo wotatniye b beyiri,> ³³ Mansh manoor wosheets ashuwotsi niyok twoshi, neewere n waatsotse sheenge nfini, eshe Ik'o nkeewituwok'o neesh keewuwe bietts jamo shishosh noúnets Ik'i shinatse hanok kaku weerone.»

P'et'ros keew keewo

³⁴ P'et'ros hank'o ett keewo dek't btuwi, «Arikon Ik'o asho ashaatse b bogabogshrawok'o t'iwintsdek'ree, ³⁵ Aawoki dats asho bwotiyalor Ik' sharr kááwu keewo b finitka wotiyal Ik'o bín k'ebetuwe. ³⁶ Ik'o aap'tso Isra'elsh bwooshtsok'o daneke, Jami doonzo Iyesus Krstosn jeeno nabfere b waawere boshee. ³⁷ Yohans gupi jango nabo b tuutsortson Gelilitse tuut Yhud dats jamatse wotts keewo danfte.

³⁸ «Dabtnu Ik'o Nazrettso Iyesusi S'ayin shayiron b futtsok'onat angono b imtsok'o danfte, Ik'onuwere binton b fa'otse bíwere sheeng keewo finefere Dabilosn detsets jamwots kashifere b gúuri.

³⁹ «Yhud gat'eriyotsnat Iyerusalem kitotse b k'alts keewu jamosh no gawu noone, bomó

bín mitats jitdek't bou'd'i. ⁴⁰ Ernmó Ik'o keezl aawots k'irotsé tizt b́ be'etuwo'k'o b́ woshi. ⁴¹ B́ be'ewwere shin shnon Ik'on marat'ets gaw-wotssha bako ash jamoshaliye, bíwere k'irotsé b́ tuwiyakon no bonton iknon maat úshats gaw-wots no nee, ⁴² Keewuhan ashuwotssh no shishituwok'o bíwere kashetswotsnat k'irtsuwotsats bíangshituwo'k'o Ik'oke naashiyetso b́ wottsok'o no gawituwok'o noon azazere. ⁴³ Bín amanitu jamo b́ shútson morrosh oorowe eto b́ daatsituwok'o nebiyi jamwots bísh gawitune.»

Ik'i ash woterawwots amanar S'ayin shayiro bodek'etuwo

⁴⁴ P'et'ros man b́ keewor b́ keewiruman shishts ash jametsuwotsats S'ayin shayiro b́ oot'i. ⁴⁵ P'et'rosnton waatsuwots gof amts ayhudiwotsitsi Krstiyaniwotsitse Ik'o Ik'i ash Woteraw ashuwotssh S'ayin shayiro b́ imtsok'o bo bek'tsok'on bo adi. ⁴⁶ Ik'i ash Woteraw ashuwotssh S'ayin shayiro imetsok'o dantsuwotswere handr noon keewon keewufetst Ik'o údon bo-mangifere bo shishtsotsna. Manoor P'et'ros ⁴⁷ «Ashaanots nokok'o S'ayin shayiro dek'reene, béré, bo aatson boguperawok'o kone baziti?» ett b́ keewi. ⁴⁸ Mansh Iyesus Krstos shútson bogupetuwo'k'o bíazazi, Maniyere il P'et'ros bonton muk' aawwotssh b́teshetuwok'o bok'oni.

11

P'et'ros eegosh Ik' ash woterawwotsok bíamtsi jango b́keewtsok'o

¹ Yhud datsatse fa'a woshetswotsnat eshuw-wotsn Ik' ash woterawwots Ik' aap'o bo dek'tsok'o

bo shishi. ² P'et'rosu Iyerusalem maantsan aanat b'keshor gof amo geyk b' wotok'o amaniru ay-hudiyots, ³ «Egish gof amaawu ashuwots meys kindat bonton nmeyi?» ett bín bok'oori. ⁴ Ernmó P'et'ros wotts jamo hank'o ett ik ikon keewo dek't b'tuwi.

⁵ «Taa Iyop'e kitotse Ik' k'onatse tbeefere bek'o tbek'i, t bek'tsonúwere een magaraji arts keewo awd kaaton detsdek'ere darotse oot't tiyok b' weyri, ⁶ Bínowere t'iwints t s'iile magaraji tahotse Gizuwotsnat dini s'otswotsn, datsatse getseyiruwotsnat daaratse bidiru kafuwotsi t bek'i, ⁷ <P'et'roso! tuur shuhuder moowe!> etiru k'aaro tshishi, ⁸ Taamó <Woteratse Doonzono!! s'ayin woterawo wee kim wotts keewo b'jamon tnonots ger danaak taane> tieti. ⁹ Ernmó gitlo, <Ik'o s'ayin b' woshtso nee kima eto neesh geyiratse> etiru k'aro darotse taash bíanere t shishi. ¹⁰ Hanwere keezoto b' wotiyakon tah arts keewuman jamon daro maantsan t'op'e b'wutsi. ¹¹ Manoor K'isariyon tiyok wosheets keez ashuwots taa t beyiru moowok waat bobodi. ¹² Hake baka t eraniyere bonton t ametuwok'o S'ayin shayiro taash b' keewi, eshu shirtanotsu taantoniye bo faoni b' teshi, bonton iknon am-atnuwere K'orneliyosi eteyiru asho moots no kindi. ¹³ Bíwere melakiyo b' mootse b'ned'efere b' bek'tsok'on <Iyop'e maantsan asho woshar P'et'rosi eteyiruwo Sm'oni s'eegiywe, ¹⁴ Bíwere neenat nmaa ash jamo b' kashit aap'o itsh keewituwe> b'iettsok'o noosh b' keewi. ¹⁵ Taawere keewo dek'at t tuure S'ayin shayiro shini noats

ǃ ot'tsok'o boatso ǃ oot'i. ¹⁶ Manoor <Yohanis aatson ǃ gupi, itmó S'ayn Shayiron gupetute> ett Doonzo keewts aap'o gawtdek'i. ¹⁷ No doonz Iyesus Krstosn no amanor Ik'o noosh ǃ imts imo bosho ǃ imtsotse, eshe Ik'o baziyosh falituwo taa kone!»

¹⁸ Boweré han boshishtsok'on bo keewituwo t'ut't s'k et bowutsi, «Eshe Ik'o, Ik' ashwoteraw ashuwots kashi handrosh boon betsitu naandre eti nibo boosh imre,» ett Ik'o bo udi.

Amantsuwotssh Ans'okiyon «Kirstaniyotsi» eteetsok'o

¹⁹ Ist'ifanosi k'is'dek't úd'etson tuwts gisheyi jagon bad'ts amantsuwots Fink'en tuut K'op'rosn Ans'okiyo ǃ borfetso bo ami, bí aap'ono ay-hudiyotssha bako k'oshuwotssh keewakno bo teshi. ²⁰ Wotowa bako K'op'rosnat K'erenon waats amants ik ikuwots Ans'okiyo bo amor Girikiyotssh dab doonzo Iyesus doo shishiyo bo keewi. ²¹ Doonzonuwere boon bíangon ǃ tep'fera ǃ teshi, ay ashuwotsu amanat doonzo maantsan boaani.

²² Iyerusalemitse fa'a Ik' moow keewan b shishtsotse Barnabasi Ans'okiyo maantsan b woshi. ²³ Bíwere amt Ik'o ǃ s'aato ashuwotssh awuk'on ǃ imtsok'o ǃ bek'tsotse geneú ǃwutsi, jamwotsu bo nib s'eenon kup'ar doonzo amanet-suwotsi wotar bo beetuewk'o bíizi. ²⁴ Bíwere S'ayn shayironat imnetiyon s'eenk ash sheeng ǃ teshtsotse bo taawo ay wotts ashuwots doonzo maantsan boaani.

²⁵ Maniye okoon Barnabas Sa'oli geyosh T'erses maantsan bíami. ²⁶ Datsdek'tnuwe Ans'okiyo maantsan dek't b'weyi, gitetswotsuwere ik nati s'eenosh amants ashuwotsnton ik wotat ay ashuwotsi bo daniyi, amantsuwotsuwere tewurerosh Ans'okiyon, «Kirstiyaniwotsi» ett s'egeyi.

²⁷ Manoor ik ik Nebiyinee ett s'eegeyiru dani-fuwots Iyerusalemn Ans'okiyo maantsan bo ami, ²⁸ Boyitsnowere iko Agabosi eteetso tuut dats jamatse k'ak' eeno b' wotituwok'o S'ayin shayiro b'tizre bek'on bek't b' keewi, hanuwere b' woti Rom naashuwots naasho K'elawudiyos dúrone b' teshi. ²⁹ Mansh Ans'okiyon beyiru amantsuwots Yihudon beyiru eshuwotssh bo took tookon bo faltso'k'o c'oc'de'er boon tep'o damiyetuwok'o boeti. ³⁰ Gizmano kishdek't Barnabasnat Sa'ol kishon Ik' máá eenashwotssh bowoshi.

12

Krstiyaniwotsats bodts een gishewo

¹ Man dúr nuguso Herodis Ik'i maa ash ik ikuwotsi gisho dek' b'tuwi, ² Yohans eshuwi Yak'obi shikon b' úd'iyi. ³ Keewu manuwere ayhudiwotsi b' geneeúshtso'k'o bbek'tso'k'on P'et'rosi ando aani detsi bk'ri, man bwotuwere ayhudiwots tush meyi baaliyo bomangif aawwotsitsna b'tesh. ⁴ P'et'rosi bdetsiyehakon tipi moots kindshbk'ri, ayhudiwots Fazigi baaliyoniye hakon ash ashuwotsok b' t'intsetso kes' kes'fwots awd awdon bokotetuwok'o awd jirwotssh imb'k'ri. ⁵ Mann P'et'ros tipi mootse detseyatni b' kotefoni, ernmó

Ik'i moowu b jangosh Ik'o maants kup'idek'atni b k'onfoni.

Ik'i melakiyo tipi mootse P'et'rosi bbitstsok'o

⁶ Yaats guurok'on Herodis P't'rosi ash ashosh t'intso gawudek'tni btesh, t'úmanots P'et'ros Habliyion tipeyat kes' kes'f giti dagotsa bk'eyiri btesh, k'osh wotaderwotsuwere wee maa fengeshoni bokotiri. ⁷ Manoor doonzo melkiyo bíats be'eyat, tipi moots c'eesho shaano gol bwutsi, melakiwonwere P'etros lalk'o t'awit tuzt «Káári tuuwe!» bíeti, habiliyonu b kishotsere fed'bgutsi. ⁸ Melakiyonu «Ntaho tahade'er! nc'amono gerde'e!» bí eti. P'et'rosuwere azazetsok'o b k'ali, melakiyonu «N nat'alo tahader tshuutso wowe!» bí eti. ⁹ P'et'ros waat b shuutso btuwi, bek'a b bek'iri bish bíari bako melakiyo b k'alts jamo ar areratse. ¹⁰ Iknonat gitl koteyiruwokere beshat kitootsan damiru biri is'ok bobodi. Is'onuwere asho b t'awirawo hank'on bíaal k'eshebgutsere kesht ik weridon beshat k'az boami, b gawurawo melakiyo P't'rosatse k'aleyat bíami.

¹¹ P'et'rosu b atso dant, «Doonzo b melakiyo woshat Herodis kishotsnat Ayhudi ashuwots bo kotiru keewu jamotse taan b kashitsok'o and taa arikon danre!» bí eti.

¹² Man dan bk'rihakon ay ashuwots ikok kakuwedek't Ik'o bok'oniruwok Mariyam mook bíam, Mariyam manuwere Mark'osi eteetso Yohans indi btesh. ¹³ P'et'ros manok bodt úriweertso fengesho bk'oftsok'oon Rodayi eteets gon iku koni bwottsok'o danosh fengeshomants bweyi. ¹⁴ P'et'ros k'ar bwottsok'o danbk'rtsok'on

b gene'úwi aytsatse tuwtson fengesho b k'eshrawon wos'aat gitsomaand kindat «P'et'ros fengeshatse b'need'iri!» etaat b keewi. ¹⁵ Bowere «Geeniya nwutsi!» bo eti. Bimó «Arikon b'ine!» arikon bín bek're etaat bkeewi, boowere bere «Bín kotiru melakiye b'wotiti» boeti.

¹⁶ P'et'rosmó maa fengesho k'ofu ned'iratse, boowere fengesho k'eshdek't bos'iloor bo'adi.

¹⁷ Bímó s'k boetetuwok'o b'kishon kitst doonzo awuk'o k'aldek't tipi mootse bín b'kishtsok'o boosh keewut «K'eevan Yak'obnat oorts amantsuwotssho keewwere» b'iet. Boatse k'aleyat k'osh beyok k'az b'imi.

¹⁸ Bgatstsok'onowere kes' kes'fwots «P'et'rosats eege b'woti k'úna?» ett ayidek't kic'bowutsi. ¹⁹ Herodisuwere b'weeron P'et'rosi geyit b't'ut'tsok'on fengesh kotiruwotsi b' maramariyakon boon úd'etuwok'o b'iazazi, maniyere hakon Herodis Yhud datsatse tuut K'isariyi maants amt manoke beeb'wutsi.

Herodis k'ir k'iro

²⁰ Herodis T'irosnat Sidon dats ashuwotsats ayidek't fayatni b'tesh, boowere ikwotdek't waat, Nugúsok karnts guutso Blast'osi bonton b'tep'ish k'ondek't eeki bodek'iyakon Nugúso manosh bo aati, man bok'aluwere bodatsuu misho bdaatsfo Nugúso datsatse b' teshtsosa.

²¹ Detsets aawmanots Herodis b' naashi taho kardek't naashi jorats be'dek't ash ashosh keewo b'keewi. ²² Ash ashonwere «Hanuwo Izar Izewer k'aara bako ash k'aaraliye!» ett bokuhi.

²³ Herodis Ik'osh mango b' imaawo b' oortsotse

manoor doonzo melakiyo togbk'rere shipro gedt bk'iri.

²⁴ Ik' aap'onmo aawu aawon eenfetst gawun-ferá bíamfo. ²⁵ Bernabasnat Sa'oln boamts fino isht Iyerusalemitsere Ans'oki datsomand k'azboaan, Mark'osi eteetso Yohansnowere bonton dek't boweyi.

13

Bernabasnat Sa'oln S'ayin shayiron galeyat daniyosh bowoshetsok'o

¹ Ans'okitse fa'a Ik'i moowutse nebiywotsinat danifuwots fa'ano botesch, boowere, Bernabasi, aak'a eteetso Sm'onu, K'eren datsats asho Lukyosu, awdlo kayo keewutso Herodisnton towaat eentso Mnahenat Sa'olne fa'ane boteschi.

² Bo doonzosh finefetst s'oomoke bobefere S'ayin shayiro «Taa boon t galts finosh Bernabasnat Sawln taash galuwere» bíet.

³ Boweré s'oomat Ik'o bo k'oniyakon bokishono boats gedt wosh bok'iri.

Barnabasnat Sawln K'op'rositse

⁴ Barnabasnat Sawln S'ayin shayiron wosheyat Selewik'iyo maats boami. Manokno markabon K'op'ros maats boami. ⁵ Selamis kitots bo bodtsok'on ayhudiyots Ik' k'oni mootse Ik'i aap'o bodani, Yohanis Mark'oswere bonton wotat boosh bodabiri bteshi.

⁶ Aatso gúrts K'op'ros datsu k'ut't p'afuyi bo bodtsok'on Baryesusi eteefo ayhudits ik'ets ash iko daats bodek'i, bímó kootets nebiyiya b tesh. ⁷ Bbefonuwere Sergyos P'awlosi eteets t'iwintsdek'ts dats k'eezfontoni btesch, dats

k'eezfan Bernabasnat Sa'oln s'eeegt Ik' aap'o k'ebo b́ geyi. ⁸ Ernmó Griki noon keew keewon «Elimas» ett s'eegets ik'etso Beryesus dats k'eezfo bíamanerawok'o geeyat Bernabasnat Sa'oln b́ k'efi. ⁹ P'awlosi eteetso Sa'olmó S'ayin shayiron s'eent ashman t'iwintsdek't s'iilt hank'owa bísh bíet, ¹⁰ «Nee Dabilos naayo! ar jami t'alatono! dirshonat gond jamon s'eentsono, kááwu wottso doonzo weerindo k'uuriyo k'azalk neeneya! ¹¹ Andoor hambe! doonzo kisho neen togetuwee, doogonowere wotitune, muk' gizewosh aawu shaano be'atsnee.»

Manoor bíawwotsi bampulonat t'aluwo ipb́k'iri, b́ kisho deshde'er jishit asho b́ ganoke geyo dek'btuwi. ¹² Dats k'ezfonuwere wotts jamo b́ bek'tsok'on bíamani, doonzo jangosho b́shishts danon bíadi.

Barnabasnat P'awlosn P'isdi Datso Maantse Fa'a Ans'okiyomats Bíamtsok'o

¹³ Maniyere okoon P'awlosnt b́ tohuwotsn Markabats keshdek't P'afutse P'nflyo maantse daatseyiru P'erger maants boami, Mark'osi eteyiruwo Yohanismó boatse k'aleyat Iyerusalem maants aanat bíami. ¹⁴ Boomó P'ergeriyere tuut P'isdyayitsi datsatse fa'a Ans'okiyo maants boami, sanbati aawon ayhudyots Ik' k'oni moots kindt beebowutsi. ¹⁵ Muse nemonat Nebiyiwots mas'afwots nababeyakon Ayhudi Ik' k'oni maa naashuwots «T eshuwotso, ashuwotsi kup'it izo detsfte wotiyal keewwere» ett P'awlosots maants asho bo woshi. ¹⁶ Mansh P'awlos tuut ashosh kishon b́koli, hank'o ett b́keewi, «Isra'el ashuwotsnat Ik' shatiru Ik' ash woterawwotso!

k'ewere! ¹⁷ Israe'el ashaanotsko Izar Izewer yoots no nihotsi galre, Gbs'datsatse boteshor een ashuwotsi boon b'woshi, bí een angonowere datsmantse boon b'kishi. ¹⁸ Hab'natonoshowere woruwotse boon b' k'ami, ¹⁹ Kan'an datsatse shawat nugúsuwotsi t'afit bodatso bíashwotssh b'naatiyi, ²⁰ Jaman awd bale balk'ats naato b' ishi, maniyakowere nebiyo Samu'el dúrosh b' borfetso Mesafntiyotsi b' imi.

²¹ «Manats dabt nugúso boosh b' naashituwok'o Ik'o bok'oni, Ik'onuwere Biniyam jir wottso K'is naayi Sa'oli hab natosh boosh b' naashiyi. ²² Sa'olno naashatse b' orshiyakon Dawiti b' naashiyi, Ik'onu Dawit jangosh b' gawor, <T shuntsok'o wottso, tshunono finto, Isey naayi Dwiti daatsre> etre. ²³ Ashaan naarotse Ik'o b' jangits keewok'on Isra'eli kashituwo Iyesusi boosh b' tuuzi. ²⁴ Iyesus b' waraftse shinon Yohanis Israe'el ash jamosh naandrone err gupeyo nabre b'teshi. ²⁵ Yohanis b' fino b' ishtsok'on <Taa kone itsh tiari? Taahe Mesihyo taanaliye, ernmó b' c'aami tiponuru dab bitsosh tborawo t shutsatse k'osho weetuwe> bí etfoni.

²⁶ «It Abraham naaratse shuwets eshuwotsnat itwere Ik' shatiru Ik' ash woterawotso! bín kashet wóóshan woshe noshee ²⁷ Iyerusalemn beyiru ashuwotsnat boon jishiruwots Iyesus kashitso b' wottok'o danatsne, sanbati aawu aawon nababeyiru nebiyiwots

13:17 13:17 Kesh. 1:7; 12:51 **13:19** 13:19 Iwi. 7:1; Iya. 14:1
13:20 13:20 Mes. 2:16; 1 Sam. 3:20 **13:21** 13:21 1 Sam. 8:5; 10:21
13:22 13:22 1 Sam. 13:14; 16:12; Dub. 89:20 **13:24** 13:24 Mar. 1:4; Luk'. 3:3 **13:25** 13:25 Mat. 3:11; Mar. 1:7; Luk'. 3:16; Yoh. 1:20-27

mas'aafwotsi t'iwintso bok'aztsosh bíats boangshor bek'on keewetso bs'eenetuwok'o woshrne.
²⁸ K'irosh bín betsit keewo eegoru bíatse datso bok'azaloru bín boosh b' úd'ituwok'o P'ilat'osi bo k'oni. ²⁹ B' jangosh guut'ets jamo bs'eeniyakon jitatse orshdek't boduki, ³⁰ Ernmó Ik'o k'irotsé bín ktizi. ³¹ Geliltseré Iyerusalem maants bínton waatsuwotsshowere ay aawosh boats b' be'eyi, boowere and ashuwots shinatse b' gawwotsiye. ³² No itsh detsdek' nowatso Ik'o nonihotssh jangit b' ímts doo shishiyi keewoniye. ³³ Ik'o Iyesusi k'irotsé btiztsotse b'jangitsano noosh bo nanaúwotssh finats jitsre, manuwere gitli Dubotse,

<Nee tnay neene, taa neen hambets shuure,>
 ett guut'etsok'one. ³⁴ B' o'awok'o Ik'o k'irotsé b' tiztsok'o daniyosh,

<S'ayin amanets deero

Dawitsh jangit imetso itsh imetuwe> ett keewure.

³⁵ Dabt k'osh dubotse,

<N Naayi S'ayino b' ok'etwok'o woshatsne> bí eti

³⁶ Ernmó Dawit b' dúr jamo b' fino Ik'i shuntso bs'eentsyakon k'irre, nihwotsntonuwere duukere, ok'ree. ³⁷ Ik'o k'irotsé btiztsónmó oa'atse. ³⁸ Eshe tí eshuwotso! Morrosh oorowe eto datsetuwo Iyesusn b'wottsok'owo itsh nabetsok'o dande'ere, ³⁹ Bín amants jamo Muse

13:28 13:28 Mat. 27:22-23; Mar. 15:4-14; Luk'. 23:21-23; Yoh. 19:15 **13:29** 13:29 Mat. 27:57-61; Mar. 15:42-47; Luk'. 23:50-56; Yoh. 19:38-42 **13:31** 13:31 Wosh. 1:3 **13:33** 13:33 Dub. 2:7
13:34 13:34 Isa. 55:3 **13:35** 13:35 Dub. 16:10 **13:37** 13:37 Isa. 42:6; 49:6

weeron imets nemo nas'o kisho b́ falawu morr jamatse nas'o keshituwe. ⁴⁰ Mansh nebiyatiyotsn Ik'o hank'o ett b́ keewetso itats b́ borawok'o korde'ere, ⁴¹ <It aatsnirwots s'iilere! adúwere! t'afuwere!

Konuworu asho itsh b́ keewure

It amanerawu fino itdúroon finitwe.> »

⁴² P'awlosn at Barnabasn ayhuidiyots Ik' k'oni mootse bokeshfere keewan weet sanbatots aani boosh bokewituwok'o ashuwotsi bok'oni. ⁴³ Ayhudi Ik' k'oni moots ko'etswots bad'bowutstsok'oon ay Ayhudi jirwotsnat Ayhudi imnetiyots kindt Ik' Ik'iru Ashuwots P'awlosnt Barnabasn shuutso botuwi, P'awlosnt Barnabasnowere ashuwotsi danit Ik'i s'aaton kup'ar bobetuwok'o boosh bogawiyi.

⁴⁴ Weet sanbatono kitotse beyiru ashuwotsitse aywots, Ik'i aap'o shishosh ko'ebowutsi, ⁴⁵ Ayhuidiyots ash ashuwots ay bowottsok'o bo bek'tsosh okooron s'een bowutsi, b́ keewono k'efefetst P'awlosi boc'ashi, ⁴⁶ P'awlosn at Barnabasnomó hank'o ett ááwu shuk'on bokeewi, «Ik' aap'o shini itsh keewo geyife, it de'atsone it etalomó dúre dúr kasho itsh b́ woterawok'o it tookats it angshstotse hamb no Ik' ash woterawwots maants wongrer ametuwone. ⁴⁷ Manowere nok'alitiye doonzo, <Kasho dats daarats b́borfetso n doowetuwok'o Ik' ash Woteraw ashuwotssh shááno neen woshre> ett b́ azaztsotsne.»

⁴⁸ Ik' ash woterawwots han boshishtsok'n geneú bowutsi doonzo aap'o bomangiyi, dúre dúr kashosh gaalets jamwotswrere boamani.

⁴⁹ Doonzo aap'onuwere dats jamanats bad'bwutsi. ⁵⁰ Ayhudi jishiruwotsmó

ayhudi imnetiyo amaniru gaalets mááts máátsuwtsenat kititsi een een ashuwotsi gondon P'awlosnat Barnabasn gishetuwok'o bowoshi, bo datsatsnowere boon bokishi. ⁵¹ P'awlosnat Barnabasn boats botufatsi k'undo tebazu Ik'oniyon maants boami. ⁵² B danifuwosuwere gene'onat S'ayn shayiron bos'eeni.

14

P'awlosn at Bernabasn Ik'oniyonitse

¹ Ik'oniyonitse P'awlosnat Bernabasn towaat ayhudiwots Ik' k'oni moots bokindi, manoknowere ay ayhudiwotsnat Ik' ash Woteraw ayidek't ayts ashuwots bo amanefetsosh bodaniyi. ² Amaneraw ayhudiwotsmó Ik'i ash woterawwotsi tuzit eshuwotsats shit'o bweetwok'o bok'ali. ³ Mansh P'awlosnat Bernabasn doonzo keewo ááwu shuk'on keewfetst manoke ayi gizewos boteshi, doonzonwere milikitwotsnat adits keewwotsi bokishon bofinetwok'o alo boosh imt, b s'ati aap'o ariko bwottsok'o bkiitsfoni.

⁴ Kitutse beyiruwotsmó, gitoko kayaat bado ayhudiwotsnton bado woshetswotsnton bowoti.

⁵ Ik' ash woterawwotsna ayhudiwots bo naashuwotsnton wotdek't P'awlosnat Bernabasn kaarar shutson togosh bogeyi, ⁶ P'awlosn at Bernabasn man bodantsok'on Lst'ranat Derbeyi eteef Lik'a'on kituwotsnat bogúuratse fa'a datsats giifat boami. ⁷ Manoknowere doo shishiyo bonabi.

P'awlosnat Barnabasn List'rnat Derbeyitse

⁸ Lst'ra datsatse b́ tufo lasha'awutsts ash iko fa'e b́tesh, ashaan b́ shuweetson tuut dura b́teshtsotse b́ tufoon sha'a danaka, ⁹ Ashaan P'awlos b́ keewor bedek'tni b́ k'ebiri b́ tesh, P'awlos ashman t'iwintsdek't s'iilt kashosh b́n betsit immetiyo b́ detso b́ bek'tsok'on, ¹⁰ «Kaawde'er ntufon need'owe!» ett k'aari eenon b́keewi, ashmanwere t'oolat tuut hake bak b́sha'i. ¹¹ Ashuwotswere P'awlos b́ k'altso bo bek'tsok'on, bok'aaro eenshdek't «Ik'uwots ash aron wotdek't nok oot'rnee!» ett Lik'aoni noon keewu keewon bokeewi. ¹² Bernabasshower «Dya» boeti. Keewu keewiruwo P'awlosi b́ teshtsotse b́sh «Hermeniye» boeti. ¹³ Kitoniyere úratse fa'o diyako s'ayin máá kahniyo minzi wrwotsnat k'odets funduwotswowere kiti fengesho maants dek'wat ash ashonton ikwotdek't P'awlosnat Bernabasnsh wosho t'intossh b́geyi.

¹⁴ Wosheets, P'awlosnat Benabasn man boshishtsok'on shiyanon botaho bo gaat'i, ash asho maantsowere wos't kuhefets hank'o boeti, ¹⁵ «It ash ashuwots eegishe han itk'aliri? Nowoor itnk'o ash noone, Noo hanok nowaa it hank'o k'awuntsal keewu jamatse wokar daro, datso, aatsk'aronat bogitsotse daatseyiru jamo aztso Kashetso Izar Izewer maants it aanituwok'o sheeng keewo shishiyishee, ¹⁶ Beshts dúrowotsitse ash jamo botook weeron boametuwok'o Ik'o boon kazb́k'ri, ¹⁷ Wotowa bako b́aawuk'o sheengo Izar Izeweri b́ wottsok'o gaawit sheeng fino k'alo need'iratse, darotse awusho itsh bútsiree, maay kakuwi

shashwotsi itsh b́ imi, Mishonat geneeúon itn b́woriyi.» ¹⁸ Wosheetsots mank'o dabt bokeewiyalor ash asho boosh wosho t'intso b́k'azetuwok'o bobazi ayidek' kic'oone.

¹⁹ Ayhudiwotsmó Ans'okiyonat t Ik'oniyonn manok waat ash asho tuzdek't P'awlosi shútson botogetuwok'o bowoshi, k'irb́wuttsok'o b́iarere geets dek't kitotse kishbok'ri. ²⁰ Ernmó b́danifuwots waat b́n gúúrdek't boned'fere P'awlos tuut kitots b́kindi, yaats guurok'onowere Bernabasnton Derbe maants b́iami.

P'awlosnat Bernabasn Sori datsatse fa'ú Ans'okiyo maants b́iantsok'o

²¹ P'awlosnat Bernabasn Derbe datsatse doo shishiyo danit ay ashuwotsi amantsuwotsi bowoshiyakon Lst'ronat Ik'oniyonn beshat P'sdiyin fa'úts Ans'okits boami. ²² Dats jam manotsatsnowere amantsuwots boamantsats kup'bodek'etuwok'o boon kup'iyonat izosh «Ik'i mengstots kindosh ay gondo noosh geyife» etfetst boon bdaniyi. ²³ Ik' k'oni maa mootse eenash eenashuwotsnowere boosh bonaashi, s'omat Ik'o bok'oniyakonowere b́n boamants doonzosh adaro imbok'ri.

²⁴ P'sdiyanowere beshat P'nfli maants boami, ²⁵ P'ergeyitsnowere Ik' aap'tso bodaniyakon At'aliyi maants boami, ²⁶ Maniyere hakonowere bok'alts Ik'i s'aatosh adaro boosh ímeets Ans'okimaants markabon boami.

²⁷ Manok bobodetsok'on amantsuwotsi ikok kakudek't Ik'o awuk'o k'alt bonton wotdek't b́fiints jamonat Ik'i ash woterawwotswor boamanituwok'o awuk'o k'alt fengesho

boosh b́k'eshtsok'o bokeewi ²⁸ Manoknowere
amantsuwotsnton ay aawo boteshi.

15

Iyerusalemitse kakuwets kakuwewo

¹ Ash ik ikuwots Yhuditsere Ans'oki maants
amt «Musesh imets nemok'on gofo it amala
bako kasho falratste» ett amantsuwotsi daniyo
dek'botuwi. ² P'awlosnat Bernabasn man-
jangosh ash ashuwotsnton wed'eyat moosho
bomooshi, Maniyere okoon P'awlosnat Bern-
abasn Ans'okitse fa'e k'osh muk' eshuwotsnton
wotde'er Iyerusalemits amr b́jango woshetswot-
snat eenashuwotsnsh bot'intsituwok'o woshi.

³ Mansh bo Ik'i moon wosheyat boami,
Fink'emat Semaritse bobesheferowere Ik'i
ashwoterawwots Ik'o maants boaano bokeewi,
keewetsanuwere krstiyani jametsuwotsi
b́geneúshi. ⁴ Iyerusalemits bobodtsok'on Ik'i
moowunat woshetswotsn, eenashuwotswere
boon bodek'i, wosheetsuwotswere Ik'o bonton
wotdek't b́ fintso boosh bokeewi. ⁵ Ernmó
Ferisawino eteefuwots jirwotsits wotts ik ik
amantsuwots tuut «Ik'i ash woterawwots gofo
amr Muse nemo bokotetuwok'o k'alo geyife»
boeti.

⁶ Woshetswotsnat eenashuwotsn keewan
shuu'ar s'ilosh kakuwebodek'i, ⁷ Ay moosho
mosheyakonowere P'et'ros tuut boosh hank'o
bíeti, «Eshuwwotso, Ik'i ash woterawwots
taan Doo shishiyo k'ewur boamanituwok'o taan
ititse galb́dek'tsok'o danfte. ⁸ Ash nib dantso

Izar Izewer, S'ayin shayiro noosh bimtsok'o booshowere imtni b̄ gawi. ⁹ Bonibo amanon b̄ s'ayntstsosh noonat bodagotse eegoru k'osh k'osho woshratse. ¹⁰ Eshe, nonihotsi wotowa noo kuro nofalrawu k'ambariyo amantsuwots bimbats kuriyon and Ik'o eegishe itfadiri? ¹¹ Noo nokashit bokok'o doonzo Iyesus s'aaton b̄ woto amaniruwone.»

¹² Manoor kakuwets ash jamo s'ik ett Bern-abasnat P'awlosn boweeron Ik'o Ik' ash woterawwots dagotse b̄ fints milikitonat adits keewu jamo bokeewure adt k'ebeyi. ¹³ Bo keewut boishiyak, Yak'ob hank'o ett bíaniyi «Ti eshuwotso! aab taan k'ewere! ¹⁴ Ik'o b̄ shútson s'eeget ik ikashuwotsi bo dagotse galdek'osh shinshino awuk'o k'alt Ik' ash woterawwotsi waa b̄s'iiltsok'o Sim'on keewure. ¹⁵ Hasabiyantonuwerfe nebiywots keewuts keewo manee, hank'o ett guut'etsok'one,

¹⁶ <Haniyehak aani weetuwe,
Gahtso Dawit moo agetuwe,
B̄ gahts tiish tishonowere tizde'er aaniy
need'ituwe.

¹⁷ Hanowere t k'alit oorts ashuwotsnat
T shútson s'eegets Ik'i ash Woteraw jamwots
Ik'o bogeytuwok'owee,

¹⁸ Yootstson jaman danitso Ik'o taa hank'o
etiruwe,>

¹⁹ «Mansh tiaasabiyo Ik'omaants aanits Ik'i ash woterawwotsi nokic'irawok'owee. ²⁰ Maniyere <Woterawu ik'uwotssh t'iintsotse kiimts woshi

misho máák'ayere, widatse wokoore, shukeer-awonat b́ s'atso bkud'erawo guuk'at k'irts gizi meetso máák'ayere, s'atsonowere máák'ayere» err boosh guud'one. ²¹ Yootstson b́ tuutson Muse nemó sanbati aawu jamon ayhudiwots Ik' k'oni mootse nababefe b́teshi, Ik'i keewuts keewonowere kitt kitotse nabefee.»

Kakuweetsmanots k'ut'tsonat amantsuwotssh guut'ets woshon

²² Maniyere hakon woshetswotsnat eenashuwotsn Ik'i maa ash jamonton wotdek't kakuweetsmanotsitse k'ats ashuwotsi marat'dek't P'awlosnat Bernabasnton Ans'okimaants daamiwosh k'ut'bok'ri, Mansh eshuwotsitse jiishon shútsi sheengo detstswotsi Bersabasi eteetso Yhudnat Silasn marat'bodek'i. ²³ Guut'ets woshi work'ato bokishon bo damiy, Wosh detsts work'atmanuwere hank'o etka b́tesh, «Noo woshetswotsnat eenash eenashuwots it eshuwots, Ans'okinat Soryon, Kilk'iyitsnowere beyiruwots Ik'i ashwoterawwots jirwotsi wottsuwotssh no eshuwotssh jamo itsh t'intsiruwone. ²⁴ Noyitse ik ik ashuwots noo boon noazazerawon it maants waat itsh bokeewts keewon iti bokic'itsok'onat itn bodanditsok'o shishrone. ²⁵ Mansh ikok ko'enowutsiyakon woshetuwootsi marat'de'er shuneets no eshoo eshuwwots Barenabasnat P'awlosn ton itmaants woshosh no shiyeyi. ²⁶ Barnabasnat P'awlosn doonzo Iyesus Krstos jangosh bo kasho beshidek't imknee. ²⁷ No guut'tsonowere noonon dabr itsh bo keewituwok'o Yhudnat Silasn wosherrone. ²⁸ Itsh not'intsts geyit keewanotsiyere okoon

k'osh mang kuro itats nokurirawok'oyish noo S'ayin shayironton sheeng bwotere daatsrone. 29 Woteraw ik'osh t'intsetsotse kiimts misho maak'ayere, guúk'at k'irts gizi meetsono maak'ayere, s'atsono maak'ayere, widatsnowere wokoore, jamkeewanotsatse it atso it kotal sheenge itk'aliti, jamon beewere.»

30 Wosheetswotswere deen bok'rere Ans'oki maants boami, amantsuwotswere kakudek't wosheets work'atman boosh imbok'ri.

31 Amantswotswere wosheets work'ato bonababor bitsi kúp'its woshmann ayidek' boon b geneúshi. 32 Yhudnat Silasn nebiywotsi boteshtsotse eshu eshuwotsi ay Ik'i keewon izt boon bokup'shi. 33 Yhudnat Silasn muk' aawwotssh manoke boteshiyakon amants eeshuwotsoke deneyat boon woshtsuwotsok aanat boami.* 35 P'awlosnat Bernabasnowere eshu k'osh ayuwotsnton wotdek' Doonzo keewuts keewo danifets nabfetst muk' aawosh Ans'okitse boteshi.

P'awlosnat Bernabasn bok'aletsok'o

36 Muk' aawwotsiyere hakon P'awlos Bernabassh «Wowe anaanar haniyere shin doonzo keewts keewo boosh noshishits kit jamwotsitse fa'a eeshuwuwotsi s'iilone, awuk'o bowottsok'onowere danonee» bí eti. 37 Bernabasuwere Mark'osi eteetso Yohans bonton towaar bíamo b geyi. 38 P'awlosmó ashman bonton bíametuwok'o eekeratse, eek bk'aztsonuwere bí P'nfliytse

* 15:33 15:33 «Silasmó manoke oora bgeyiye.» ik ik yoots kishon guut'etswots 34 taawatstsan dabrakne. 15:38 15:38 Wosh. 13:13

boatse k'aleyat b́ oortsonat fino maantsowere bonton amo b́ k'aztsoshe. ³⁹ Manatse tuutson P'awlosnat Bernabas dagotse mooshi eeno b́tuure k'ale bowutsi, mansh Bernabas Mark'osi detsdek't markabon K'op'ros maants k'azbíami. ⁴⁰ P'awlosmó Silasi marat'b́dek'i, eeshuwotswere P'awlosi doonzo s'aatosh adaro beshidek't boimiyakon k'azbími. ⁴¹ Biwere Ik'i moowuwotsi kup'ifere Soriyonat Kilk'iyi weeron b́beshi.

16

T'imotiwos P'awlosnat Silasnton towaat bíamtsok'o

¹ P'awlos Derbenat Lst'ra maants bíami, Lst'rn T'imotiwosi eteets amants jawets iko fa'e b́tsh, b́nd ayhudiyi ash wotat amank krstiyani btesh, b́ nihmó Grik dats asha b́ tesh. ² T'imotiyos Lst'ronat Ik'oniyonitse fa'a eeshuwotswokere sheeng shútso detsfe b́ teshi. ³ P'awlos T'imotiyosi de'er amo b́getsotse manokere beyru ayhudiwotsatse tuutson gofo b́ ametuwok'o b́woshi, mank'o b́ k'aluwere bo T'imotiyos nih Giriki dats ash b́ woto bodantsotse bojangosha etniye. ⁴ P'awlosnat Silasn kit kitotse beshefetst Iyerusalemn fa'a woshetswotsnat eenashuwotswotsh eteets nemo amantsuwotssh bodanifere b́tsh, finatsowere bojitsituwok'o boosh bogawifere bo teshi. ⁵ Mansh Ik' moowwots imnetiyon kup'bowutsi, botaawonúwere dabfere bí'amiri.

P'awlos Mek'edoni datso maants bí ametuwok'o s'eegetsok'o

6 P'awlosnat Silasn Isiyi datsatse Ik'i aap'o bokeewurawok'o S'ayn shayiro boosh b́ bazit-sotse Frgyiyinat Gelatiyi daarok k'az bobeshi,
 7 Misiyi daarok bobodtsok'on Bitanimaants amoosh gawtni botesh, ernmó Iyesusko S'ayin shayro man maants boametuwok'o eekeratse.
 8 Mansh Misya weeron beshat T'iroadi bo oot'iyē.
 9 Manoke t'ú Mek'edoni ash iko need'dek't «Mek'edoni maants kimr noon te'úwe!» ett b́n b́ k'onfere bek'on b́bek'i. 10 P'awlos bek'man b́bek'iyakon manoor Mek'edoni maants amoosh no geyi, Man b́wotuwere Mek'edoni ashuwotsshowere doo shishiyo nodaniyituwok'o Doonzo noon b́ s'eegtsok'o nodani.

Lidiyi Krstosn biamantsok'o

11 T'iroadiyere Markabats keshdek'at kááwon Samtrak'e maants noami, yaats guurok'on Nap'ule maants no ami. 12 Maniyere tuwat Filip'isyosits nobodi, Filip'isyus Mek'edonitse fa'a kit eenunat Rom dats ashuwots dets bodek'ts datsi b tesh, kitmanitsnowere muk' aawwotsi nobeshi. 13 Sanbati aawotsowere Ik' k'onosh boko'efok kitoniyere úratse fa'a foki gúrok noo ami, manoke bedek'at ko'edek'ts máátsuwotssh Ik'i aap'o nodaniyi. 14 Nokeewirman k'ebiru máátsuwotsitsere iku Tiyat'ros kitotse shuwetsu tahi biro jaakiru Lidiya eteets máátsu fa'a b teshi, biwere Ik' Ik'iru máátsiye b teshi, doonzo b nibo bish b́ k'eshtsotse P'awlos b́aap'iru b k'ebfere b teshi, 15 Binat b meyitsi fa'a ash jamwots bo gupeyakon, «Doonzo ti amantso arik b́woto itkitsitka wotiyal waar t moots beewere,» etaat kup'idek'at noon b k'oni.

Filp'syus kitotse P'awlosnat Silasn botipetsok'o

¹⁶ Ik aawu Ik' k'oneyiruwok noamfere shino maants wotit keewo keewit kim shayiro biyatse fa'a ik'ets Gon baarna'ú weerindatse noon b datsi, Gonmanuwere Ik'o oot'at b doonzotssh ay oot'o b datsifo b teshi. ¹⁷ Biwere noonat P'awlosn shuutso shoydek'at sha'at, «Ashaanots een Ik'o gutswotsiye! boowere kash weerindo itsh keewitúnee!» etaat b kuhefooni. ¹⁸ Hanoewre ay aawosh aani aani bk'alfoni, P'awlosmó nibok'úúnwutsat wongr et aanat kiimshayirman «Iyesus Krstos shútson biatsotse nkeshetuwok'o neen azazere!» bí eti. Kim sharonuwere manoor k'azb'keshi.

¹⁹ Bin keezfwotswere b weeron bodatsit oot'o boatse k'ut'b'wtstsok'o bek'bok'rtsok'on P'awlosnat Silasn detsbodek'i, geetsferowere jebomaants dek'amt naashwots shinats t'intsbok'ri. ²⁰ Rom dats naashuwotsokowere dek'wat hank'o boeti, «Ashaanots Ayhudi jírnee, no kitotsnowere dimbro botuziri, ²¹ Noo Rom dats ashuwots dek'o nofalrawu niwo noosh bodaniyiri.» ²² Ashjamonwere ik wotdek't boats b'tuwi.

Naash naashuwotsuwere P'awlosnat Silasn taho sholbaszt gumbon botogetuwok'o boazazi. ²³ Ayidek't botogeyi hakon t'ip'moots kindsh bok'iri, tipi maa kotiruwonuwere k'up'ide boon b'kotetuwok'o azazk'reyi, ²⁴ Kotiruwu azazetsman b'dek'iyakon, tipi maaman gitsotsi kayuts boon kindsh b'k'ri, botufonowere gindonat gindi dagots detsidek't tipb'k'ri.

²⁵ T'ú Taali titso maantsowere P'awlosnat Silasn Ik' k'ononat dubon Ik'o údfetstni boteshi,

tipeets k'oshuwotswere bóóna bok'ebiri botesh.

²⁶ Gawerawonowere tipimaaman bned'oko bgaahefetsosh een dats shek'eyo wotbwtsi, fengesh jamwotswere k'eshebowutsi, tipetswotsi boon tipeets habiliyo ik ikon bish bwutsi.

²⁷ Kotiruwonuwere btokrootse tuut tipimaa fengesuwots k'eshewutsat boere bek't tipetswots k'azbokeshtsok'o bish biarere b tooko úd'osh bshiko kaas'bdek'i, ²⁸ Ernmó P'awlos, «No no únetswor hanok noone! manshe ntokats gondofink'aye!» ett k'aar eenon bkúhi.

²⁹ Manoor kotiruwó c'eesho de'eweetuwo'k'o wosht gitsots bkindi, k'eewufetst P'awlosnat Silasn tufi shirots bbaron gúp'nbwútsi. ³⁰ Úrats boon kishdekt «T Doonzotso! kashosh eegk'ale taan bgeyyiti?» bí eti.

³¹ Boweré «Doonzo Ieyesusn amanowe, kashituwune, nmeyitsi ashuwotswere kashitúne» boeti. ³² Doonzo aap'onowere bínat bmeyitse fa'a jamwotssh bokeewi.

³³ manoori sa'aton t'úwon tipimo kotiruwó dek'amt bogaawo bo atse bmashi, manoor bínat bmaa ash jamwots bogúpeyi. ³⁴ Maniyere hakon P'awlosnat Silasn bmook dek'amt misho boosh bt'intsi, Ik'onowere bí amantsosh bmeyitsi ashuwotsnton geneú bwutsi.

³⁵ B gatstsok'onowere naash naashuwots «Ash manots faksheewunee» ett polisuwotsi bowoshi.

³⁶ Tipi maa kotfonuwere «It it faksheetuwok'o naash naashuwots asho bowoshtotse eshe keer jeenon ameree» ett Silassh bkeewi.

³⁷ P'awlosmó «Rom datsi ashnowotefere nayiralon jebatse noon jot't tipimoots noon

kindshrnee. Andowere tipi mootse ááshon nokeshetuwok'owe bok'aliri? Woteratse! bo botookon waar noon kishunee!» ett bíani.

³⁸ Poliswots keewuman naash naashuwotssh bokeewi, naah naashuwotswere P'awlosnat Silasn Rom dats ashuwotsi bowoto bodantsok'on shatbowtsi. ³⁹ Mansh waat naandrone ett aatt tipimootse boon kishbok'ri, kitmanitsnowere boametuwok'o boon bok'oni.

⁴⁰ P'awlosnat Silasnowere tipi mootse kesht Lidiy moots bokindi, manoknowere eshu eshuwotsi daatsdek't boon kup'sht kitmanowere faksht k'azbo ami.

17

Teselonk'eyitse P'awlosnat Silasnats waats kic'o

¹ P'awlosnat Silasn Anfip'olisnat Ap'olon weeron beshat Teselonk'e maants boami, manoknowere ayhudiwots Ik' k'oni moo fa'ee bteshi.

² P'awlos maniyere shin b k'alfok'o ayhudiwots Ik' k'oni moots b kindi, keez gawuyiwoshwere bk'ut'raawon S'ayin mas'aafotse ash ashosh kish kitsfetstni b danifo.

³ Krstos gond bek'o de'er k'irotsse tuwo bin bgeyituwok'o kitsit danifetst «Taa itsh b jangosh doo tshishyiru Iyesus Krstosiye» bítfera btesh.

⁴ Mann boyitse ik ikuwots b aap'o t'iwintsdek't P'awlosnat Silasnton ikbowoti, mank'owere Ik' Ik'iruwotswere aydek't ayts Ik'i ash woterawwots, kitutse daneets ay máátsuwots b aap'o t'iwintsdek't binton ik bowoti.

⁵ Ayhudiwotsmó okoort fay tizitu fin deshawwotsi weer weeratse kakudek't tuuz bok'ri. Kitutse fayó btuwitwok'o bo woshi, P'awlosnat Silasn kishde'er ash ashosh imosh Iyason moo guurbodeki. ⁶ Ernmó boon bo t'ut'tsok'oon Iyasonnat amants ik ikuwotsi kitmanitsi naashuwotssh t'intsoosh geetsfere dek't boami, hank'o etfetst bokuhiri boteshi, «Hanots datsjamo gaak rne ando hanok waarnee! ⁷ Iyasonwere boon dek't ibiree, <Iyesusi eteets k'osh nugúso fa'ee> ett Rom Naashi Naasho alo bok'efiri.» ⁸ Ash ashonat kitutsi naash naashuwots man boshishtsok'on dimbr bowutsi ⁹ Iyasonnat k'oshuwotsh wusho s'eejiyit fakshbokri.

P'awlosnat Silasn Beriyitse

¹⁰ Eshu eshuwots P'awlosnat Silasn káári t'úwon Bery maants bo amtuwok'o bowoshi, Manok bo bodtsok'on ayhuidiyots Ik' k'oni moots bokindi. ¹¹ Beriyon fa'a ayhuidiyots Teselonk'en fa'wotsiyere bogo kááwu finek boteshtsotse b́ aap'o gene'úwi eenon bodek'i, b́ aap'o ar b́ wotok'o kitsosh aawu aawon S'ayn mas'afotsi bos'ilfoni. ¹² Mansh boyitsere ayuwots boamani, ay Grik datsatsi gaaletswots máátswots ay Grik datsatsi nungushuwots boamani. ¹³ Ernmó Teselok'en fa'a ayhuidiyots P'awlos Beriyon Ik'i keewuts keewo b́ nabiruwok'o bodantsok'on manoor waat ashuwotsi gondon tizt bowaac'rituwok'o botizi. ¹⁴ Manoor eshu eshuwots káári P'awlos aats k'ari ganok b́ ametuwok'o bowoshi Silasn T'imotiyosnmó manoke Beriyon bo oori. ¹⁵ P'awlosi deents ashuwots Ateni bobetsi «Silasn T'imotiyosn

ja'araniye káári tiyok woonee» etiru P'awlos tzaziyo detsdek't Beriyo maants boaani.

P'awlos Atenitse

¹⁶ P'awlos Atenon wotdek't Silasnat T'imotiyosn b kotfere kitutsere dozets ik'uwots bos'entsok'o bbek'tsotse ayidek't nibo bk'uni. ¹⁷ Mansh ayhudyots Ik' k'oni mootse ayhudyotsnat Ik'osh Ik'iru ashuwotsnton jebatse aawu aawon b daatsiru ashuwotsnton bmooshiri btehi. ¹⁸ Epikorosotsnat Istokotsi eteets bog danetuwoots b maants waatni bomooshfoni. Ik ikuwoots «Ooshiyuruwan eeg etee bgeyi?» bo etor, k'oshuwotsmó «Handr ik'uwots janga arefee b keewiri? boetiri, man boetiruwere P'awlos Iyesusnat k'irotsé btuwi doo shishi keewi jango b danitsoshe. ¹⁹ Mansh P'awlosi detsdek't Ariyosfagosi eteets beyokoke kakuwoots ash ashok dek'wat bish hank'o boeti, Nee ndaniyuru handr danan eeg bwottsok'o dano falituwonowáá? ²⁰ Ib wotts ik ik keewwotsi noosh shiyirnee, mansh keewanots eeg bowottsok'o dano geefone.» ²¹ Man etts Atenitse beyirwotsnat Atenitse beyiru úridatsi ash jamwoots handr keewu keewonat k'eboke bogizeyo beshiyo boshunfotsne.

²² Manoor P'awlos Aryosfagosn kakweetswots shinatse need'dek't hank'o biét, «Ateen ashuwootso! jam weeron ayidek'at ik'uwotsi shatiru itwottsok'o t'iwintsdek'at dandek're, ²³ It kitotse guúrat ananat it Ik' it ik'irwoko t s'iile <Danerawo Izar Izeweri> ett guut'etsoko wosh biyatse t'intseyiru t'arap'ezo daatsre, eshe taa and itsh t keewir it danawo bin it ik'iruwu Izar Izewer

jangoniye. ²⁴ Bíye Datsonat datsatse fa'a jamo aztsoniyee, Daronat datsonsh doonze, bíye ash kishon ageets Ik'i moots beerake, ²⁵ Kashonat kash jongon, k'osh keewwotsnowere ash jamosh imfo bí bwottotse bísh eegor shaprake, asho bín b tep'onowere bísh geyiratse. ²⁶ Bíye ash naar jamone ik ashaatse azree, dats jamatsnowere bo beetuwok'o woshre, tiitsets duruwotsnat beyokuwotsnowere boosh b beezi. ²⁷ Man b k'aluwere ashuwots doonzo geeyar daatso bofal-ituwok'owe, bwotiyalor bí no ik iketsatse woka etaliye.

²⁸ <Kasho daatsir nogiwit,

Noo beetuwere b́ne,>

Manuwere itk wotts jááwetswots

<Noo noúnets b́ nana' noone> bo ettsok'onee.

²⁹ Eshe noo b́ nana'a nowotiyakon <Ik'o ash danon, hasabiyon awntson wee ambaron wee shútson dozets aroniye bíari> err gawo noosh geyiratse. ³⁰ Eshe ashuwots yoots dúr dáron bok'altso Ik'o kabiraniyere k'az beshere, andomó dats datsatse fa'a ash jamwots naan-drone boetetuwok'o azazere, ³¹ Bí b́marat'ts asho weeron dats jamatse arikon bangshit aawo beezdek're, hanowere jametsosh daniyidek't bbek'sh b́marat'ts ashman k'irotse btuztsotsnee.»

³² «K'irotse tuuwa» etiru aap'o boshishtok'on ik ikuwots bín boaatsni, k'oshuwotsmó «Han jango k'osh aawots nkeewure k'ebetuwonee» boeti. ³³ Maniyere hakon P'awlos kakuwets ashuwotsoke kesht k'az bíami, ³⁴ Ash ik ikuwotsmó

bínton ik wotat boamani, amants ashuwotsit-snowere Aryosfagosn kakuwetsuwotsitso Diy-onasyosi eteets ashonat Demarisi eteets mááts ikunu, k'oshuwotswere boyitse fa'ano.

18

P'awlos K'orontositse

¹ Maniyere hakon P'awlos Atenitse tuut K'orontosi bíami, ² Manoke P'ant'os datsatse shuwek wottso Ak'ili eteetso Ayhudi ash iko bdaatsi, Rom naashi naasho K'elawudiwos Ayhudi jamo Romitse bokeshetuwok'o azazat b teshtsotse Ak'il b máátsu P'rsk'lntoon It'aaliyitse manoorá bwaa, mann P'awlos book amt bonton bdaneyi, ³ Bfiino ari bokok'o dunkani shipo bteshtsotse bonton towaat beedek'tn bfiinefo. ⁴ Sanbati aaw aawonowere ayhudiwots Ik' k'oni mootse datseyar mooyr ayhudiwotsnat Grik dats ashuwots keewman bo dek'etwok'o bwooshfoni.

⁵ Silasnat T'imotiwosn Mek'odonitse bowatsok'on P'awlos «Iyesusyē Mesihyoniye» eton ayhudiwotssh kup'dek't gawefetst daniyoke bíawu jamo bbeshifoni btesh. ⁶ Ernmó bín k'efat boc'ashor b tahatsi k'úndo tebatt «Eshe itats angshéal it took t'afiyonee! taan bitse aateratse, haniyak Ik' ash woterawwotsok k'ay ametuwe!» bí eti. ⁷ Mann boatse k'aleyat Titos Iyost'osi eteets asho mook k'azbiami, ashaan Ik'o Ik'if asha btesh, bmoonwere ayhudiwots Ik' k'oni mooniyere beshaatni btesh. ⁸ K'ersp'osi eteefo ayhudiwots Ik' k'oni maa jishiruwo bmeytsi ash jamonton Doonzo bíamani, ay K'orontos

ashuwotswere P'awlos b̄ keewufere shisht amanat bogúpeyi.

⁹ Doonzonuwere t'ú bek'on P'awlossh hank'o bíeti, «Shatk'aye, keewwe, s'k etk'aye, ¹⁰ Taaye neentonye tfa'oni, kitanitsere ay asho tdetstsotse gondo niyats betsosh falituwo konuworu aaliye.»

¹¹ Mansh P'awlos Ik' aap'o ashuwotssh danifere ik natonat badosh manoke b̄teshi.

¹² Galiyos Akayiya datso altsi wotat b̄ naashor ayhudiwots ik wotdek't P'awlosats botuwi, angshituwots shinatso b̄n dek'amt, ¹³ «Ashaan Muse nemo b̄ k'efts weratse ashuwots Ik'o bo ik'ituwok'o b̄ woshiri!» boeti. ¹⁴ P'awlos boosh aaniyosh k'andek't b̄befere Galyos ayhudiwotssh hank'owa bíet, «It Ayhudi jirwotso! itats gondo wee weralo finere wotink'ere it t'intsts s'aamiyo k'amde tk'ebank'oni b̄teshi, ¹⁵ Ernmó aap'uwotsnat shúts jango it nemi jangosha it mooshiri wotiyal man it took kis'e, taa keewanotsats angshosh geeratse.» ¹⁶ Hank'o ett moosh mooshiruwoke boon b̄kishi. ¹⁷ Manoor jamwots ayhudiwots Ik' k'oni maa jishiruwo Sostensn detsdek'et angishiruwots shinatse boojot'i, jaman b̄wotefere Galyos kis'odeshatse.

P'awlos Ans'okiy maants bíantsok'o

¹⁸ P'awlos eshuwotsnton ay aawosh K'orontosi b̄teshiyakon jamiyere Soriyo maants bíami, P'irsk'lnat Ak'iln b̄ntoni boteshi, ernmó wosho b̄detstsotse bíamonyere shinon Knkiriya eteyiru datsatse b̄tooko b̄ s'ageyi. ¹⁹ Efesoni bobodtsok'ono P'rsk'lonat Ak'ilon manoke oori bok'ri, b̄mó Ayhudi Ik' k'oni moots kindt

ayhudyotssh keewo b́ keewufoni. ²⁰ Ay aawosh bonton b́teshetuwok'o bok'oniyalor eekeratse. ²¹ Ernmó «Ik'o b́ eteetka wotiyal k'oshoor itok aanarr weetuwe» etk'raat Efesonitsere markabots kinddek't k'azbíami.

²² K'isarimaantsowere b́bodtsok'on maniyere Iyerusalem maants kesht Ik'i meyitsi ashuwotssh jamo b́ t'intsiyakon aanat Ans'okiyi maants k'az b́ oot'i. ²³ Manoknowere muk'i b́teshi, maniyere hakon Gelatiynat Frgiy datsatse ikoke tuut ikok gúúrefetst amantsuwotsi b́ kup'iyi.

Ap'los Efesonnat K'orontositse b́danitsok'o

²⁴ Iskndri datsatse shuwetso Ap'losi eteets Ayhudi asho Efesoni b́weyi, b́ S'ayin mas'aafwotsi t'iwintsdek't dankoonat noon keewonowere sheengshdek't keewo falk asha b́tesh. ²⁵ Doonzo weerindi jangonowere dandek't S'ayin shayronowere aat'k wotat Iyesus jangonowere kaatsdek' nabfetst b́danifoni, wotowa eree b́ b́danfo Yohans gupo s'uzi b́tesh. ²⁶ B́ ááwushuk'on ayhudiwots Ik' k'oni mootse keewo dek't b́tuwi, ernmó P'rsk'ilnat Ak'iln b́ keewiruwo boshishtsok'on bo gal dek'amt Ik'i weero baltsoniyere bogo kaatsdek bitsdek't b́sh bokitsi. ²⁷ Ap'los Akayiyo maants amoosh b́gawtsok'oon eshuwots b́keewuman botep'i, Akaiyitse fa'a eshuwots b́ sheengon de'er boibituwok'o work'atats guut'ets wosho woshbok'ri, manok b́bodtsok'oonowere Ik'i s'aaton amantsuwotsi wotosh bodtswotsi ayidek' b́ tep'i. ²⁸ Iyesus Mesihiyo b́wotsok'o S'ain

mas'afwotsitse Ik' aap'o biitsdek' keewut kup'ts mooshon ayhudiwotsi b́ da'afoni.

19

P'awlos Efesonitse

¹ Ap'los K'orontositse b́teshor P'awlos danbani datson beshat Efeson maants b́bodi, manokno muk' Krstaniyotsi daatsdek't ² «It amanor S'ayn shayiro dek'rteya b́teshi?» ett b́aati. Bowere «De'atsone, S'ayn shayiro b́beyonoru dab shish danaak noone» ett bo aani.

³ P'awlosu «Eshe aawu naari gúpe it gúpetsoni?» b́ eti. Bowere «Yohanis gúponiye» boeti.

⁴ P'awloswere «Yohans guponiye naandrone etosh k'aleke, ash ashosh b́keewutsonuwere <Taayere il wetuwonee amanore> etfetstni b́tesh, b́wewere Iyesusiye» etreboosha.

⁵ Man boshishtok'on Doonzo Iyesus shútson bogupeyi. ⁶ P'awlosu b́ kisho boats b́gedor S'ayin shayiro boats b́ od'eehandr noon keewon bokeeweyi, bek'ono keewo dek'tbotuwi.

⁷ Ash jamwotswere tatse gitne boteshi.

⁸ P'awlos ayhuidiyots Ik' k'oni mook amt keez shashok'owosh Ik' mengst jangosh mooshfetst ash ashuwotssh kish keewut ááwu shuk'ona b́ danifoni. ⁹ Ik' ikuwotsmó maac' kup'o wotat doonzo weerindo ashuwots shinatse c'ashfetst amaneratsone boettsosh boatse k'azb́woki, amantsuwots boaali T'iranosí eteef maa eenok dek'amt aawu aawon boon b́danifoni. ¹⁰ P'awlos

hank'o b́k'al git natok'osha, manoor Isiy datsatse beyiru ayhuidiyotsnat Ik' ashwoterawwotsn doonzo aap'o shisho bofali.

Ik'o P'awlos kishon b́finst adits keewo

¹¹ Ik'o ayidek't adits keewu wotts milikituwotsi P'awlos kishon b́finefoni. ¹² Manatse tuutson P'awlos atsats bodts tahonat marabon dek'amt shodetsuwotsats bobetsor boshodotse bokashefoni, kim shayirwotswere boyitse bokeshfoni.

¹³ Fo'erawono ashaatse kishfetst ikeke tuut ikok guuriru Ayhudi ik ikuwots «P'awlos b́ nabiruwo doonzo Iyesus shútson it kesheetuwok'o iti azazerone» eton fo'erawo ashaatse kishosh bo etfoni. ¹⁴ Ayhudiwots kahinwotsatsi naasho wottso Ask'ewu nana'a shawatuwotswere mank'owa bok'alfo.

¹⁵ Ernmó kim shayiro «Iyesusi danfee! P'awlosnor danfee! Eshe it konots itne?» bí eti.

¹⁶ Kim shayiro bíatse s'eents ash ikonwere t'oolat gúúk' dek'on boats b́kup'i, bonowere da'abdek'i, gaawutnuwere araatswtsaat meyitse giifat bokeshi. ¹⁷ Keewumanuwere Efesonitse beyiru ayhudiwotsnat Ik' ash woterawotsoke b́ shishetsotse jametso shatb́wtsi, Doonzo Iyesus shútsonowere ayi eenb́wutsi.

¹⁸ Amantsuwotsitse ayuwotsuwere bogond fino kish keewut naandrone err bowaafoni.

¹⁹ Atetswotswere bodaniyi mas'aafwotsi kakudek't ash ashi shinatse mitsbok'ri, mas'afmanoots k'awuntsonuwere taanere balk'ats kum ambari katso wotatni b́daatsiyi.

²⁰ Mank'oon doonzo keewo ayidek't gawunfetst da'afera bí amfo b́teshi.

Efesonitse dimbiro btuutsok'o

²¹ Jaman bwotiyakon P'awlos Mek'edonitsnat Akayiyiweeron beshat Iyerusalem maants amoosh bgitsoon gawuk'rat «Manok t bodiyakon Rom maants amo taash geyife» biéí. ²² Mann Ik'i fino finiru ashuwotsitse gitetsuwotsi, T'imotiwosnat Erast'osn Mek'edoni maants woshat bí btookon Isiyi datsatse muk' aawosh bteshi.

²³ Manoor doonzo weeri jangosh Efesonitse dimbiro tuubwtsi. ²⁴ Dimet'rosi eteef ambaar wos'if iko Art'emisn ik' maa aro ambaron doozt ambaar wos'iyiruwotssh ay oot'o bdaatsifoni.

²⁵ Mansh ashaan ambaar wos'iyiruwotsnat bo fini naari fin detsts k'osh ashuwtsi kakudek't boosh hank'o bí eti «It ashuwotso! Noo gaalo nadaatsir finan finat bwottsok'o danfte, ²⁶ P'awlosan <Ash kishon dozets aranots Izar Izewerotsiyaliye> ett Efeson s'uzitse bwoterawo muk' datsuniyere okoon Isiyi dats jamatse awuk'o ayts ashonton keweek'rat bí amanitsok'o it it tookon bek'aat it shishtsoniye.

²⁷ Eshe hank'on nofino b gac'ewoniye, manmec'ro bwoterawon Isiyotsnat dats jamatse ash jamo bin b ik'yiru een izar izewer Art'emis Ik'i moo dats baashon b ooroniye, bi een wotonwere bwonewoniye.»

²⁸ Ashuwotswere man boshishtsk'on fayat, «Efesontsu Art'emisiye eeniye!» etfetst bokuhi. ²⁹ Kitunuwere jamon shek'e bwutsi, ashuwotswere Mek'odoni datsatse shuwets P'awlosnton tohaat sha'iru b tooh gituwots Gayyosnat Arst'rokosn detsdek't geetsfere ash

ashuwots bokoeyiruwok bowos'i. ³⁰ P'awloswere ashuwotsok amoosh geyatni btesh, b danifuwotsmó bíamawok'o bobazi. ³¹ Isiy datsatsi naashuwotsitswere bshuntsuwotsitsi ik ikuwotsi P'awlosok asho woshat «Ashuwots ko'eyiruwok amr n be'erawok'owa» ett bok'oni. ³² Ashuwots dagotse wac'ro bteshtotse aywots eegosh bokoetsok'o dab danatsno bteshi, man jangosh iko ik keewo keewt bkuheere k'oshonuwere k'osh keewo keewut bkuhiri. ³³ Ik ik Ayhudi jirwots Iskndiri eteets asho ash dagotsere gifnidek't shinats bot'ntsi, ashuwotsitse ik ikuwots sheengshde'ere bmoshetuwok'o boizi, Iskendiruwere ashuwots s'k boetetuwok'o bkishon kitst bín kishit keewosh k'anbdek'i. ³⁴ Ernmó Iskendr Ayhudi bwotok'o ash jamwots bodantsok'on «Efesontsu Art'emis eeniye!» et fetst git sa'atok'osh ik k'aaron bokuhi.

³⁵ Bs'uwatse kitutsi guut'f naash eeno, ash asho s'k boaayituwok'o wosht hank'o bíeti, «It Efeson ashuwotso! Efeson kitutse beyiruwots, eenu Art'emis ik' moonat darotse oot'ts bí'aro bokotetuwok'owo jametsuwotsoke daneke. ³⁶ Han haalitwo konuwor bíaaltsotse s'k it eteetuwok'o, kááronowere gond keewo k'aloniyyere it atso kor itdek'tuwok'o geyife. ³⁷ Ik'i moo c'ayawotsnat noko Izar Izeweri c'ayawu gond keewono keewuraw ashuwotsi hanok dek'at waantee. ³⁸ Dimet'rosnat binton fa'a k'is' k'is'fuwotsi s'aamiru asho bbeyalowere angsh imet aawwots fa'ane, naashuwotsuwere fa'ane, manoke mooynee. ³⁹ K'osho it geyiru keewo bbeyaalmó nemon k'oorosh beyiru-

wotsn s'iiletuwe. ⁴⁰ Maniyere okoonmó hambets k'aleets keewo <Dimbiro tuuzre> err no s'aamirawok'owa shatituwe, <Baad'eyan eegat-sneya btuwi> err noon aatewor no aaniyituwo deshatsone» ⁴¹ Manowere ett kakuwets ashuwots bobad'ituwok'o bwoshi.

20

*P'awlos Mek'edoniyonat Grik datsats
bsha'atsok'o*

¹ Dimbro b neediyakon P'awlos amantsuwotsi ikok s'eegt izon boon bkup'iyi, boon jamik'ratnuwere Mek'edoni eteets datso maantsan bíami. ² B beshiru datsmanotsatsno amantsuwotsi ay izon kup'ifere Grik datso maants bíami. ³ Manokno keez shasho b teshi, maniyere hakon markabon Soriy datso maats amoosh bgawi, ayhudiyitsmó bín fayosh botutsok'o bdantsotse Mek'edoni weeron anoosh k'ut'bdek'i.

⁴ P'irhus naay Sop'at'ros Beriyotse, Arst'rokosnat Sikondusn Teselonk'en, Gayyosn Derben, T'imotiwos, Tikik'osnat T'rofimosn Isiyon binton tohaat boami. ⁵ Bowerere shin shino amt T'iroadn noon bokoti. ⁶ Noomó tush meyet baalio b beshiyakon Filp'isyusitse Markabats keshat úúts aawon bo bobeyiruwok T'iro'adayits bodat bíyokere shawat aawo nobeshyi.

P'awlos ili T'iroadn b nabtso

⁷ Torbanotsere shnts aawots misho tishde'er iknon moowosh nokakweyi, P'awlos yats gúrok'on bíametwootse ko'ets ashuwotssh b keewiri, b keewono talitiitso bborfetso

bgeezi. ⁸ No no ko'ets dadratse ay c'eesho fa'e bteshi. ⁹ Ewut'ek'isi eteets jawets na'iko meskotiyatse beedek'tniye b teshi, P'awlos b keewo b geezitsotse jawetsman tokri eeno detsbdek'i, tokro bin b datsotse keezl dadratsere dashan bdihi, ashuwots bok'awere k'irt bdatseyi. ¹⁰ Ernmó P'awlos oot't na'ats tuumt matdek't «And kashone b fa'oni biéti, tek'k'ayere!» bí eti. ¹¹ P'awlos dadrats aani kesh waat misho tiitsdek't amantsuwotsnton bmeyi, datso bgatsfetsosh ashuwotsnton keewefetst bteshiyakon k'azbíami. ¹² Ashuwotswere kashts jawetso moots dek'boami, mannowere ayidek't kup'bowutsi.

P'awlos T'iro'aditse Milit'i maants bíamtsok'o

¹³ P'awlosi markabots kindshosh nogawut-satse noo shinat markabots Asosits noami, man nok'aluwere P'awlos Asosits bborfetso b tu-foon amoosh bí ettsosh hank'o no k'alituwok'o noon b azaztsotsne. ¹⁴ Binton Asositse nongonkewor markabots bin kindshdek' milit'its maants towaat noami. ¹⁵ Yaats guurok'on manoke tuwat Kiyositse shinatse fa'a datsuwats markabon amnobodi, yaatsok'o Samos maants kimaat yaats guurok'on Milit'iyits amnobodi. ¹⁶ P'awlos Isiyotse t teyawok'wa ett Efesoniye beshat k'ay amo b geyi, man b k'aluwere P'ent'ek'ost'yi baaliyo Iyerusalemitse daatseyo gawut bteshtsotsna btesh.

Efeson Ik' máá eenashuwotsi P'awlos bs'egitsok'o

¹⁷ P'awlos Milit'itsere Efeson maants asho woshat Ik'i maa eenashuwotsi b s'eegiye, ¹⁸ Bíyok

bowatsok'on boosh hank'o bíeti, «Isiyots tkindts aawotstson tuut jam aawo itnton awuk'o tbeet-sok'o itwoor danfte, ¹⁹ Ayhudiwots tiats bo malts k'od'atse tuutson gondbek'o tiats b́bodaloru ttooko dashan detsonat eeponee doonzo fino t finefoni. ²⁰ Jebatsnowere it maa mootsnowere itsh tdaniyor itsh t'ak'amitu jamoni tkeewi bako eegoru itsh t shapitso aaliye. ²¹ Ayhuidiyotsi wotowa Ik' ash woterawwots naandrone err Ik'o maants bo aanituwok'o doonzo Iyesus Krstosi bo amanituwok'oye b́gawi. ²² Andoor bíyok tbodor tiyats bodetwo eeg b́wto t dartsotse s'ayn shayirosh aleyat Eyerusalem maats ti amoniye. ²³ Wotowa eree kit kitotse tipewonat gond bek'on taan b́kotiruwok'o S'ayin shayiro taash keewure. ²⁴ Doo shishi keewo Ik' s'aaton daniyosh doonzo Iyesusoke t k'aaútdek'ts fino tishink'ere t kashi jango k'awuntsots gerawunk'e, t kashoshowere kis'o deshawnk'e.

²⁵ «Andish b́borfetso it jamets dagotse ananat Ik'i mengsti jango t nabiri, haniyere okonomó ititsere konuworu t shiitso b́ jamon b́ be'awok'o danfee. ²⁶ Mansh ititsere ikdonzworu b́t'afiyal b́ s'atsotse taan aaterawok'o hambets aawon itsh danirwe. ²⁷ Ik'o bí'asabts jamo itsh keewuni tishi bako eegoru t oorits keewo aaliye. ²⁸ S'ayn shayiro jintswotsi woshdek't iti naashire, eshe it tokonat it jiniru gizi s'eeni jangosh it atso korde'ere, Ik'o b́ naay s'atson keewudeb́k'ts Ik'i moo korere. ²⁹ Taa ti amiyakon gizi s'eenosh máác' k'ewerawo elahok'o maac' kup' wotts ashuwots bits bokindituwok'o danfee. ³⁰ Mank'owore ash

ik ikwots ititse tuur k'úúr daniyo daniyir ayi amantsuwotsi bomaants geetsitune. ³¹ Eshe it ik iketsi keez natosh t'úwonat aawon ti aac'uwo kuut'fetsat itn ti'iztsok'o gawufetsr itatso korde'ere.

³² «Andoor iti kup'shr S'ayinwots dagotse rstiyo imosh falitu b's'aati aap'onshowere adaro iti imre. ³³ Taa kon ambaaronowere, awntsonowere wee taho tewunratse. ³⁴ T took kishon finefetsat ttooko wotowa ttohuwotsi t tep'fok'o it tookon danfte. ³⁵ <Dek'iruwoniyere bogo imiruwu deereke> etiru doonzo Iyesus aap'tso gawufetsr, nokishon angmaawtswotsi tep'o noosh b geyituwok'o ay weerindon itsh kitsre.»

³⁶ Maniyere hakon P'awlos jametsuwotsnton tuk'maldek't Ik'o b'k'oni. ³⁷ Jametsuwots eept P'awlosi matdek't bojoobi. ³⁸ Dabtnu aydek't shiyanatnuwere, «Haniyak tshitso be'atste» boosh bí'ettsatse tuutsone, Markabok b borfet-sosho bín bodeni.

21

P'awlos Iyerusalem maants bíamtsok'o

¹ Boo'atse nok'aleyakon Markabats keshdek'at kawon K'osi eteets ats k'aron gúrts datsuk noami, yats guúrok'on Rúdi eteets ats k'aron gúrts datsuk nobodi, manokno P'at'ray eteets kitots no'ami. ² Manokno Fink'e datso maants amiru Markabu daatsat biyats keshdek'at sha'osh notuwi. ³ K'op'ros aats k'aron gúrts datsu no-giro maants k'azk'rat Sori datso maants amaant

Tiros aats k'ari gúroki datsuk no'ami, mark-abunwere bkuro manok orsho bín geyfe bteshi. ⁴ Manokere amantsuwotsi geeyat nodatsiyakon bonton shawat aawosh manoke noteshi. Bowere S'ayn shayiron jisheyat P'awlossh «Iyerusalem maants amk'aye» ett bokeewi. ⁵ Manoke no ja'ats aawman b́ s'uwutsok'on boatse k'aleyat sha'o notuwi, jametsuwotsuwere bomááts máátsonat bonana'uwotsnton wotat kitoniyere nokeshfetso noon bodeni, aats k'ari gúrats tuk'maldek'at Ik'o no k'oniyakon nok'aleyi. ⁶ No jamiyakon no markabots no nokindre bo bomoo maants k'az bo aani.

⁷ T'rositse tuwat P'et'elemays maants no-bodi, manokno amantsuwotsnton gonkeyat jamo no'ateyakon bonton ik aawo nojini. ⁸ Yaats guurok'on manokere keshat K'isariyo maants no'ami, bíyokno shawat Dak'oniyotsitsere ik wottso doo shishiyo nabiruwo Filp'os meyits kindat binton nobeyi. ⁹ Bíwere bek'on keewo boosh imets awd baar nana'a mááts amawwotsi detsfe b́teshi. ¹⁰ Ay aawosh manokere nobe-manoor Agabosi eteets Nebiyo Yhud datsatse b́weyi. ¹¹ Nebiyanuwere nook t'int, P'awlos edo k'aaúdek't b́ took kishonat b́tufuwotsi tipt «S'ayin shayiro eedan doonzi Iyerusalemn fa'a ayhudyots hank'o tifde'er Ik' ash woteraw-wotssh beshide'er imetune etfe» bí eti.

¹² Man noshishtsok'on noowere manoke fa'a ashuwotswere P'awlos Iyerusalem maants bíamawok'o nok'oni. ¹³ P'awlosmó «Hank'o eepat eegishe tnibo shiyanon it tiitsiri? Taa

doonzo Iyesus shúts jangosh Iyerusalemitse tipee mec'r b'woterawo k'irosh k'andek'ktaane» ett bíaaani.

¹⁴ Bo izono de'atse bíere «Beree doonzo bíettsok'o wotowe» etaat k'aznok'iri.

¹⁵ Manokno muk' aawwotssh noteshiyakon nok'ac'o k'anidek'at Iyerusalem maants noami.

¹⁶ K'isariyitse fa'a amants ik ikuwots noon-ton tohaat boweyi, boowere Mnason meyts nokashdek'etwok'o b'moo maants noon bojishi, ashaamanwere shini amantso K'op'ros datsatse shuweke b'teshi.

P'awlos Iyerusalemitse Yak'obnton bogonket-sok'o

¹⁷ Iyerusalemits nobodtsok'on amantsuwots geneúwon noon bodek'i. ¹⁸ Yaats guurok'on

P'awlos noonton Yak'obok bíami, Ik'i maa eenash jamwots manokna botesh. ¹⁹ P'awlos jamet-

suwotsi jamo baatiyakon b'weeron Ik'o Ik' ash-woteraw ashuwotsitse b'k'alts jamo ik ikon b' keewi. ²⁰ Man boshishtsok'on jametsuwots

doonzo bouidi, P'awlosshowere hank'o boeti, «Eshuwonoo! ay kumon taawetu amantsu-

wots ayhudiwotsitse bo beyiruwok'onat jametsuwotswor bo nemosh okooretsuwotsi bowottsok'o danfnee, ²¹ Nee Ik' ash Woteraw ashuwot-

sitse beyiru ayhudiyi jamwotssh <It nanaúwotsi gofo damik'ayere wee nemok'o fink'ayere> etaat

daniyat Muse nemo b' gahituwok'o nk'aliri ett keeweyirwo bo shishrne. ²² Eshe eeg k'ale b' geyiyiti? n woono ariikon shishrne, ²³ Eshe no

no'etetuwo k'aluwe, noyitse wosho detsts awd ashuwots fa'ane. ²⁴ Boon de'amr bonton wotar ntooko s'ayintsuwe, botook s'iuro bos'agetuwok'o Ik' moosho imet mebi gizonoo nee boosh daye, hank'o n k'aliyal níats keewets jamo k'awuntsalk b'wottsok'onat neewere n tookon Muse nemosh alek nwottsok'o jametsuwots danetunee. ²⁵ Ik' ashwoterawwots jirwotsitse amantsuwotsmó Woteraw ik'osh b t'intsootse kiimts woshi misho maak'ayere, s'atsonowere maak'ayere, guuk'at k'irts gizi meetso maak'ayere, widats wokoore ett guutt'eets keewu detsts woshi work'ato guut'dek'at itsh wosherone.»

²⁶ Maniyere hakon P'awlos ashuwotsi dek'amt yaats guurok'on b'tooko b's'ayintsi, bos'ayinet aawwots awur bo s'uwitwok'onat ik ikuwots jan-goshowere Ik'osh imet mabi gizo b dashet gizwo awur b'wottsok'o daniyosh Ik'i moots b'kindi.

P'awlos Ik'i mootse b'detseetsok'o

²⁷ Shawt aawu manu beshosh b'tintsk'on Isiyon waats ayhudyots P'awlosi Ik'i mootse bobek'tsosh ash jamo b'yats tizt bín bodetsi, ²⁸ «Israe'el ashuwotso! noosh gaatsowere! no ashonat no nemon, beyokanowere c'ashfetst dats datsatsi ash jamonowere daniruwo ashaaniye, hanuwere boratse ett Ik' ash woteraw ashuwotsi Ik' moots kindsht s'ayin beyokan k'imhsre!» ett bokuhi. ²⁹ Hano boetuwere maniyere shin Efesonn shuwetso T'rofimos binton kitotse bek't boteshtsoosh P'awlos bín Ik' moots dek't b'kindtsok'o boosh bíarernee.

30 Kit jamunwere dimbir bwutsi, ash jamonuwere wos'fere ikwotdek't waat P'awlosi detsdek't geetsfere Ik'i mootse bokishi, Ik'i maa fengeshuwotswere iknun is'ebowutsi. 31 Ashuwots P'awlosi úd'osh bogeetsok'on «Iyerusalem kitu bjamoon dimbir bwutsi» etiru wosho Rom datsatsi kes' naashok bbodi. 32 Mansh bí kes'fuwotsnat bali naashuwotsi bshuutsats jishdek't ashuwots maants kaari wos'fere bíami. Ashuwotswere kes'fuwotsnat boon jishiruwon bobek'tsok'on P'awlosi jot'o k'azbok'iri. 33 Jishiruwonuwere P'awlosok t'int detsdek't git habliyon btipetuwok'o bíazazi, maniyere hakon koni bwottsok'onat eeg bk'altsok'owo danosh geeyat bíaatí. 34 Ash ashonwere ik ikwots ik keewo boere k'oshuwotsuwere k'osh keewa boetfera botesh, azazirumanwere ash ash kuhatse tuutson ari keewo dano bmaawtsotse P'awlosi kes' kes'fuwots kot bokotiru gimbiyok de'er boametuwok'o bí azazi. 35 P'awlos bíyats need'dek' dambaan kesheyirwok bbodtsok'on ash jamo ayidek't bfaytsatse tuutson gondo biats betsosh bogeyiruwosh kes' kes'fuwots bín kurdek't k'azboami. 36 Ash ashonwere «Bín úd'ewe» etfere bshuutso boshai.

P'awlos boosh keewudek't aaniyi bdek'tsok'o

37 Kes' kes'fuwots bo koti gimbiyok bín kindshosh bot'intsock'on P'awlos kes'iruwots abaatse alirwosh «Ik keewo neesh t keewituwok'o eekituneya taasha?» bí eti. Altsmanuwere «Grik dats noon keewu keewo danfiya? bí eti. 38 Eshe, and karnon fayó tizat awd kum kash úd'tswotsi

woruwu maants dek't t'afts Gbs' asho nenal-neya?»³⁹ P'awloswere «Taa Kilk'iyitse fa'a daneek wotts T'erses kitutse shuwets Ayhudi ash taane, oona neesha ashuwotssh t keewituwok'o taash eekowe» bí eti.

⁴⁰ B keewituwok'o b ekses'on P'awlos bíyatsneedeyiruwats need'dek't ash ashuwots s'ik boetetuwok'o bkali, ash asho s'ik boettsok'on Ibrayist'iyi noon keewon hank'o ett keewo dek'btuwi.

22

¹ «Ti eeshuwotsnat tnihotso! eshe and itsh tt'intsiru aani tdek'etuwo tiko k'ewere!»

² Ibrayist'i noon keewu keewon b keewufere boshishtok'on iki s'k etbowtsi, P'awloswere bkeewiru keewo b need'irawo hank'o bí eti.

³ «Taa Kilk'iyitse daatseyiru T'erses kitotse shuwets ayhudiwi taane, tienmó Iyerusalem Kitmanitsne. Taan danifonuwere Gemalyailiye bteshi, nih nihwots nemono shengshdek'at danre, hambets it k'aliruwank'o Ik'osh ookorona tfinefoni. ⁴ Krstni imneti shuuts sha'iryiru jamwotsi k'irosh borfetso t gishfoni, nungushuwotsnat máátsuwotsh tifde'er tipi moots bokindituwok'o twoshfoni. ⁵ Manuwere ar bwottok'o kahni naashonat eenashuwots taash gawitune. Eshe Demask'on fa'a ashaanotsi tifde'er Iyerusalem maants dewar boon Seziyosh taan falituwo Demask'on fa'a jirwotsoke guut'ets worek'ato tdek'iyie boowokne.

*P'awlos Krstos maants awuk'on bíantsok'o
bkeewutsok'o*

(Wosh. 9:1-19; 26:12-18)

⁶ «Taa Demask'o maants amfetsat kituk tt'inferere aawu taalon t gawuraniyere een shááno darotse t gúratse b́goli. ⁷ Manoor dattsats dihi twutsi, <Sawulo! Sawulo! eegishe taan ngishiri?> etiru k'aaro tshshi. ⁸ Taawere <Doonzono! kone nee?> t eti, biwere <Taahe nee ngishiruwo Nazrettso Iyesus taane> bí eti. ⁹ Taanton beyiru ashuwotswere shaanmani bobek'i bako taan b́keewiyor b́k'aaro shiyatsne. ¹⁰ Taawere <Doonzono! eeg k'aluta!> t eti. Doonzonuwere <Tuur Demask'o maants amee, k'alo neen b́geyit keewu jamo manoke neesh keewetuwe> bí eti. ¹¹ Shanman goltsatse tuutson bek'o tfalrawotse taanton teshts ashuwots tkisho detsdek't taan jishfere Demask'oyi bobetsi.

¹² «Manoke Hananiy eteef ash iko fa'e b́teshi, Demask'oyitse beyiru Ayhudi jamwotsoke udetso, Muse nemo kottsonat shayiri ashe b́teshi. ¹³ Bí waat t ganok need' dek't <Tieshu Sawulo! ni'aawo aani be'e!> taash bíeti, manorun tiaawo b́ bek'i, b́nowere tbek'i. ¹⁴ Bíwere hank'o taash bíeti, <Nonihotsko Izar Izeweriye bíettso ndanetuwok'o kááwono be'er b́k'aronowere nshishetwok'o shin shino neen marat'ere, ¹⁵ Man b́k'aluwere b́n bek'aat nshishtsotse ash jami shinatse b́ish gawu nwtotise. ¹⁶ Eshe and eebi nkotiri? tuur b́shútso s'eer gúpeyowe, nmorratsnowere mashowe.>

¹⁷ «Maniyerehakon Iyerusalem maants aanat Ik'i mootse Ik'o tk'onfere tgitsotse t'iwintson bek'o tbek'i. ¹⁸ Doonzonowere taash be'eyat <Nee

t jangosh n imet gawo bode'awotse nja'arawo káári Iyerusalemitse kee> bí eti ¹⁹ Taawere hank'o tieti, <Doonzono! Ayhudi Ik' k'oni maa mootse neen amants jamwotsi t tipt-sok'onat tjot'tsok'o bo botookon danfnee. ²⁰ N gawu teshtso Ist'ifanos úd'ewor taawere ttookon úd'iruwots ganok need'dek'at bonton keewu-manats shiyeyatniye tteshi, botaahono tekotfere bteshi,> ²¹ Doonzonuwere <Wokooke fa'a Ik' ash Woteraw ashuwotsok neen twoshitwotse tuur amee!> bí eti.»

P'awlos Romitse shuwets bwottsok'o

²² Han b borfetsosh ash jamwots P'awlos keewiru keewo bok'ebfere boteshi, manyire hakon bok'aaro eenshdek't, «Hank'o ashaan datsatse t'afuwe! hank'o ashaan kashon beyo bísh geyiratse!» ett bokuhi. ²³ Bowerre kuhefetst botaho shap'fetst shawono darots bobad'ri. ²⁴ Altsonuwere man b bek'tsok'on P'awlosi kes' kes'fuwots galots bokindshituwok'o bíazazi, ash ashonwere eegosh hank'o bíats bokúhiruwok'o danosh jod'fetsr aatetuwok'o bíazazi. ²⁵ Ernmó shaak'on tifde'er jot'osh bok'anefere P'awlos bganoke need'iru bali naashosh «Rom dats ash iko tafiyalo njot'etuwok'o neesh faletuwá?» bí eti.

²⁶ Bali naashonuwere han bshishtsok'on alirwok amt «Eeg k'alishe? Ashaan Rom datsi ashe!» bí eti.

²⁷ Mansh alirwo P'awlos maants t'int «Ab taash keewe, nee Rom datsatsi ashneneya?» bíeti, bíwere «Ee taane» bí eti.

²⁸ Azazefonuwere «Rom dats ashok'o taaweyosh ay gize tkishi» bíet, P'awloswere «Taayere Rom dats asho woto tdaats shuweyonee» bí eti.

²⁹ Mansh bín aatosh k'andek't teshts ashuwots manoor bíyatse k'azbowoki, azazirwonuwere Rom dats asho habliyon b'tipo danb'k'rtsok'on shatb'wtsi.

P'awlos ayhudiwotsi mooshiyiruwots shinats b t'intsock'o

³⁰ Yaatsok'on azaziruwo, ayhudiwots P'awlosi bos'amitso arikon eegosh b'wottsok'o dano b'geyi, mansh kahni naashuwotsnat mooshiruwotsitsi jamwots bokakuweetuwok'o bí azazi, P'awlosnowere bits dek'amt boshinaats bí t'intsi.

23

¹ P'awlos moosheyiruwok kakuweetsuwotsi t'iwintsdek't s'iilt «Ti eshuwotso! hambetsish b borfetso jam aawo Ik'i shinatse sheeng beyon tbeetsok'o t nibon danfee» bí et. ² K'eesi naasho Hananiyimó P'awlos noono botogetuwok'o P'awlos ganoke need'iru ashuwotsi bíazazi. ³ Manoor P'awlos Hananiyish, «Nee nooron futets maa dir artsono! nenowere Ik'o togetuwee! nemok'on tjangosh angshosh beedek'atniya nemalon taan botogetuwok'o ni-azaziri?»

⁴ Manoke teshts ashuwots P'awlossh «Ik'i kahn-wots naashoneya nc'shiri?» boeti.

5 P'awloswere «Ti eshuwotso! kahaniwot-satsi naasho b'wottok'o danatse b'teshi, manwere eegoshe <Ni ashaatsi naashatse gondo aap'k'aye> etiruwo guut'ere» bí eti.

6 P'awloswere manoke fa'a ashuwotsitse k'atsuwots Seduk'awiya etetsuwotsi k'atsuwotswere feresawi etefuwotsi bo wotok'o dant «Ti eshuwotso! taa feresawi etetswotsatse feresawi taane, hamb! and angsheyiruwo tt'iniye noosh jangit imets k'irotsé tuwi jangoshe» ett b' k'aaro eenshdek't mooshiruwoots taalotse b' keewi.

7 P'awlos han b' keewutsok'on feresawiy-otsnat Seduk'awiya etefuwots dagotse fayó tuut mooshiruwootsi gitok kay b'k'ri. 8 Seduk'awiya etefuwots «K'irotsé tuwo aaliye, melakiywotswere aalne shayironwere aaliye» boere feresawiyotsmó «Jamanots fa'ane» ettniye boamanefo. 9 Manoor dimbri eeno wotb'wtsi, ferisawi jirwotsitse ik ik nem danifuwoots tuwut «Noo ashaanatse eegoru gond keewo daat-sratsone, Shayro wee melakiyo b'ish keewure b'wotiti, no eegoru danatsone?» ett bomooshi.

10 Fyonuwere kup'efere bíame ashuwots P'awlosn yec' yec'ay tiish ishitune ett shatt azaziruwo «Od'er P'awlosi ashuwots dagotse kishde'er woowere! kes'fuwoots galots dek' boami!» et wotaderwotsi bíazazi.

11 Yatsok'ono t'úwun doonzo P'awlos ganok need'dek't «Shenono! Iyerusalemn taash n

gawutsok'o, mannk'o Romits taash gawo neen geyituwe» bí eti.

P'awlosi úd'osh maletsok'o

¹² Datso b gatstsok'on ayhudiwots kakuweewutsat «P'awlosn noo úd'ranियere mááyo máárátsone, aatsono úyatsone» ett botaareyi. ¹³ Malaanats shiyeets ashuwots taawonwere haboniyere bogfno boteshi. ¹⁴ Boweré kahni naashuwotsnat eenashuwotsok amt hank'o ett boosh bokeewi «P'awlosi nó úd'ranियere maayo nonots nogerawok'o kup'shdek'at taareerone, ¹⁵ Mansh it mooshiruwotsnton shiyede'er kúp'de'er bín it aatit keewok'o aride'er P'awlosi itsh bodewetuwok'o azaziruwo aatuwere, noowere hanok b borafstere shinon úd'osh k'andek'rone.»

¹⁶ Ernmó P'awlos mish naay mal man bshishtotse kes' kes'fuwots galots amkindt P'awlossh bkeewi. ¹⁷ P'awloswere bali naashuwotsitse iko s'eegdek't «Na'an kes' azaziruwosh bkeewit keewo bdetstsotse bíyokde'er t'ine» bí eti. ¹⁸ Bali naashonuwere na'aman azaziruwok dek' kindt «Tipetso P'awlos taan s'eegt na'an neesh bkeewit keewo bdetstsotse niyok t t'intsituwok'o taan bk'oni» bí eti.

¹⁹ Azaziruwonuwere na'o kisho detsdek't okaan dek'amt, «Taash nkeewituwo eebi?» ett bíaaali bíaaati.

²⁰ Na'onuwere hank'o bíeti, «Ayhudiwots P'awlos keewo kasidek' k'ebiruwok'o araat yaats mooshiruwots shinaanats boosh nt'intsituwok'o neen aatosh ik wotwutserne. ²¹ Ernmó boosh eekfne, bín noúd'raawo mááyo márátsone,

aatsonowere úyatsone ett taarts haboniyere bogts ashuwots bín úd'osh aashdek'rne, and bo bokotir boosh nkeewituwo s'uziye.»
²² Azaziruwonuwere «Keewan taash n keewutsok'o konshor daniyik'aye» ett na'o deen bk'ri.

P'awlos dats k'eezirwo Filiks shinats bt'intsok'o

²³ Maniyere hakon kes' azazefman bali naashwotsitse gituwotsi s'eegdek't «Ilitsi keez sa'ato bwottsok'on K'isari maants git bal kes'fuwotsnat shab farshetsuwotsi, git bal gin shap'fuwotsnowere k'aniwere,
²⁴ P'awlosshowere farsho it k'anire dats keewiruwok Filksok jeenon bbodetuwo'k'o woshwore» bí eti. ²⁵ Hank'o etiru woshonowere work'atats guut' bk'ri, ²⁶ «K'elawudiyos Lusyosoke, mangts dats k'eezfo Flkissh! jeeno neesh wotowe! ²⁷ Ashaan ayhudiwots detsdek't úd'oshe boteshi, taamo Rom dats ash bwoto tdantsosh kes' kes'fuwotsnton bodat bín t wooriyi. ²⁸ Eegatse tuutson bos'aamitsok'o danosh geeyat mooshiruwotsok t'intsree bteshi.
²⁹ Bos'amiwere bo nematse tuuts keewon bwottsok'o tdaatsi, ernmó k'irosh wee tiposh bín betsit keewo aaliye. ³⁰ Ashaan údosh maletsok'o tshishtok'on manoor níyok twoshi, s'amiruwotsuwere biyatse bodetsts s'aamiyo nshinatse bot'intsituwo'k'o boosh keewure.»
³¹ Mansh kes'kes'iruwots boon azazetsok'o Pawlosi t'úwon dek'amt Antip'at'risok bobetsi.
³² Yatsok'on Farshetsuwots P'awlosn ton boametuwo'k'o wosht boowere k'es' kes'fuwots gálo maants k'azboani. ³³ Farshetsuwotsuwere

K'isariyo bo bodtsok'on worek'atats guut'ets woshman dats k'eziruwosh imt P'awlosi bshinats bot'intsi. ³⁴ Dats k'eziruwonu worek'atats gút'ets woshman bñababi hakon P'awlossh Aawoki dats ashnene? ett bíaati, Kilik'iy dats ash b woto b dantsok'on ³⁵ «Neen s'amiruwots boowor njango shishetuwe» bí eti. Herodis mengst moots b koteetuwok'owere bíazazi.

24

Ayhudiwots P'awlosi bo s'aamitsok'o

¹ Úúts aawoniyere il kahni naasho Hanani eenash ikikuwotsnat T'ert'elusi eteef Nemo sheengshdek' dantsonton K'isari maants bíami, boowere dats k'eeziruwo Filiksok t'int P'awlosi bo s'aami, ² P'awlosi s'eegdek't t'intsetsok'on T'ert'elus hank'o eton s'aamiyo dek't bñuwi.

«Shiimetso Filikso! niyatse tuwtson ay jeeno daatsrone, n sheeng k'eezonowere noashosh sheeng wonewo daatsere, ³ Ayidek'at mangtso Filikso n k'alts sheeng keewan jamoke jam weeron een údone nodek'iri. ⁴ Andmó t ja'irawo k'awunon neesh t keewit keewo n doon noon nk'ebetuwok'o neen k'oniruwe, ⁵ Ashaan noosh gondshoodo wotwutsere, datsatse fa'a Ayhudi jamwotsats dimbiro bñuuziri, noimnetiy-atse k'aldek'ets naazrawiwotsi eteefwotsshowere boon jishirwooniye. ⁶⁻⁸ Ik' moonowere kimshosh bíetfere bín nodetsi, bíyats not'intsts s'aami jaman ar b wottsok'o nee ntookon bín aatr dano falitune.» ik ik bitsuwotsitere han boyits dabfno [No nemok'on bíyats angsheyish gawurone bñeshi, Ernmó gin jishiruwo Lusyos waat angnon

nookishotse fos'dek't bíami, bín s'aamirwotsu níyok boweetwok'o bíazazi] ⁹ Ayhudiwots «Jam keewan aree» Etfetst s'amiyosh ik wotbowtsi.

P'awlos Filiks shinatse keewdek't aani bdek'tsok'o

¹⁰ Dats k'eeziruwo Filiks b́kishon kolat P'awlos b́ keewitwok'owa bíeti, P'awlos hank'o ett bíaaníy.

«Ay dúrosh datsan keewutso nwoto tdantsosh taan s'amiyets keewosh aani tdek'etuwok'o nshinaats tt'intSOR ayidek'at geneeúwefetsatniye, ¹¹ Ik' k'onosh Iyerusalem maants ti'amron tатse git aawoniyere b́bowok'o nee ntookon danofalfnee, ¹² Ik'i mootse wotowa ayhudiwots Ik' k'oni mootse wee kitotse kontonuwor t mooshfere wee asho dimbirosh ttuuzfere taan daatsratsne, ¹³ And tiats bot'intsts s'amiyosh gawo b́jamon neesh t'intSosh falratsne. ¹⁴ Ernmó han neesh kish kitso shunfee, bo kooti dana bo etiru imnetiyi kayo no nihotsko Izar Izeweri Ik'irwe, Muse nemonat Nebiyiwots mas'aafotse guut'ets jamo amanirwe. ¹⁵ Boweré bojan-girwok'o taawor kaawwotsnat morretsuwots k'írotse botuwitwok'o Ik'on jangirwe. ¹⁶ Mansha Ik'onat ash shinatse nib s'ayino tdetsetuk'o jamaawo kup'irwe.

¹⁷ «Iyerusalemitsnowere tkeshiyak ay natuwots bobeshiyakon t jirwotssh tep'wotit gizonat Ik'osh imet mebi gizo dek'at tweyi.

¹⁸ Ik'o mootsnowere taan daatstsuwots man tk'alfere, manoori gizeyonuwere s'ayini fino fin tk'rtsok'one, taantonuwere ay asho aaliye

ḅteshi, dimbironwere tuuratse. ¹⁹ Ernmó Isiyon waats ayhudiwots manoke fa'ane boteshi, bo taan bos'aamit keewo detsfno wotiyal nshinaats t'inr keewune. ²⁰ Haniyakonowere moosh mooshiyiruwots shinats tt'iinoor t t'afitso fa'ewotiyal t'intshashaanots keewune. ²¹ Arikon bo taalotse need'dek'at <K'irtsuwots tuwo fa'e tittsosh hambets angshosh it shinats t'inre> etaat een k'aaron keewure, haniyere okoon k'osho tk'alts keewo aaliye.»

²² Filiksmó Krstiyani imnetiyi jango sheengshdek't ḅdantsotse «Kes' azazefo Lusyos ḅwaatsok'on itjangosh angshituwe» ett boon deenḅk'ri. ²³ P'awlosi kotiru bali naashoshower «Ayide ḅ kic'irawonat ḅ jaguwotswere bish k'alo bogetso baziyerawon ḅkotetuwok'wa» bí eti.

P'awlos Fliknat Drusila shinats ḅt'intshashaanots

²⁴ Muk' aawwotsiyere hakon Filkis Dursili eteets ḅmááts ayhudiyunton ḅweyi, P'awlosnowere s'egiydek't Iyesus Krstos shútson amani jango ḅkeewufere ḅshshi. ²⁵ P'awlos kááwu woti jangonat took kewdek'i jango weet angshonowere ḅkeewor Filiks shatt «And k'ayamee, taash ḅk'anoor k'osh aawots neen s'eegituwe» bí eti. ²⁶ Filiks P'awlosoke gubo dek'osh jangitniye ḅtesh, mansh ayoto P'awlosi s'eegiyir ḅkeewifoni.

²⁷ Git natoniyere okoon P'ork'iyos Fist'os Filikis shegro ḅbeyok ḅbeeyi, Filiks ayhudiwotsi geneúshosh geeyat P'awlosi ḅ tipetsok'on k'azḅk'ri.

25

P'awlos Fist'os shinats bt'iintsok'owo

¹ Fist'os bí alguro K'isariyotse kindt keez aawo b teshiyakon manokere Iyerusalm maants bíami ²⁻³ Manoknowere kahni naashwotsnat ik ik een een Ayhudi jirwots Pawlosats bo s'aamiyo bot'intsi, «P'awlosi Iyerusalemi deewaár noosh sheeng keewo k'aluwe» ett bok'oni, han boettsonuwere P'awlosi weerindatse korde'er úd'osh bo geetsotsne. ⁴ Fist'osmó «P'awlos K'isariyon tipi mootsne koteyiri, taawere kaari and aanar bmaants ametuwe, ⁵ It naash naashuwotsuwere taanton K'isariyo maants amnee, P'awlos b fints gond fino kbeyal manoke s'amiwune» bí eti.

⁶ Fist'os shmt aawoniye wee tats aawoniye bowawu aawwotsi bonton b beshiyakon K'isariyo maants no ami, manok nobodtsok'on yaatsok'on naashi jorats bedek't P'awlosi bíyok de'er bot'inetuwok'o bíazazi. ⁷ P'awlos b t'iintsok'on Iyerusalemn waats ayhudyots gúrdek't need'at gaawu deshaw ay een een s'amiyotsi bí'ats bot'intsi, ⁸ P'awloswere «Taa ayhudyots Nemats wotowa Ik' maats wee Rom nugúsats t fints gond fino aaliye» ett bí'atse bíaniyit keewo bkeewi.

⁹ Fist'osmó ayhudyotsi geneúsho geeyat P'awlosi «Iyerusalem maants amr han jangosh manoke tshinatse angsho dek'osh geefneya?» bí eti. ¹⁰ P'awlosmó hank'o ett bíaani, «Hambe! taa bshinaatse mooshosh Rom nugúso angshi jori shinatse t need'iri, nee sheengsh dek'at ndantsok'on ayhudyotsats t fints gond fino

aaliye. ¹¹ Morretso twotiyal wee k'irosh betsit fayó tiats betsit morro finere wotiyal woruna eraatse, ernmó bo s'amiyan k'awuntsalka wotiyalmó konuwor bosh taan beshide'er imo falratse, taa Rom nugúsosh taash s'iilewe etaat t'intstree.»

¹² Manoor Fist'os bín izfwotsnton keewedek't «Romko nugúso taash s'iile etri wotiyal nugúso ametunee» bí eti.

P'awlos Agrip'nat bernik'e shinats bt'intstok'o

¹³ Muk' aawwotsiyere hakon Nogúso Agrip'nat Bernik'e Fist'ossh «Dan jeenon waarne» etosh K'isari maants boweyi. ¹⁴ Manoknowere

ay aawosh beyat boteshtsosh Fist'os P'awlos jango hank'o ett Nuguso Agrip'sh b keewi, «Filks tipk'rat k'az bk'rts ash iko hanoke fa'e bteshi, ¹⁵ Taa Iyerusalemitse tteshor kahni naashuwotsnat Ayhudi eenashuwotsn ashaan bos'amiye hakon bíats t angshituwok'o boaati.

¹⁶ Taamó «Ash iko bín s'amiruwots shinats t'inr bín bos'amirumansh bkeewude'aniyere s'amiyetsman beshide'er imo Rom datsatsi ashuwots neemaliye» etaat boosh tiaanyi. ¹⁷ Mansh ashaan s'amiruwots ko'eyat hanok bowatsok'on ja'araniyere yaatsok'on angshi jorats bedek'at

P'awlosi t shinats bot'intstuwok'o ti azazi, ¹⁸ Bín s'aamiruwots keewosh bganok need' bodek'tsok'on bí gond fino finere ett tgawtsok'o bín s'amiyosh betsit keew eegonoru bíats t'intratsne. ¹⁹ Ernmó binton bomooshiru moosho bo haymanoti jangonat k'irt teshtso P'awlos «Kashetsiye» bí etiruwo Iyesus jange.

²⁰ Taawere hannaari keewo s'ilosh taan bkic'ire

P'awlosi <Iyerusalem maants amr bíyoke keewan jango angsho daatso shunfiya?> tieti. ²¹ Bímó bí jango Rom nugúsoke bích s'ileyish geeyat nugúsok taash s'iilewe biéttsoh manok tdaamifetsosh tipi moots bteshetuwok'o tiazazi.»

²² Agrip'were Fist'ossh «Taawor ashaan bkeewufere k'ebo geefe» bí eti. Fist'osuwere «Yaats bín k'ebetunee» biét.

²³ Mansh yatsok'on Agrip'nat Bernik'e bo naashi taho tahdek't een baatson wotdek't kes'iruwotsatse naashuwotsnat kit kitotsi een een ashuwotsn deneyat waat angshi maa eenots bokindi, maniyere hakon Fist'os P'awlosi b s'eegi. ²⁴ Hank'owere biéti, «Nugúso Agrip'o! Itwere noonton fa'a ash jametsuwotso! ay-hudiwots <Ashaan haniyere hakon kashon beyo bích geyiratse> ett kuhefetst Iyerusalemitse, hanoknowere ti angshituwok'o taan boaattso it bek'iru ashaaniye. ²⁵ Taayere bíyatse k'irosh bín betsit gond fino daatsratse, bí Rom naashi naashosh <t jango taash s'iilewe> biéttsoh hanok woshosh t k'ut'i. ²⁶ Wotowa eree bjangosh t doonzsh tguut'etwo daneets keewo deshatsé, mansha s'ileyakon tguut'etuwo tdaat-situwok'owa etaat it shinats bitsnor iki Nugúso Agrip'o! nshinaats t'intsree. ²⁷ Tippetso danbaan dameeyor bí s'amiyets jango kits k'azo dartsi araatniye taash bbe'eyi.»

26

P'awlos Agrip' shinatse bkeewts keewo

¹ Agrip' P'awlossh, «N took jangosh keewundek'etuok'o taaro neesh imere» bíet, Pawlosuwere b́kisho jargdek't hank'o ett keewut aani b́dek'i.

² «Nugúso Agrip'o! Ayhudiwots taan bos'aamits keewujamosh hambets nshinatse keewur aani tdek'or ayiniye t geneúwiri.

³ Bítsnowere nee ayhudiwots niwonat moosh jamo t'iwintsdek'at danfnee, mansh k'amoon taan nk'ebetuwok'o neen k'onirwe.

⁴ «Na'ortson tuwat awuk'o t beetsok'owo ayhudiwots danfnee, shintson tuwat tiash ashi dagotsnat Iyerusalemitse t be beyo danfnee.

⁵ Ando aani gawo bogeyiyal no haymanotiwotse kup'idek'at nonemo kotiru kayuwotitse ferisawí wotat tbewok'owo shintson detst danfnee. ⁶ Andmó anghshosh hanok tneed'ir

Ik'o nonihotssh taart b́ imts b́ jangiítsoshee.

⁷ Jangiyetsanok bodosh no jir tatse gituwots Ik'o t'uwe aawo Ik'ifetstni bokotfo, Nugúsono! taawor ayhudiwotstn taan bos'aamits jangiyetsan jangatsne. ⁸ Ik'o k'irtswotsi b́tuuzitwok'o eegoshe itoke amano maawek b́woti?

⁹ «Taa t tookish Nazrettso Iyesus shútso tfalt-sok'on k'efo taash geyife etaat asaabefe b́tेशi.

¹⁰ Iyerusalemitse tk'altsonúwere haniye b́tेशi, kahni naashuwotsoke t dek'ts alon amantsuwotitse ayuwots tipimoots bokindituwok'o k'alre, boon bou'd'orowere úd'iruwotsnton ik wotere.

¹¹ Ayoto ayhudiwots Ik' k'oni mootse boon jod'r doonzo boc'ashetuwok'o woshfee, boon ayide fa-

yarnuwere k'osh úratsi kituwotsokor kesh ama at boon giishefe.

*P'awlos Krstos maants awuk'on
bíaantsok'owo b̄keewutsok'o
(Wosh. 9:1—19:6-16)*

¹² «Han jangosho kahni naash jamwotsoke alonat tzaziyo dek'at Demask'o maants tí amifere tteshi. ¹³ Nugúsono! weeratse t befere aawu taalon aawu sháánoniyere bogo sháánts shááno tbe'k'i, sháánanuwere tiyatso taanton sha'irwots gúúratso darotse sháániyi b̄k'ri. ¹⁴ Nounetswere datsats dih s'uwat nobefere ayhudiwots noon keewu keewon <Sawul! Sawulo! eegishe taan ngishiri? Shiki shashats nned'iyal neesh b̄ gonditi!> etiru k'ááro tshishi. ¹⁵ Taawere <Doozonono! nee kone?> tieti, doozonuwere, taash hank'o bíeti, <Taa nee ngishiruwo Iyesus taane. ¹⁶ Andmó tuur n tufoon need'owe, taa neesh tbe'eyiye and taan nbek'tsannat shino maants neesh tbe'et keewosh gútsonat gawo nwotitsh tgetsotsne. ¹⁷ Israe'el ash ashuwot-snat bo maants neen twoshit Ik' danawu ashuwots kishotse neen farituwe. ¹⁸ Bo aawo n k'eshituwok'onat t'aluwotse shááno maants nkishituwok'o Shed'anosh keeweewotsno Ik'o maants ni aanituwok'o woshituwe, boowere taan bo amantsi jangon bo morrosh orowa eto daatsitune, galdek'etsuwotsnton ritstiyo kay-dek'etune.>

¹⁹ «Eshe nugúso Agrip'o! daaratse taash imets bek'osh k'aztso woteratse. ²⁰ Ernmó shino Demask'on fa'a ashuwotsi, maants dabat

Iyerusalemnat Yhud dats jamatse, Ik' danawu ashuwotsi naandrone err Ik'o maants bo aan-ituwok'o tdaniyi, naandrone boettsok'ono kitsit fino bo finituwok'o boon tdani. ²¹ Han jangosh ayhudyots Ik'i mootse t befere taan detsdek't úd'osh boeti. ²² Hambetsish bborfetsosh Ik' tep'o tiyatse k'aleratse, manshe múk'osho enosho gawefetsat hanoke ned'iruwe, nebiywotsnat Musen shino hank'o wotituwe boetts keewo keewonyere okoon k'osho eegoru keewuratsé. ²³ Boweré bokeewu «Mesihyo gond bek'o dek'etuwe, k'irotsé tuwonowere shintso wotar kashi sháánono Israe'el ashuwotsnat Ik'i ash woterawwotsnsh kitsituwe» etniye.»

²⁴ P'awlos man keewoke bbefere Fist'os «P'awloso! ando geewutsernee, ay ndano neen geyomants betsk'rere!» ett kuhat bkeewi.

²⁵ P'awlosmó hank'o ett bíaniyi, «Ayidek' shiimetso Fist'oso! arikonat kaawu keewoni tkeewiri bako geeyaliye tgeyi. ²⁶ B shinatse keewan tkeewiru nugúso keewan danfee. Hanwere ashon k'alerawo b'wottsotse nugúso bdantsok'owo danfee. ²⁷ Nugúso Agrip'o! nebiywotsi amanirunosha? Ni'amaniruwok'o danfee.»

²⁸ Agrip'were P'awlossh, «Nee k'awun sa'atanitse taan krstiyani woshk'rishale» bí eti. ²⁹ P'awloswere, «K'awun gizewotse wotowa geenz gizewotse n s'uzi bwoterawon hamnbets tkeewuts keewo shishts jamo t tipeyaniyere okoon taank'o bowotish Ik'o k'oniruwe!» bí eti. ³⁰ Haniyere hakon nugúso, altsonat Bernik'ewu bonton bedek't teshts ash jamwots k'az botuwi.

³¹ Manoke kesht boamferowe, «Ashaan k'irosh wee tipewosh bín betsituwo eegoru k'alratse» boeti. ³² Agrip'were Fist'ossh, «Ashaan Rom nugúsoke tkeewo taash s'iilewe eto b k'azink'ere hank'on fakshk'ryank'e» bí eti.

27

P'awlos Rom maants bsha'ats sha'o

¹ It'ali datso maants markabon no ametuwok'owa eteetsok'on P'awlosnat k'osh k'osh tipetswotsn Rom dats k'eeziru Awugst'osi eteetso kes' jishiruwots kayotse teshtso Yuliyosi eteets bali abaatsi naashosh boimi, ² Isiyon aatsi k'ari gúratse markabi bíyok need'irwok amiru Adramit'yon markabats keeshdekat no sha'i, mek'odeni awurajotse fa'a Teselonk'e kitotsi asho Arst'rokoswere nontoniye bteshi.

³ Yaatsok'on Sidoni amnobodi, Yulyus P'awlossh sheengo bteshtsotse b shunfwotsok amt bish geyit tep'o bish bok'alituwok'owa bí eti.

⁴ Manoke tuwatnwere jongo noshinaatse noats b jongiruwotse K'op'rositse aats k'aritsi datsu te'o woshdek'at markabatsi sha'o dek'atnotuwi.

⁵ Kilk'iyanat P'infilio ganoke fa'a aats k'aro nokimiyakon Lik'iyanon fa'ú Mura kitto nobodi.

⁶ Manoke bali abaatse altso It'aliyomants ametuwo Iskndr markabo daatsdek't biats nokeshetuwok'o bwoshi.

⁷ Ay aawo t'awaash dek'at sha'at ay gond bek'on K'enidos kitu ganok amnobodi, jongonwere shinomaants noamawok'o noon bbazitsotse Selmona dats gúuri ganoke beshat k'ert'es aatson gúrets datsu naaydek'at noami.

⁸ Ay gondbek'on gúr gúron nobeshiyakon Lasiy kitu ganoke daatseyiru, «Markabi need'ok sheengi» eteef beyokuk amnobodi.

⁹ No weeratsnowere ay gizewo hank'on bís'uure s'oomi gizeyo bbeshtsotse manoor aats k'aratse sha'o ayidek' shatiko bteshtsotse P'awlos ashuwotssh hank'o ett bo atso bokotetuwok'o b́woshi, ¹⁰ «It ashuwotso! haniyak nosha'it sha'o shatiyits keewo bítse bbeyok'o taash be'eyiruwe, Kuronat markaboon s'uzats b́woterawo ash kashatsor kup'ts t'afonat s'uwu bodetuwe.»

¹¹ Bali abaatse altsonmó P'awlos izoniyere markabu azaziruwonat markabudoonz boetiruwoni b́ k'ebiri. ¹² Markabwots need'okman jooshi* kimoosh sheengo woto b́k'aztsotse ay ashuwots, «Shinomaants sha'arr faletkawotyal gaar weeron, muur aawukindomantsi fengesho maantse fa'o Fink'eyi eteefo K'ert'esitse markab ned'efok borr manoke joosho beshiwone» ett bo asaabiyo bot'intsi.

Aats k'aratse jongi eenon giwits aatso tuut-sok'o

¹³ Muur maantse muk' jongu b jongefere bobek'tsok'on boasaabtsok'o boosh b́wottsok'o bíarere markab b́n bojokiru bitsdek't aatsatse sha'o dek't botuwi, markabi ned'iruwoke tuut k'ert'es ganoke gúr gúron bobeshi.

¹⁴ Ernmó muk'i boteshiyakon, «Gaar maantsi aawu keshon eegurahi jongo» kup'ts jongo aats k'aro bin gúrts datsuatse tuut aats k'aromaants bomaants b́weyi. ¹⁵ Markabonwere

* **27:12** 27:12 Joosha: Medtrani datsatsi joosho t'k'mtn tuut yekatiti b́ boerfetsoni.

ǃgɨfɨnɨyɨtsonat jongmansh ǃmaawutsotse s'k etaat jongon jokeyat noami. ¹⁶ K'eda eteets aats k'aron gúrts datsu naaydek'at nosha'or ay gond bek'on Markabuko jelbo detsdekat nokishots geddek'o nofali. ¹⁷ Markab jookiruwots jelbu markabots geetsdek't bokishiyakon markabu gúridek't jokon bo s'aas'i, markabu Surtisi eteets shiyi datsu maants bdihirawok'o shatt sharo k'o'úbazt jongon jokefere boami. ¹⁸ Egúrahon were kup'efere bíamtsotse yatsok'on markabats kuryets k'ac'o ik ikon aats k'aromaants juwo dek'botuwi. ¹⁹ Keezl aawots markabi k'ac'o bokishon k'aaúdek't shap't bojuwi, ²⁰ Ay aawosh aawuno wotowa, k'eenno bo bee'awotse jongonwere kup'efere bíamtsotse haniyere hakon kashosh falatsonee ett maac'o k'ut'bodek'i.

²¹ Ashuwots misho ǃjamon bomarawo ay aawo boteshi, mansh P'awlos bodagots need'dek't hank'o bíeti, «It ashuwotso! taa tiettsso shishat T'ersesn turatste wotink'ere awaashonat t'af jamann itats borawnk'ee ǃtेशi. ²² Andoor markabo s'uzi awaashiti bako ititse konatsor t'afo boratse, mansha shenuwotso shatk'ayere! etaat itn iziruwe. ²³ Oots t'ú bík twottso bín t Ik'iruwu Izar Izewer ǃwoshts melakiyo t ganok need'de'k't ²⁴ <P'awloso! shatk'aye! Romko naashi naasho shinatse need'o neesh geyife! hambe neenton sha'iru jamo Ik'o neesha err k'írotse worituwe> ett taash keewure. ²⁵ Manshe it ashuwotso shatk'ayere! Ik'o taash ǃkeewuts jaman ǃjamon ǃs'eentsituwok'o bín amaniruwe. ²⁶ ǃwoteferemó jongo noon aatson gúrts dats ikuk de'amr juuk'rituwe.»

²⁷ Tatse aauwdl t'úwotse Adriyay aats k'ari

taalotse jongon jod'efe noamfere taali titson markab jookiruwots datsomants bot'intso'k'o boosh bíari. ²⁸ Mansha aats k'ari woko bín indeef joko dek't boindere dashan b'woko habigit indok'o wotat b'datseyi, muk'i boteshiyakon ando boindere shiits indok'o dashan b'geenztsok'o bodaatsi. ²⁹ Nomarkabo aats k'ari guúratse fa'a shutsuwotsats b'gawerawok'o shatt markabi shutsomantse markab bín jookef awdwotsi aatsots oorsh bok'ri, maniyere hakon t'úwo beshar bíere aawo boosh b'weetuwok'o Ik' k'ono dek' botuwi. ³⁰ Markabu jookiruwots markabutse kesht wos'o geeyat boteshtsotse markabu shino-maantse bín need'iyeyiru biro dashan juwiruwo araat markabutse fa'a jelbu aats k'aromaants bojuwi. ³¹ Manoor P'awlos bali naashonat kes' kes'fuwotssh «Markabu jokirwots markabatse giwuk'ayr bobeyala bako it faro falratste» bíti. ³² Mansh kes' kes'fuwots jelbu detsts joko k'ut'k'raat aatsats juubok'ri. ³³ Datso gatsosh bíetfere jametsuwots misho bo meetuwok'o P'awlos k'ont boosh hank'o bíeti «Eegonor mook'zat koto dek' it tuwiyako hamb hambetson tatse awdl aawe. ³⁴ Manshe maayo it nonots itgedetwok'oye iti tk'oniri. Mannowere faritute, it took s'irotse ikunwor dats fed'eratsatsane.» ³⁵ Man bietihakon misho k'aaúdek't jamishi-naatse Ik'o búdi, titsdek'tnuwere moo dek'btuwi. ³⁶ Mann jametsuwots kup'at misho bomeyi. ³⁷ Markabutse b' jamon git baalona shabe shrt ashuwotsn fa'ane noteshi. ³⁸ Jamwots máát boworiyakon Markabats kuriyets Sindeyo aatsi k'aro maats juwat bíyatsi kuro boketi.

Markabo btishtok'o

³⁹ B gatstsok'on bobodoko danatsno botesh, wotowa bako shiyo bítse be'eyiru aatsi k'aro bo bek'i, boosh bfaleyal markabu b maants gifnir úratse kishosh bogawi. ⁴⁰ Markabo bín bneed'iru bíro bítsdek't aats k'arots faksh bok'iri, manoor bín markabo jokeyiru jokono bítsbok'ri, man kaawats fa'a sharono jongo maants dambaan k'aaúdek't aatsi k'ari gúuro maants keshosh boami. ⁴¹ Ernmó markabu kakuwets shiyats bgaawetsosh dashan gúp'n bwutsi, bshino maantsno dashan k'ons'ewtsat giwo bk'azti, bshuutso maantsnomó jongi gifniyatse tuwtson tisho btuwi.

⁴² Tipetswotsitere ikonuworu wáákr bkeeyawok'o kes' kes'fwots úd'osh bogawi.

⁴³ Baalats naashonmó P'awlosi oriyosh bgetsotse boetts man de'atse, dab waak faltso shini markabots aatsi k'aro maants t'olar datsats k'ayi bokeshetuwok'o bíazazi.

⁴⁴ Oortsuwotsmó Markabi is'uwotnat markabi tishats bed'er bokeshetuwok'o bíazazi, mank'oon jamwots jeenon datsats bo bodi.

28*P'awlos maltayi eteets aatso bin gúúrts datsuatse*

¹ K'aznofariyakon biats nobodts aats gúrdek'ts datsu Maltayi eteefu b wottsok'o dan nok'ri.

² Aatson gúrts datsmanatse beyiruwots adits shuno noosh bokitsi, manorowere awusho bbuye ak' bwottotse tawo aat'idek't noon s'eeg dek't boibii. ³ P'awlos shooto kakudek't tawots bgedfere, k'ees'manatse tuutson dawunz ik

kesht bkishats deshwutsat joor bwutsi, ⁴ Malta dats ashuwots dawunzo P'awlos kishats joorat bbefre bek't «Arikon ashaan kash údk ashe! aats k'aratsi jongotse jeenon bkeshalor Izar Izewer angshotse oorot kashon beyo falratse» boeti. ⁵ P'awlosmó dawunzo taawots tebedek' juuk'rat eegor gondo bín b'datsrawo boori. ⁶ Ashuwotswere «Andemo andek'úna bíatso b'gaapiti, wee danerawon k'irr b'dihiti» ettni bokotfera botesh. Ernmó ayoto bokore bíats gondo eegoru bodo bk'aye bobek'tsotse boaasabiyo wonidek't «Hanuwo Izar Izeweriye!» boeti.

⁷ Manok noteshts beyok man ganoke aats gúrts dats mani altso puplyus datso fa'e btesh, ashaan b meyits nondek't keez aawosh sheengshdek't noon b ibiyi. ⁸ Manoor puplyos nih atsik'es'onat ac'uwoo bín detsbde'e shoodtni bk'eyiri btesh, P'awlos bíyok kindt Ik'o b'ish bk'oni, b kishonowere bíats geddek't kashiyibk'ri. ⁹ Man bwotiyakon aatson gúriyets datsmanatsi k'osh shodetsuwots waat bokashi. ¹⁰ Ash ashuwotswere ime keewo noosh dek't boweyi, noon bomangitsok'onowere noosh bokitsi, markabon amoosh notuworowere noosh geyitu jamo markabats noosh bokuriyi.

P'awlos sha'o Maltayiyere Rom maants

¹¹ Keez shashosh Maltan noteshiyakon joshman aats kaaron gúrts datsmanatse no beshitso Eskndriyaa markabats keshdek'at notuwi, merkabunu Diyosk'orosi eteetso Woteraw maat ik'wots milkito b'tookatse detsfe bteshi. ¹² Srakus kitamots no bodtsok'on

manoke keez aawo nobeyi. ¹³ Mokno aats k'aaro gúúrat Regiyum kitu nobodi, manoke ik aawo nobeshiyakon muur jongo b̄ jongtsosh gitl aawots putiyolus maants noami. ¹⁴ Eshumanotsnowere daatsat bonton shawat aawo nobeysh noon bok'oni, maniyere hakono Rom maants noami. ¹⁵ Romitse fa'a amantsuwots nojango boshishtok'on Afiyos gawuyonat «Keez k'eewokuwotsi» eteefuwotsok b̄borfetso noon dek'osh boweyi, P'awlos boon b̄bek'tsok'on Ik'o udat kup'b̄wutsi.

P'awlos Romitse

¹⁶ Romits nokindtsok'on P'awlosi kotet kes' kes'f iko imt bíyal b̄ beetuewk'o wosheyi.

¹⁷ Keez aawonyere okoon P'awlos Romitse fa'a ayhuditsi een een ashuwotsi b̄ s'eegiye, bokakuwetsok'ono hank'o bíeti, «Tieshuwotso! Israe'el ash ashonat nihwots nemats tk'altso egonworu gond fino aaliye, wotowa bako Iyerusalemn tipeyat Rom ashuwotssh besheyat ti'imeyi. ¹⁸ Rom ashuwots taan boatiyakon k'irosh taan betsit weero datso bok'aztsotse hank'on taan fakshosh gawtniye boteshi. ¹⁹ Ay-hudiyotsmó taa hank'on tfakshewo bok'eftsotse Rom nugusoke taash s'iilewe eto geyik b̄woti, b̄wotiyaluru ti ashuwotsi ts'aamit keewo deshatseshi. ²⁰ And itn ts'egiye itn bek'osh geeyat manowere itsh keewoshe, taa habiliyan ttype Isra'elsh jangit imets keewi jangoshe.»

²¹ Bowere hank'o ett b̄ish boaani, «Yhud dat-satse njangosh gúút'ets wosho noosh boratse, hanok waats ashuwotsitse konuworu ngondo

keewtso aaliye. ²² Namaniru haymanotiyán b̄ be beyoke ash ashuwots bok'efiruwok'o dan-fone, mansh níasabtso eeg b̄wottsok'o shisho geefone.»

²³ Aawo b̄ish bodetsiyakon aywotdek't b̄ beyiru moo maants boweyi, b̄iwere guurtson kooc'ish b̄borfetsosh Ik'i mengsti jangosh gawon b̄íasabiyo boosh kish b̄ kitsi, boon amaniyoshwere Muse nemonat nebiywots mas'aafotse kitsfetst Iyesus jangosh boosh b̄daniyi. ²⁴ Ik ikuwots b̄aap'o boamani, k'oshuwotsmó amaneratsno. ²⁵ Bowere boatsetseyo ik bowoterawon bok'aleyí. Bwotefere bok'aleyonyere shino P'awlos b̄keewo b̄ ishoor hank'o ett b̄keewi, «S'ayin shayiro Nebiyiwo Isayasn it nihotssh b̄ keewtso arikee b̄teshi! ²⁶ B̄

keewts aap'o hankowa b̄wotiti,
 <Ash ashaanotsok amrniye
 Shishonere shishetute, ernmó t'iwintsratste,
 Bek'onere bek'etute, ernmó nibn de'atste eree boosha,

²⁷ Ashaanots nibo kup'wtsere,
 Bowaazonuwere ipewutsere, boaa-wonuwere is'ewutsere,
 Hnk'o woto b̄k'azink'ee,
 Bo aawon be'er,
 Bowaazon shide'er,
 Bonibonowere t'iwintsde'er
 Tmaants bo aanere,
 Taawere boon tkashyank'oni b̄teshi.> »

²⁸ «Eshe Ik'i kashiyi wosho Ik'i ash woterawwotssh woshetsok'owo dande'ere,

boowere eekar bín dek'etune. ²⁹ [P'awlos han bkeewiyakon ayhudiwots k'up'shdek't mooshfere manoke kesht boami.]»*

³⁰ P'awlos bkirayits mootse gitnati s'eeno bbeeyi, bmaants weyiru ashjamwotsno dek'fee bteshi, ³¹ Ik'i mengstonowere nabfetst doonzo Iyesus Krstos jango konuwor bín bbazirawon ááwu shuk'on bdanifoni bteshi.

* **28:29** 28:29 Ik ik bitsuwots 29 taawatstahan dabrakne.

Handr Taara
The New Testament in the Borna Language of
Ethiopia (Handr Taara)

copyright © 2018 The Word for the World International

Language: Borni (Borna)

Contributor: The Word for the World Southern Africa

Handr Taara

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412